


CISÒMBEDI CÌCILWALWÀ CYÀ MUBÀKI WA MU DYULU NÈ MUKAJÌ-MUSÈLA WA PA BULOBA

 Twánjàayi kushàala biimànyine kuulu katanci, patùdi twinyika myoyi yètù mpindyewu kumpàla kwà Nzambì apa.

² Taatù wetù wa mu Dyulu, ncyà bushùwà ne tudi ne kusakidila bwà dyèsè dyà kwikala kaaba aka leelù ewu, badisangishe pàmwè mu Dìna dyà Mukalenge Yesù. Tudi tulòmba bwà Ûtùfwilèku luse ku mpèkaatù yètù, nènku bu mutùdi kaaba aka bwà kutùma ntèmà yètù ku bintu byà Cyendèlèlè ne Mwoyi ùdi dyàmwàmwà dyà cintu cyà cifwàkà citùdi mwà kulenga eci. Mpindyewu tudi tulòmba bwà Wèwè kutùleeja njila Yèbè yà dilonda, yà mutùdi ne cyà kwela bibèndà, citùdi ne cyà kwenza mu matùkù àcilwalwà, ne nànsha mene mu bwikadi mpindyewu, bwà kupetakù kaaba katùdi . . . balayìibwe aku.

³ Kùdi bààbùngi bàdi bàsaamà ne bàdi mu lukèngelu lwà bintu mu ditùnga emu, ne kabàyi banji kujikija lwendu lwàbò to. Ne mwena lukuna wetù munène, kàyì ànu mwena lukuna wetù cyanàànà to, kàdi mwena lukuna Webè, mmulwe bwà kubàbunda ne bwà—ne bwà kwimanyika mwoyi wàbò, ne bwà kubàtùma ku lu—lukita kumpàlà kwà dìbà. Nènku tudi tubàlòmbela, leelù ewu, bwà Wèwè ne luse Lwèbè ne ngàsà, Mukalenge, wàlabajèku matùkù àbò too ne ku cikondo cibàkòsela.

⁴ Pa cibùmbà cyà ku cyambilu, anyi pa cyambilu, mishwàlà nyèyi myadija apa ne tubùki. Ne mu bibwelelu ne mwaba wònsò ewu, kùdi bàdi mu tulààlu, tulààlu twà dyambwila balèmà, babèèdi ne beena ntàtù, biimane mu bateèleji mwàmwa kabàyi mene ne dikàndà dikùmbane dyà kwimana naadi to.

⁵ Éyi Nzambì wa Cyendèlèlè, Mubènèshùibwe Wetù, swàkù Ûtèèleje disambila dyètù mu dindà emu, ku Mashi à Mukalenge Yesù; kùyì utàngila bubì bwètù to, kàdi bamanyè ne Yèyè wàkiimana pa kaaba kèètù, ne ànu Yèyè awu ke Udi uleeja mpàlà yètù bwà disambila edi. Swàkù bwà muntu ne muntu wòndopiibwe bwà butùmbi Bwèbè, Mukalenge.

⁶ Bèneshàku mishwàlà eyi. Pàdiyi yìtentekiibwa pa babèèdi, swàkù bwà bàsangalè.

⁷ Nènku mpindyewu, Taatù, patùcìdi bindile mudimu munènè wà dyondopa apa, utùdi twitabuuja ne newùlondè,

tùkàngwilekù njila wa Mwoyi, Mukalenge, bwà twamòna mwà kumanyina ku Dìyì Dyèbè civwà cikèngela bwà twètù kwenza. Bwalu tudi tulòmba nùnkù mu Dîna dyà Yesù. Amen.

⁸ Ànu mùtùbi misangu yònsò, eci cidi bwànyì mèmè dyèsè dyà ku à matàmbe bunène, dyà kwikala mu nzùbu wa Nzambì ne kwakula ne cisàmbà Cyèndè. Nènku mpindyewu kùdi bantu bààbùngì be, pàànyì ne dileesònà dile ditàmbe's. Pa nànkù ndi. . . Ndi—ndi mutwishìibwe ne—ne nenwikalè bacyankàme, ne mwènù mwònsò, too ne patwàjikijà Dìyiisha edi.

⁹ Mpindyewu, kùdi luuyà be, kàdi tudi ne dyanyisha bwà bitwèdì byà kapeepà. Kàdi, musumbà wa bunène ebu, kakwèna kufwànyine kwikala byedi byà kapeepà bìdì mwà kujikija bwalu bwàwù to, nwamònu's, bwalu mubidi wèbè wèwè mwinè ùdì ùpàtula luuya, lwipacila degré makumi àsaàtù ne mwandamutekete, ne ùdì dîbà dyònsò ànu ùpàtula luuyà, eku basòmbe pàmwè batwàngàne nkundù. Kàdi ndi—ndi mutwishìibwe ne Nzambì neànùsòmbèshè bacyankàme ne Mwèndè mwònsò.

¹⁰ Nènku patùdì munda emu, bamanyishe masangisha bu edi nùnkù, ncì—ncìvwa mufwànyine kwikala munùvwijè mwaba ewu to, nànsha byà munyi, bu nciyì ngèèla meeji ne bìvwa mbwà kunùkwàcisha, bu ne ncìvwa mwelè meeji ne cìvwa cinwènzela bìmpè to, ne nuvwa bafwànyine kupetelakù kantu kampànda, ku dilwa adi's. Ne pashìishe, bu mutùdì bamanyè kàbìdì ne katwèna ne dîbà dipitepìte bùngì dyà kwenza cyòci eci to, bwà ne tudi—tudi twenda tuseemena ku—ku mèbà à ndekeelu menemene, ne ndi—ndi muswè kwenza, ne mwànyì mwònsò, bwà mutancì wònsò wikale ne musinga bwà Bukalenge Bwèndè. Nènku mpindyewu ndi mutwishìibwe ne Mukalenge Nzambì neàtùbènèshè patùdì tudisangisha apa.

¹¹ Ne ndi muswe kunwelela kààlumbandì, ne, makèèlèlè mvwa nya ku myaba mishìilèshìilàngàne, mupàtùke mukamònè bàmwè bàà ku babèèdì ne bàdì mu ntàtu, mu nzùbu yà cilààla-beenyi, nènku ndi mupetè mpùnga wa kutwilangana ne bàmwè bàà ku balombodi bààyì lumingu elu, ne yìmwè yàà ku myaba yà didiila. Bu mùdì, mvwa muyè ku Ranch House lumingu elu, lwà apa nùnkù, ne mulombodi wa kwòkù aku ùvwa ùndabula ku cyanza patùkaavwà tuumuka apu. Ke kwambayè, kumbiikilayè ne: “Mwanèètù Branham.” Mèmè kudikonka mùvwàye mummanyè. Ke yèyè kwamba ne. . .

Mèmè ne: “Wèwè ki mulombodi wa nzùbu ewu anyi?”

¹² Yèyè ne: “Mèmè ke mwenayè.” Ke pashìishe kwambayè ne: “Eyo, bantu bèbèbè bàdì bàbwela mwab'ewu bwà kudyà, bàfumina kwinshi aku.” Yèyè ne: “Bwòbò. . .”

Ki mèmè ne: “Èè, ngèèla meeji ne bàdì bàkukùta bapite bùngì's.”

13 Yèyè ne: “Mukalenge, s’ke ùmwè wà ku misùmbà yà bantu bàà batàmbe bwimpè bânkaadìku mumòne.” Yèyè ne: “Mbimpè bàà menemene.”

14 Mvwa muyè ku nzùbu kampànda wa cilààla-beenyi makèèlèlè awu, bwà kumòna nsongàakàjì kampànda ùmvwa njinga kwakula nendè, tatwéndè ne mamwéndè bàvwa kaaba aka, kàdi kunkèngelabi bwà mèmè kuya kùdì mulombodi wa nzùbu awu bwà kujandula kùvwà ci—cilààl-. . . cibambalu mùvwàbò bàsanganyiiibwa.

15 Yèyè ne: “Kàdi wèwè ke Mwanèètù Branham anyi?” Aci’s cìwa ku Oaks kwàka.

Ki mèmè ne: “Èyowà’s, mukalenge.”

16 Yèyè ne: “Ndi muswè nkulabulèku ku cyanza.” Yèyè ne . . . Yèyè kundeeja kùdì mukàjèndè; babàke bàà maalu malenga bàà dikèma. Kwambabò ne: “Muntu yònsò udi mu nzùbu wa cilààla-beenyi ewu ùdì ùya mu masangisha èbè. Tudi bamulamìne ànu bwàbò bòbò.” Ki yèyè ne: “Tudi babènge baakìdiyà bèètù bònsò bakwàbò abu.”

Ki mèmè kwamba ne: “Èè, ndi nkwela twasàkidila bwà bwalu abu.”

17 Yèyè ne: “Mwanèètù Branham, ùmwè wà ku musùmbà yà bantu balenga bàà dikèma bânkaadìku mumòne, mbantu bàdì bàlwa mwab’ewu, bàdì bàbwela mu masangisha èbè abu.”

18 Mèmè kuya makèèlèlè dilòlò awu kùdì mulunda wanyi, Mukalenge Becker kwinshi eku, nènku ntu misangu yònsò ànu muswè mampà èndè meela minyìnyì awu. Yèyè ùdì bu . . . Yèyè, mvwa mumumanyè pàncìvwà mwànà; ntu mumumanyè mu matùkù ànyì wònsò à mwoyi. Kuvwa babàke basòmbe kuntwaku bàfùmìna kwinshi ku—ku mwaba wà kale, kwinshi ku Riverside Hotel kwinshi aku. Pa nàнку bwòbò . . . Mukalenge Becker kwambayè ne: “Billy?”

19 Mèmè ne: “Ncinyi ciinè aci, Homer?” Tudi bamanyàngàne muntu ne mukwéndè bìmpè menemene.

Yèyè ne: “Ntu ndiisha bantu bèèbè bwònsò kuntwaku.”

20 Bipacila ku nkàmà yìbìdì, anyì cintu kampànda, dyàlumingu dyònsò, bàtu bàdya ku Blue Boar. Ne kwònsò kunyaayà, ndi ngùmvwa bàmba bwà mùshindù unùdì balenga.

21 Mulumyana ewu kwambayè ne: “Kwinshi ku—ku Riverview kwàka,” mwàkambaye, “mwaba wònsò mmukwàta kùdì bantu bàdì bàbwela mu disangisha dyèbè.” Yèyè ne: “Nekwìkalè nkàmà yà bantu bìikala kabàyi mwà kubwelamù to.”

22 Pa nàнку, bwà kwikala nàнку, bwànyì mèmè nudi mukèlè wà bàà pa buloba. Ndi—ndi ne kusàkidila kwàbùngì bwà kumanya ne ndi ne dyèsè dyà kuyiisha bantu bàdì nànsha mene bangènzàmpèkààtù ne bantu . . . Ncyèna ngàmba ne bantu

aba mbangènzàmpèkààtù to, kàdi ndi nswà kwamba ne bantu bàdi, bangèndàmùshingà ne bikwàbò, bàdi mwà kwamba ne nudi bantu balenga, ne bànwànyisha mu mishinga yàbò, mu myaba yàbò. Nudi bamanyè's, aci's ke kwikala batwè mukèlè. Ndi ngàanyisha aci, didìtwàlà dyènù, mùshindù unùdì nucyùka maalu.

²³ Ntu misangu yònsò ngàmba ne: “Muntu kampànda yéyè mubwele kàdi kàyì, kàyì ne mfranga bwà kufuta mushinga wèndè, ùmbiikile ànu mèmè.” Nwamònu anyì? Mèmè ne: “Netwènzè cintu kampànda pa bwalu abu.” Ki mèmè kwamba ne: “Bàdiishe ànu misangu yònsò, nànsha bwòbò ne mfranga anyì kabàyi naayi.” Nwamònu's, cintu kanà cyònsò cidi mwà kwenjiibwa.

²⁴ Ndi ndyùmvwà ne nudi bàna bàanyi. Nudi—nudi mìtootò yìndì. . . Bu mèmè mwà kucipeta pangàafikà kwaka, nenwikale cilengà aci, citùpà cyà cibàlakana aci, ku—ku cifulu cyà butùmbi cyà mudimu wànyì wà bwambi. Pààshiihwàwu cifulu cyà butùmbi, wèwè newikale cilengà aci's.

²⁵ Nènku mvwa mudìtwe mudinwàmbila, mu bikondo bishààle, pa bidì bitàngila Bitampì Mwandamutekète, Bikondo byà Ekèleeziyà, ne bintu bidì—bidì bidìtwe mu kwenzeka.

²⁶ Nènku mpindyewu, mu dindà emu, ndi ne cyena-bwalu cyà mushinga wàbùngì. Bwànyì mèmè, ncyà citàmbe kubèneshiibwa cyà dikèma be. Ndi ntèkemena ne cidi cinùlenga mùshindù wùmwèwùmwè awu. Kàdi bu mèmè ànu mwà kucifila mu disonsodiibwa dìmvwà mucipetè amu, neciikale cilenga cyà dikèma, kàdi abu's mbutàngile Nzambì bwà kwenza nàнку.

²⁷ Mvwà mudìtwe mu dinwàmbila bwà *mwaba* ne *ciine* cidi munkaci mwà kwenzeka, nènku tudi tumòna bintu byònsò ebi munkaci mwà kwenzeka.

²⁸ Mpindyewu ndi ngàakula, mu dindà emu, pa: *Cisòmbedi Cìcìlwalwà Cyà Mubàki Wa Mu Dyulu Ne Mukàji-musèla Wa Pa Buloba*, piikalàbo mwà kusòmbela. Nènku, bwalu, ndi mutwìshiiibwe ne ku ngàsà wa Nzambì tudi bwònsò citùpà cyà ku cibùcilu cinènè cyà Nzambì aci.

²⁹ Nènku mpindyewu ndi—ndi mutwìshiiibwe ne nenùntwàle, nwikale ne Bibles yènù, crayons yènù ayi, anyì cyònsò cinùkènji bwà kubala pàmwè naanyi aci, bwalu nènngiikalè mwà kuleedila ku Mifùndu yàbùngì. Kuteeta bwà kujikija pa dìbà dikùmbàne bwà kusambidila babèèdi; nènku ndi ndaya nàнку. Mu kubwela, mvwa nsambila katanci kakesè aka, mu bibambalu ne mu nyùngulukilu amu, bwà aba bàdi ànu menemene kabàyi pabwàsà ne babùle ditèkemena.

³⁰ Nènku, bu Mukalenge mwà kwanyisha, pàmwàpa nènngènzè disangisha dikwàbò mu ditùkù dyà dikùmi ne disambòmbò, pàmwàpa ànu bwà kusambidila babèèdi cyaanàna.

31 Ndi ntwàdija diikisha dyànyì mpindyewu. Kacya ku ngondo wa cyongo mushààle ewu, mvwa mumònàngàne ànu ne ngendu, ne ndi ngàlukìla mwaba ewu. Nèngìikalè ànu, ne bikèngele nye ne dikhù dyànyì ku Tucson mu dindà, ne pashìishe nèngàalukilè bwà kupicishila cikondo ku Kentucky eku, ne bàmwè bàà ku balundà bàànyì, twenda tulemba, ne tulemba nshindi, munda mwà mbingu yibìdì, anyi pàmwàpa mmatùkù mwandamutekète anyi mwandamukùlù, dikumi, cyònsò cidiku aci, amba ànu Mukalenge mundombòle mwaba kampànda mukwàbò. Ncitukù ànu mumanyè menemene, kuwikale to; katùtukù bamanyè aci to, bwalu aci cidi mu byanza byà Nzambì, ànu Nzambì nkàayendè.

32 Mpindyewu bwà cyena-bwalu cinène eci, tudi—tudi... Ngèèla meeji ne, bu mèmè mwà kwangata dîbà dyànyì pa cyòci eci, bwalu bìdì bikèngela kubwejèmu bintu byàbùngì, mbifwànyìne kwangata mbingu. Kàdi ndi mufunde ndambù wa Mifundu, tuntu kampànda tufunda, ànu bwà kulenga myaba mitumbùkè yàci, bwà cyànùfikisha ku dilonga.

33 Pashìishe àbìdì àdi panshi aa, pàmwàpa, bu Mukalenge mwà kwanyisha, mu ngondo kaswàmansènsè, ncyèna mumanyè ne ndîbà kaayi to, kàdi dîbà dyònsò dyàlongolàYe adi, ndi njingakù kupeta ndambù wa—wa matùkù, ànu bwà kwenza disangisha dyà kashèndèndè, pa nshapità wa 12 wa Bwàkabuulwibwà, bwà kuswikamù cyòci eci. Kaa, ndi ngèèla meeji ne mbifwànyìne kwikala bîmpè be. Mbifwànyìne ànu kwikala nànkù. Mbifwànyìne kwikala bîmpè be bwà kumòna mwàkenzàYe.

34 Pashìishe, patùdì tudisangisha pàmwè mpindyewu, mvwa mwàmbe makèèlèla dilòlò, mwambe ne: “Udi mumanyè’s, pàndì...” Mu dindà, bu mùdì dindà dyònsò, ngèèla meeji ne: “Pàndì ndwa mwab’ewu, nèngìikalè mwà kuteela yònsò wa ku balunda bàànyì udipù awu.” Mpindyewu mmunyi mungààcyènzà’s?

35 Bwà kwikala naanyì kaaba aka, bu mùdì mulundà wanyi mwîmpè, Docteur Lee Vayle udi musòmbe apa ewu, mukàjèndè mulenga ne mwanèndè wa bakàjì ewu. Ne Mwanèètù Roy Borders, ne, ngèèla meeji, Mwanèètù Ruddell, Mwanèètù Beeler, ne Mwanèètù Palmer, ne Mwanèètù Jackson. Ne, kaa, ekèlekèle, kùdì—kùdì...Bànà bèètù bananga bàà ku nseke mishìilèshìilàngàne yònsò abu! Mwanèètù Anthony Milano, ne, kaa, myaba yònsò yùdì utàngila ayi, udi umòna mwanèètù kampànda mukwàbò’s! Bàà mu Arkansas mwàmwa, ncyèna mwà kuvùluka dîna dyèndè to; Mwanèètù John, Mwanèètù Earl Martin, ne Mwanèètù Blair. Ne, kaa, kùdì ànu... wèwè... Kabyèna ànu ne ndekeelu to, nudi numòna’s. Ndi ne disànkà dyàbùngì be bwà kwikala ne musumbà bu ewu ùdì mudikungwije munyungùlùkile pàndì ndongesha pa Dìyì dyà Nzambì apa, bantu bândì ngèèla meeji ne mbantu bàà bukitù, bantu bàà Nzambì bàà cyà bushùwà.

³⁶ Ndi ne kusàkidila bwà kaatàbernacale kakesè aka. Ndi ne kusàkidila bwà biibi byàkù bitaanu bidì byunzulula bwà bantu ebi. Ciibi cyònsò. . . Tudi ne balami bànaayi kaaba aka, bantu bùjiibwe tètè ne Nyumà; balubuludi bànaayi, bantu bùjiibwe tètè ne Nyumà. Mbwena kwamba ne bàbìdì ku ciibi ne ciibi cyònsò. Nènku kùdì ciibi cyà mishiku yìbìdì mu mpàla, bwà baampaasàtà bàbìdì, balami bàà mikòòkò.

³⁷ Tudi ne disànkà dyà kwikalakù neenù; ne kusàkidila kùdì Nzambì bwà cyòci eci. Àswekù Yìkale ànu ùnùbènèsha.

³⁸ Mpindyewu tudi baswè kwimana katanci kakesè cyanààna, patùdì tubala mu Peetèlò Mwibìdì nshapità mwi³ apa, kàbìdì ne mu Mukàndà wà Bwàkabuulwibwà 21.

³⁹ Patùdì biimànyine kuulu apa, Éyì Mukalenge, ùjàku myoyi yètù ne disànkà dyà dibala dyà Dìyì Dyèbè, bamanyè ne Yesù mmwàmbè, ne: “Maulu ne buloba nebijiminè, kàdì Dìyì Dyànyì kadyàkupangilakù to.” Bamanyè kàbìdì ne Yéyè wàkamba ne: “Mufùndu wònsò ùdì ne cyà kuula.” Nènku patùdì tubala bintu ebi apa, swàkù bwà tupetèku dyumvwa dyà kùdì Wèwè, dyà dìbà ditùdì ne mwoyi. Tudi tulòmba nùnkù mu Dìnà dyà Yesù, Mwena Mukàndà awu. Amen.

⁴⁰ Peetèlò Mwibìdì 3.

Mukàndà mufundilangana mwibìdì ewu, bananga, ndi nnufundila mpindyewu; mu yònsò yìbìdì mündì ntàbuluja meeji ènù makezùke mu mùshindù wà dinùwùlwija:

Bwà nwàmòna mwà kwikala ne civùlukilu cyà mēyì àkaakudùbwa dyàmbedi kùdì bapròfetà bàà cijila, ne ku mēyì matùtùmina kùdì bàpostòlò bàà Mukalenge ne Musùngidi:

Bamanyè eci dyàmbedi ne, nekùlwe baseki mu matùkù à ndekeelu, benda bilondèshìle nkùkà yàbò bwòbò,

Kàdì bàmba ne: Mulayì wà dilwa dyèndè wèpì? (Aci ne kacyèna cìkùmbanangana ne mukàjì mwena bupidyà ewu mu. . .). . .kacya baataatù bààlààla tulù, bintu byònsò mbitùngùnùke ànu mùwàbì kacya ku cibangidìlu cyà bufùkì amu.

Bwà bwalu ebu mbaswè kupanga kumanya ku budìswìle bwà ne, nku dīyì dyà Nzambì kwàkafùkùbwa maulu à kale, ne buloba bùdì bupàtùkùle mu màyì ne mu màyì:

Ku byòbì ebi buloba bwàkadìku musangu awu abu, bwàkabùtudiibwa, bwikale butùkijùbwe mu màyì:

Kàdì maulu ne buloba, bìdìku mpindyewu ebi, ku dīyì dīm̀wèdīm̀wè adi mbilamùbwe mu cibucilu, bilaminyina bwà kwedùbwa mu kapyà bwà ditùkù dyà cilumbulwidi ne dibùtudiibwa dyà bantu babì.

Kàdi, bananga, kanùpangi kumanya cintu cìmwèpelè eci to, cyà ne ditùkù òmwèpelè didi kùdi Mukalenge bu bidimu cinunu, ne bidimu cinunu bu ditùkù òmwèpelè.

Mpindyewu, Mukalenge kèna ne lujòòkò pa bidì bitàngila mulayi wèndè nànsha, bu mùdi bàmwè bantu bàbala lujòòkò; kàdi ùdi ne mwoyi mule bwètù twètù, kàyì muswè bwà muntu nànsha umwe àbutukè to, kàdi bwà bwònsò bààmòna mwà kufika ku kanyinganyinga.

Kàdi ditùkù dyà Mukalenge nedilwe bu mwìbi butùku; mu . . .mwìkala maulu ne buloba, ne mutooyi mukolè . . .nebìjìminè ne mutooyi mukolè, ne bintu bidì bìbyenza nebyènguluke ne kapyà kakolè, ne buloba kàbìdi ne midimu yidimu ayi nebyòshikè byònsò butubutu.

Pa kumòna díbà adi ne bintu byònsò ebi nebyènguludiibwè, mbantu bàà mùshindù kaayi bàvwà bàkèngela bwà twètù kwikala mu muyiiki wà cijila cyònsò ne difwàna dyà Nzambi,

Bindile bwà dilwa dyà lùkàsà dyà ditùkù dyà Nzambi, mwikalà maulu àdi mu kapyà awu mwà kwenguludiibwa, ne bintu bidì biènta mwà kwenguluka kùdi kapyà kakolè?

Nànsha nànkù twètù, bilondèshìle mulayi wèndè, tudi bindile maulu mapyamàpyà ne buloba bupyabùpyà, mùdi bwakànè busòmbèle.

Ki bwà cinyi, bananga, bu mùdìbi ne tudi bindile bintu byà mùshindù awu, difilaayi ne mwènù mwònsò bwà kanwikadi mwà kusanganyiibwa . . .mwà kusanganyiibwa kùdiye mu ditalala, kanùyì katòba, ne kanùyì kabandàbàndà.

Kàdi nubala ne mwoyi mule wà Mukalenge ùdi lupàndu; mene ànu bu munanga wetù . . .Pòlò . . . bilondèshìle lungenyi lumupèèsha wàkanùfùndila;

Bu mùdiye kàbìdi . . .mu mikàndà yèndè yònsò mifùndilangana, wàkula bwà bwà maalù awu; . . . àdi misangu mikwàbò makolè bwà kuumvwa, àdi bàdi kabàyì balongèshùibwe ne kabàyì bashindàme balwangana naawù, bàkònyangaja, bu—bu mùdìbo kàbìdi bènta mikwàbò mifùndù, bwà kabùtù kààbò sungasunga.

Ki bwà cinyi, nwènù bananga, pa kumòna ne nudi bamanye maalù aa kumpàla, ikàlaayi badìmujiibwe kàbìdi, bwà ne biikale balaalùdiibwa ne . . .cilemà cyà beana lwonji, kanùlu kudishinda kuumuka ku . . . diimana dyènu kamùngùlu.

Kàdi nùkolè mu ngàsà, . . . mu dimanya dyà Mukalenge ne Musùngidi Yesù Kilistò. Butùmbi bwìkale kùdiye bwà mpindyewu ne kashidi. Amen.

⁴¹ Mpindyewu mu Bwàkabulwibwà bwà—bwà Kilistò, mu nshapità wa 21, ndi mbala Mèyi aa.

Ne ngákamòna dyulu dipyadìpyà ne buloba bupyabùpyà: bwalu dyulu dyà dyàmbedi ne buloba bwà dyàmbedi byàkajìmina; ne kakùcìvwa kàbìdì mbù to.

Ne mèmè Yone ngákamòna cimenga cyà cijila aci, Yelusàlèmà mupyamùpyà awu, cipweka cifùmina kùdì Nzambì mu dyulu, cilongolola bu mukàji-musèla mulengejila bàyendè.

Ki mèmè kuumvwa dīyì dikolè dipàtukila mu dyulu dyàmba ne: Mònaayi, tabernacle wa Nzambì udi ne bantu, ne yèyè neàsombè naabò, ne bwòbò nebùikalè cisàmbà cyèndè, ne Nzambì yèyè mwìnè neikalè naabò, ne neikalè Nzambì wabò.

Nènku Nzambì neàbàkùpùlè binsònji byònsò ku mèsù kwàbò; ne kakwàkwikala kàbìdì lufù, anyi tunyinyanyinga, anyi myadi, anyi kakwàkwikala kàbìdì bìaamà to: bwalu maalu à dyàmbedi àkaadi majìmine.

Ne ewu uvwa musòmbè pa nkwasà wa butùmbi awu kwambayè ne: Mònaayi, ndi ngènza bintu byònsò bipyabìpyà's! . . . yèyè kungambila ne: Fùnda: bwalu mèyi aa mmalelèlè ne àà lulamatu.

Ke kungambilaye ne: Ncyenzèke. Mèmè ndi Alpha ne Omega, cibangidilu ne ndekeelu. Nènku nèmpeeshè ewu udi ne nyòtà mpokolo yà máyi à mwoyi cyanààna.

Ewu wàcimuna neàpyane bintu byònsò; ne Mèmè nèngùikalè Nzambì wèndè, ne yèyè neikalè mwanàanyi.

Tùsambilàayi cyàkàbìdì.

⁴² Mukalenge Yesù, ne mulayi wà mùshindù ewu ne ewu ngakwilù wa kàyi bilèlè wàkatwàkwilà nendè Yesù ne mùpostòlò bwà bwalu bwà díbà ditùdì twenda tuseemena edi, tùpèèshèku, Éyi Mukalenge, bulombodi Bwèbè, bwà twamònakù mwà kumanya mwà kuseemenakù mu mùshindù mujaalàme. Bwalu, dilwalwa, tudi bamanyè. Mifundu yìdì ne cyà kuula, ne ke mwikalàbi kàbìdì. Nènku mpindyewu, Mukalenge, tudi tulòmba cyàkàbìdì luse Lwèbè kutùdì twèèu bwònsò, patùdì tulonga Dīyì Dyèbè apa. Ikàlàku neetù ne útùvùngùlwilèDi, Mukalenge, bwalu tudi tulòmba nùnkù mu Dìna dyà Yesù. Amen.

Nudi mwà kusòmbaayi.

⁴³ Mpindyewu, ndi ndìkonka ní nkufwànyineku kwikala mùshindù pàmwàpa, wà pàmwàpa kujimakù makènke à mu

batèèleji awu, kàdi kulekela à pa cibùmbà cyà ku cyambilu aa, bidi mwà kwikala pàmwàpa bitàmbe bwímpè, ne bifwànyine kwangatakù ndambù wa nzembu. Tuvwa bambè kwosha cyamu cishintuludi cyà tupyà, dilòòlò adi. Nènku bu mukùbi wa ntempèlu mwà kutwènzelaci, s'tudi bafwànyine kwanyisha dijimà dyà makènke à mu ndekeelu, makènke à mu batèèleji, awu's. Ne ndi ngèèla meeji ne dībà adi nenùpetè bukènke búngi bukùmbàne bwà kumòna, bwà kufùnda.

⁴⁴ Mpindyewu, cyena-bwalu, bwà kucimanyisha cyàkàbìdi, ne tudi tuseemena ku—ku cyena-bwalu cyà ne: *Cisòmbedi Cìcìlwalwà Cyà Mubàki Wa Mu Dyulu Ne Mukàji-musèla Wa Pa Buloba*.

⁴⁵ Mpindyewu bu mùtùbi. . .Nebikèngele ànu bwà ngènzèku nùnkù. Kùdi luuyà lupìte búngi mwaba ewu, nwamònu's. Èyowà's, mukalenge. Patùdi. . .Ndi mumanyè ne mukàjàànyì kàtu muswè bwà mèmè kucyènza to; kàdi, cyà, kuvùùla nkoooci eci. Kùdi luuyà lukolè be mwab'ewu. Nwamònu's, nudikù ne kapeepà kuntwaku's, kàdi's nkashìikidìle ànu ndambù mwab'ewu, nwamònu's. Mpindyewu, mu—mu cikondo cìcìlwalwà, anyi. . .

⁴⁶ Mu cikondo cìkaadi cipite, èyowà's, tudi balonge *Bitampi Mwandamutekète, Èkèleeziya Mwandamutekete*. Mwanèètù Vayle ne bakwàbò bàdi munkaci mwà kukwàta mudimu pa byòbò abi mpindyewu, ne lulamatu lwònsò, bwà kubitèeka mu mmwènèkelu wa mukàndà.

⁴⁷ Ne pa kumòna bintu byònsò bìdi kabiyì byùmvwika bitùdi bamòne byènzeka ebi, dībà adi ndi ngèèla meeji, paanyimà pàa dyumvwa dyà ne, mu dībà ditùdi ne mwoyi edi, ne mwaba utùdi; ne kakwènakù muntu udi mwà kuswa bwà kutwà nyimà paanshì ne meeji wònsò bwà kukenketa bikaadi byakula, ne bìdi bilaya bwà kwenzeka, ne bikaadi byenzèke, kàdi kubènga kwamba ne bintu abi mbikùmbàne to. Nwamònu anyi? Ànu menemene cyàkambà Nzambì ne Neénzè aci, Yèyè wàkacyènza ànu menemene mu katòba ne katòba. Nwamònu anyi?

⁴⁸ Mpindyewu, ndi ngèèla meeji mu cyòci eci, ne, mùndi nciyi mumanyè ne ndìbà kaayi dìdi Mukalenge Yesù mufwànyine kumwènèka, mvwa ndyàmbidila ne mbifwànyine kwikala bímpè, bivwa bimwèke ànu bisànkisha Nyumà Mwímpè bwà twètù kwakula pa cyòci eci, dībà adi; ne pàmwàpa ngààlukilapù cyàkàbìdi, misangu yìbìdi anyi yìsàtù, bwalu ncyàkupeta dībà dikùmbàne menemene bwà kupàtula byònsò ebi to.

⁴⁹ Bu mùdi mwaba ùdi ukalenga ku—ku cyena-bwalu cidì cifwànyine kwikala bu cyà cìlèndwisha muntu kampànda ndambù, cyùdi kùyì mwà kuya naaci too ne ku ndekeelu bwà kucitòòkesha to, pashìishe walukila cyàkàbìdi bwà kubàkula cyena-bwalu cidì cilonda.

⁵⁰ Nènku pashìishe, mu...bu Mukalenge mwà kwanyisha, tudi tubwela mu bitampì byà 12, anyi katùyi...Mfwilaayikù luse. Nshapità wa 12 wa Bwàkabuulwibwà, udi usanganyibwa pankaci pàà Dilwa dyà Mukalenge ne ndekeelu wa Mpungi, ne bikwàbò. Netùteetè bwà kwaluja aci, bwà kuleeja ne Sàtaanà nganyì, ne cyàkenzàye, kùdiye mufùmìne, cidi kiipàcilà kèndè, ne mùshindù wakamufikishà bulenga bwèndè bunène bwàkamupàbo abu ku didìshìndà. Diseeswisa dyèndè kumufikishadi ku didìshìnda; bulenga abu.

⁵¹ Pashìishe, mùshindù ùdibi kabìyi mwà kwenzekakù bwà muntu kanà yònsò ewu udi muswè kucitàngila mu mùshindù mujaalàme, “dimiinù dyà nyòka adi”. Ndi mufwànyine kwela kadyòmbò bwà aci, kùdi muntu kanà yònsò ewu, nwamònu’s, udi mufwànyine kujinga bwà kucitàngila, ànu ne—ne luumvu lwètù lwà bantu bwònsò elu menemene. Mwànà ùdi mwà kucimòna. Nwamònu anyi? Mpindyewu, nènku netùfikeku pashìishe.

⁵² Mpindyewu, tudi tuumvwa kaaba aka ne Mifùndù yìbidì eyi...Cìndì mubadila Peetèlò Mwibìdì nshapità mwi3, ne kumupàlakaja ne Bwàkabuulwibwà 21, mbwalu yònsò yìbidì kaaba aka yìdi yàkula pa cyena-bwalu cimwècimwè aci, kàdi Yone kàà—kàakacifùndakù bitòòke mwàkacifùndà Peetèlò amu to. Nwamònu anyi? Tudi tuumvwa ne Cisòmbedi cinènè cyà Mukàjì-musèla eci cidi ne cyà kwikala pa buloba apa.

⁵³ Nènku mpindyewu nwènù babalè, ànu mùdì nshapità wa 21 amu, nshapità wa 21 wa Bwàkabuulwibwà awu, mùpostòlò mmwàmbe mwaba ewu, anyi mupròfetà’s, mmwàmbe ne: “Ngàkamòna Dyulu Dipyadìpyà ne Buloba Bupyabùpyà.” Byumvwika bu ne kulwalwa dibùtudiibwa mu kabujimà.

⁵⁴ Mpindyewu, mùshindù wùntù misangu yònsò mpeta Mayiisha àànyì ng’ànù ku disambila. Ndi mwà kwikala musòmbe mu disambila nènku cintu kampànda cidìbuulula kùndì. Nènku nshààla mucindile mu tusunsa tokesè bwà kumòna ní ncilelèlè, pashìishe ndi ncyùmva pabwìpì menemene. Ne pashìishe misangu mikwàbò ntu ànu ntungunuka ne kwindila too ne pàdici cibwayika mu cikèènà-kumòna. Kàdi pàkaadici cibanga kulwa, ne mèmè musànkishìibwe ne cidi cifùmìna kùdi Nzambì, dìbà adi nyààya ku Mifùndu. Nwamònu’s, Aci cidi, ki cidi ne cyà kwikala dishìndika dyà cintu cyònsò cyà nyumà cidi cyenzèke, bwalu Bible ke dibuulula mu kaabujimà dyà Yesù Kilistò; nwamònu’s, Cidi Mubidi Wèndè.

⁵⁵ Nènku mpindyewu, mu cyòci aci, pàmwàpa ndi mpeta kaaba mu Mifùndu kàdi kakàyi kùmvwika bìmpè menemene to, nènku nèndìkonkè’s. Ndi ngàalukila cyàkàbidì ku disambila. Cidi cilwa cyàkàbidì. Pashìishe ndi—pashìishe ndi mbanga ku—kukenketa Mufùndù wànyì awu.

⁵⁶ Mpindyewu, Bible wetù mmfùnda mu Anglais, ne myàkù yà mu Anglais yitu yishintuluka, dìbà dyònsò. Cileejilu, bu

mùdi Yone Munsantu 14, mmwâambe ne: “Mu Nzùbu wa Taatù Wanyì mùdi màbàlaasà àbúngì,” dìbàlaasà mu nzùbu kampànda. Èè, dìbà adi, wêwè, cyùdi wenza ne cyôci aci dìbà adi, nkucyàluja ku—ku cyà ku cibangidilu ne kumòna cívwa Jacques muswè kwamba, anyi kwalukila ku cyena Ebèlù, anyi ku cyena Ngelikà, kuumukila ku nkudimwinu wa kumpàla awu. Ne mwómò amu mbâmbe ne: “Mu Bukalenge bwà Taatù Wanyì mùdi màbàlaasà àbúngì.” Èè, dìbà adi, udi walukila ku cikondo cívwa bakudimunyi bakùdimwine Roi Jacques, *bukalenge* bùvwa bùbìikidiibwa, mu Anglais, ne “nzùbu,” ne mfùmù awu ùvwa taatù kumutù kwà baaminyàmpalà bèndè. Ki bwà cinyi bààkakùdimuna ne: “Mu Nzùbu wa Taatù Wanyì mùdi màbàlaasà àbúngì.” Nwamònu anyi? Nènku dìbà adi udi upeta myàkù ayi kàdi bikèngela bwà wêwè kwenda ukèbangana naayi.

⁵⁷ Dìbà adi, nudi numòna’s, kuumukila ku disonsodiibwa adi... Cyambilu eci mu dindà emu, ndi ngàmbe ne, musangu nànsha ùmwè kacitukù cyanji kwikala cintu cikwàbò nànsha cìmwè to ànu Mifùndu, buludi. Ke mùshindù awu ùdi *Dimiinu dyà Nyòka* ne bintu bikwàbò byònsò ebi bilwa. Nwamònu anyi? Ku...

⁵⁸ Ne cidi, mu bushùwà bwà bwalu, bu muntu mwà kubala ànu cyanààna wàmbe ne: “Mu Nzùbu wa Taatù Wanyì mùdi màbàlaasà àbúngì,” wêwè kùyì mwimànyike bwà kulonga, kusambila, udi mufwànyine kudisangana mu cimvundù. Nwamònu anyi? Kàdi túngunukà ànu ne kusambila. Nzambì ùtu misangu yònsò ànu ùcívwiya cilelèlè, cyôci cìfùmuna kùdi Nzambì.

⁵⁹ Mpindyewu, Yone ùdi ùmvwiya dishintuluka ne dil-... mùshindù ùlwalwadi... Anyi, yèyè kèna ùcyumvwija to, kùmdi Peetèlò ngudi ucyumvwija. Yone wàkamba ànu ne: “Ngaakamòna Maulu Mapyamàpyà ne Buloba Bupyabùpyà; maulu à dyàmbedi ne buloba bwà dyàmbedi byàkajìmina. Kakùcívwa kàbìdi mbù to. Mémè Yone ngàkamòna Cimenga cyà cijila cipweka cìfùmuna kùdi Nzambì mu Dyulu, cilongolola bu Mukàji-musèla mulengejela Bàyendè.” Kàdi, tudi twalukila ku Peetèlò Mwibìdi mpindyewu bwà kujandula, Peetèlò ùdi ùmvwiya mwikalà nshintùlùkìlù ewu mwà kulwa. Mpindyewu, bu nwènù mwà kutàngila cívwa Yone mwàmbe, bidi byùmfwika bu ne: “Bwalu maulu à dyàmbedi ne buloba bwà dyàmbedi byàkajìmina,” bibùtùdiibwe. Nwamònu’s, dìbà adi, aci’s cidi cyumvwika cyà pabwàci be. Nànku aci’s ke cidi cintuuta mémè, nènku mémè kutwàdija kukeba mwàkù: “kujìmina.” Nènku, mpindyewu, kàdi mbitòòke tòò bwà ne bwònsò bàbìdi aba, mùpostòlò ne mupròfetà, bàvwa bààkula bwà cintu cìmwècìmwè aci.

⁶⁰ Nènku mpindyewu, kàbìdi, mu Mukàndà wà Yeshàayi, mpindyewu, munùdi baswè kufùnda Mifùndu eyi, mu Yeshàayi 65:17. Yeshàayi, wàkula bwà Bukalenge bwà bidimu cinunu,

bidimu cinunu byà diikisha bwà—bwà cisàmbà cyà Nzambi abi. Yeshàayi wàkacyàkula, ne wàkamba ne: “Ndi. . . Kùvwa. . . Bintu byònsò byà kumpàla abi bikaavwa bimanè kupita,” ne mùshindù wibakàbu nzùbu, kusòmbamù. Bu ne tuvwakù ne dîbà. . . Pàmwàpa tudi twangata ànu dîbà ne—ne tubala cyòci eci katanci kakesè cyanààna, Yeshàayi 65, nènku tubalàayi ànu bwà tusunsa tukesè cyanààna kaaba aka. Nènku’s ke cyòci eci, cyà bushùwà, bwètù twètù. Mpindyewu, bwà kubanga, Yeshàayi 65:17.

Nènku, mònaayi, ndi mfùka maułu mapyamàpyà ne buloba bupyabùpyà: . . .

⁶¹ Mpindyewu, Yeshàayi, mupròfetà awu, ùvwa umwe wa ku bapròfetà wakafùnda ànu menemene Bible mujimà mu cipròfetà cyèndè. Ùdi ùbanga ne bufùki; munkaci mwà Mukàndà wèndè, lwà ku nshapità wa 40, ùdi ufika ku Yone Mubàtiiji, Dipungila Dipyadìpyà; ne wîya koobeka apa, mu Mukàndà wèndè, mu Bwàkabuulwibwà, mu Bukalenge bwà bidimu cinunu. Kùdi mikàndà makùmi àsambòmbò ne yisambòmbò mu Bible, ne kùdi nshapità makùmi àsambòmbò ne yisambòmbò mu Yeshàayi. Wàkafùnda mèyi à dyela nsèka pa cintu cyònsò mu kaabujimà.

⁶² Mpindyewu, tudi tusangana, mpindyewu mwab’ewu ùdi ku nshapità wa 65, mukwàbò nshapità umwe, nènku ùdi wàkula bwà Bukalenge bwà bidimu cinunu. Cìmònaayi, mùdici cilenga’s.

. . . mònaayi, ndi mfùka dyulu dipyadìpyà ne . . . buloba bupyabùpyà: nènku bintu byà kumpàla kabýàkuvulukiibwa to, anyi kulwa mu meeji to. (Bidi ne cyà “kujìmina.”)

Kàdi ikàlaayi—ikàlaayi nwènu ne disànka ne cyònkòmokàayi. . . nànsha mu cìndi mufùke: bwalu, mònaayi, ndi mfùka Yèlusàlèmà mmwenza dicyònkòmoka, ne cisàmbà cyèndè disànka.

Nènku nèncyonkomokè mu Yèlusàlèmà, ne nsànkila mu cisàmbà cyànyì: ne dîyì dyà mwadi kadyàkumvwikamù kàbìdì to, bwalu. . . nànsha dîyì dyà mwadi.

Kakwàkwikala kàbìdì kubangila ànu apu. . . mwànà wa matùkù makesè, ne. . . muntu mukùlumpe udi kàyì mukùmbaje matùkù èndè nànsha: bwalu mwànà neáfwe ne bidimu lukàmà; ne ngènzàmpèkàatù wa bidimu lukàmà neáfundiibwè. Pashìshe nekwikalè. . .

Ne nebùbakè nzùbu, ne nebàsombelèmu; ne nebàkunè madimi à mvinyò, ne nebàdye mamuma àayi.

Kàdi kabààkwibaka, bwà mukwàbò kusòmbayèmu to; (mbwena kwamba ne, ferme webè awu, mwanèèbè wa balùme ùmupyàna, anyi bàmwè bàà ku bapyànyì

bèèbè). . . kabààkukùna mucì, bwà mukwàbò kudyà ku wòwò to: (bàdi bàdikùnyina micì ne bàshààlamù; bàdi ne Mwoyi wà Cyendèlèlè). . . bwalu bu mùdì matùkù à mucì ke mùdì matùkù à cisàmbà cyànyì, ne bule bwànyì. . . basungula bàànyì nebàsanke ntàntà mule bwà midimu yàbò yà byanza.

Kabààkukwàta mudimu mukolè bwà pàtupù nànsha, anyì bàlela bwà lutàtu to; bwalu bwòbò bàdi dimiinu dyà babènèshìibwe bàà MUKALENGE, ne bàna bààbò balela nebùikalè naabò pàmwè.

⁶³ Mpindyewu mònaayi ne, mwaba ewu ke wùngààya kafika, paanyimà pàà katancì.

Ne nebyènzekè ne, kumpàlà kwà kubùikilabò, mémè nèngàdamunè; ne pàcidibo bààkula apu, mémè nèngùmuvwè.

Nèngu mbwa wa diitu ne mwànà wa mùkòòkò nebàdiilè pàmwè, ne nyama wa ntambwe neàdye mashinda bu cimpàngà cyà ngombe: . . . lupwishi ki lwikalà cyàkudyà cyà nyòka. Ne kabààkwenzelangana bibi anyì kushebeyangana mu mikùnà wànyì wònsò wà cijila awu to, mùdì Mukalenge wàmba.

⁶⁴ Mulayi kaayipu's wè, wà bapòfetà aba ne beena meeji banène, balongeshi bàà Bible aba, kale menemene mu matùkù à kale awu, pa kumòna Ditùkù dyà butùmbi edi dilwa!

⁶⁵ Ku mifundu eyi, muntu kampànda mmufwànyine kwela meeji, anyì kwikala mulombòdiibwe, èyowà's wè, bwà kwitabuuya ne kabùlungù buloba, mu kaabujimà, nekàbutudiibwè: “Ndi ngèza Dyulu Dipyadipyà ne Buloba Bupyabùpyà,” nwamònu's, ne maulu neikalè mayè ne buloba nebwikalè buyè, bubùtudiibwe kashidi. Kàdi dilonga dyà sheemàsheemà, ne dikwàcisha dyà Nyumà Mwimpè, tudi mwà kumòna Bulelèlè bwà cyòci eci; nèngu ke mutùdi tubwela.

⁶⁶ Cidi ànu bibwàshibwàshì bidì bibùnyùngùlùkile, ne mpèkaatù udi pa buloba awu, biikala mwà kubùtudiibwa. Nwamònu anyì? Mpindyewu, tudi bamanyè ne maulu àdi ùmvwija “bibwàshibwàshì byà muulu.” Nwamònu anyì?

⁶⁷ Cidi cyenza cinyi? Pa díbà adi cidi, mingòngà eyi, ne màsaamà, ne lufù, ne bidìidi, ne balùme babiipe, ne bakàji babiipe, ne nyumà mibi, byònsò nebiye ne nebìbutudiibwe. Nwamònu anyì? Bikèngela cyènzekè mùshindù awu, bwalu netwikadilè ne mwoyi ànu kaaba aka mene. Netùjaadikè aci ne Bible. Apa mene ke patwàsòmbelè. Mpindyewu mònaayi ne, mingònga, twishì, màsaamà wònsò ne bikwàbò, nebyùmushiibwè byònsò nkòong. Byònsò ebi, diikalaku dyàbì didì pa buloba mpindyewu edi, ndongolwelu myenza kùdì bantu eyi, bidìidi, mpèkaatù, nyumà mibi yà mìshindù yònsò yidì myonèshe buloba, ne maulu wònsò àdi kuulu kwètù eku aa,

mmoonsha kùdì nyumà mubi. Mpindyewu netùye mu ndòndo ne mu bule, mu eci, nwamònu's.

⁶⁸ Byònsò ebi bìdi mu maulu, anyì mu bibwàshìbwàshì, ne buloba bùdiku mpindyewu ebu. Buloba ebu mbulame bintu abi, kàdi kabwàkenjiibwa bwà kiipacila aku to. Mpèkaatù ngwàkabùfikisha ku diikala mùshindù awu. Nwamònu anyì? Bùvwa bwenza kùdì Nzambì, Mufùki awu. Kàdi byònsò . . .

⁶⁹ Ne mibidi yètù yònsò, yitùdimu ne mwoyi mpindyewu eyi, yàkatèèkiibwa pa buloba pàakabùfùkà Nzambì, bwalu nudi bapàtùkile ku lupwishi lwà buloba. Byònsò bìvwa bitèèkiibwe pambèlu apa. Pàvwà Nzambì Yèyè mwìnè ùbùfùka, wèwè uvwa mu meeji Èndè. Ne munda Mwèndè, wa Cyendèlèlèlè Munène awu, mùvwa meeji, àdi cyambiibwà Cyèndè.

⁷⁰ Nènku mpindyewu mpèkaatù ke wakenza ne byònsò ebi byènzekè. Kàdi Nzambì, mu cikondo eci, ùdi munkaci mwà kukùngwija bintu Byèndè.

⁷¹ Sàtaanà ùcidi ànu kaaba aka. Ki bwà cinyì bintu byònsò ebi bìdi byènzeka. Yèyè ùcidi ànu kaaba aka, ne makolè èndè mabì wònsò awu àcidi ànu kaaba aka. Mònaayi ne, ki bwà cinyì buloba mpindyewu mbukooyike bikolè be. Ki bwà cinyi macimbu ne bintu byà lukutukutu bìdi byènzekà ebi; byà dyela mashi paanshì, mvita, bìdiidi, mpèkaatù, masandi, bukooyà bwà mùshindù yònsò bìdi bitùngunuka ebi, mbwalu Sàtaanà ke udi mukòokeshi wa buloba ebu ne cibwàshìbwàshì eci.

Wèwè udi wamba ne: “Cibwàsh-. . .?” Èyowà's, mukalenge!

⁷² Maulu ne buloba byònsò bùbìdi bwàbì mbitàpile twìshì ne démons yìdi mwà kutùfùnda kumpàlà kwà Nzambì ayi. Yesù ùdiKù bwà kutwàkwila. Nwamònu anyì? Pàcidi bafùndi kacya bàatufunkuna munu ne: “mbenze *cikampànda*, mbenze *cikansanga*, mbenze *cikankènga*,” kàdi's Mashi àcidi ànu abwikila. Wàkalwa bwà kupikula Basungula bààkaDyànjlàyè kumòna abu. Ki bwà cinyì mbukooyike menemene leelù ewu.

⁷³ Apa, mùpostòlò, mu Peetèlò Mwibìdi mwaba ewu, nshapità mwi2, ku mvensà mwi5 ne ku . . . ne ku mvensà mwi5 ne mwi6. Èyowà, ngaamupeci. Ùdi wàkula bwà bitùpà bisàtù byà buloba. Nwamònu's, yèyè—yèyè ùdi wàngata bitùpà bisàtù byà bwòbo abu. Mònaayi mùdiye ùbitwàla.

⁷⁴ “Buloba bwà kale bwàkapàtukila mu mâyi,” mpindyewu, aci cìvwa mbuloba bwà kumpàla kwà mvùlà yà Noà.

⁷⁵ Mpindyewu, ebu bùdiku, buloba bùdiku mpindyewu butùdi basòmbèlemù mpindyewu ebu, ùbùbiikila ne “mbuloba.”

⁷⁶ “Buloba bwà kale bwàkapàtukila mu mâyi abu,” Genèsè 1:1. Mpindyewu ne “buloba” bùdiku mpindyewu ebu. Nènku pashìshe, kàbìdi, ùdi ùtèèla bukwàbò ne: “buloba bùcilwalwà,” Buloba Bupyabùpyà. Buloba pàsàtù; bitùpà bisàtù byà buloba.

⁷⁷ Kàdi mònaayi mùdi Nzambi ùtùtòokeshila tòò ndongamu Wendè wa bupikudi. Kaa, eci kàdi kusalula musùukà wànyì pangàakacimònà, mùshindù wùdiYe ùtùtòokeshila mwab'ewu ndongamu Wendè wa bupikudi mpindyewu. Mpindyewu fwànyikijàayi citùdi tumòna ne mèsù etu twètù miinè. Cìdi Nzambi mwenze bwà kupikula buloba Bwèndè, Yèyè mmwènze ndongamu umwèumwè awu bwà kupikula cisàmbà Cyèndè, bwalu Nzambi utu kàyì ùshintuluka awu kàyákushintulukakù nànsha mu umwe wa ku ndongamu Yèndè anyi mu cinyi ní ncinyi to. Ncintu cyà butùmbi kaayipù's wè!

⁷⁸ Mùshindù mene wàkatùlombolàYe kùdiYe, too ne ku dyenza tabernacle munda mwètù, ku bitùpà bisàtù byà ngàsà; ànu mùdiYe mulombole buloba mu bitùpà bisàtù, bwà kulwa pa buloba. Ànu mwàlwà Nzambi pa buloba paanyimà pàà bumanè kupicila mu bitùpà bisàtù bishiilàngànè byà dikezudiibwa, ke mùshindù awu menemene wùdiYe ùlwa kutùdi mu bitùpà bisàtù byà ngàsà. Ntu mulongèshe cyòci aci ku cibangidilu; kacya ncitukù mwanjì kushintulula to, kacya ànu kwònsò aku. N'Diyi dyà Nzambi.

⁷⁹ Nudi ne cyà kulamina isàtù yènu ayi pàmwè, mwandamutekètè yènu ayi, dikumi ne yibìdi yènu ayi. Nomba yà mu Bible yidi ne cyà kwikala mipwàngàne cyanààna neùpetè cimfwànyì cyèbè aci cisopàkàne. Wèwè kùyì mwà kucyùmwa to, tùngunukà ànu ne kusambila. Ùtàngilè, necinwànganèmu, ànu pòpyopyò. Nzambi mmupwàngàne mu isàtù. Nwamònu anyi?

⁸⁰ Mònaayi: “buloba bwà kale,” bwà kumpàlà kwà mvùlà yà Noà; ebu “buloba” bùdiku mpindyewu ebu; ne bùcilwalwà Abu.

⁸¹ Mpindyewu, citùpà cyà kumpàla cidiYe ùtùfikishakù... Nwamònu's, ndongamu Wendè wa bupikudi ùdi ànu umwèumwè awu menemene ku bintu byònsò. Ùdi ùkwàta mudimu ne ngenzèlù umweumwe awu. Kacya Yèyè kàtukù ùshintuluka to. Wákamba, mu Maalàki 3 ne: “Ndi Nzambi, ne Ncitu nshintuluka to.” Pa nànk, mùshindù wùdiYe ùcyenza, piikalàbi ne Yèyè wàkasungila muntu wa kumpàla wàkasungilaYè awu, ku Mashi meela paanshì à Kampànda uvwa kàyì mwenzè bwalu, Neikalè nè cyà kusungila udi ulonda; ne ewu yònsò udiYè ùsungila awu bikèngela biikalè mùshindù wùmweumwè awu.

⁸² Piikalàbi ne Yèyè wàkondopa muntu kampànda dībà kanà dyònsò mu lwendu lwà mwoyi elu; biikalè ne mmu matùkù à Yesù, à bàpostòlò, à bapròfeta, dībà kanà dyònsò divwàbi adi; pàdi ngiikadilù yimwèyimwè ayi yimwèneshiibwa, Yèyè's mmwenzèjìbwe bwà kucyènzulula kàbìdi. Ncyà bushuwà. Yèyè kàtu ùshintuluka to. Muntu ùtu ùshintuluka, cikondo citu cishintuluka, bikondo bitu bishintuluka, cipungu citu cishintuluka, kàdi Nzambi ùdi ùshààla ànu umweumwe awu.

Yèyè mmupwàngàne. Nditèkemena kaayi òwà aci ne cyà kupèèsha babèèdi's wè!

⁸³ Piikalàbi ne Yèyè ùkaadikù mwondope muntu kampànda, Ùdi ne cyà kwondopa kàbidi pàdi ngiikàdilù yimwèyimwè ayi yimwèneshiibwa. Yèyè ànu, ànu musùngile muntu kampànda, Ùdi ne cyà kucyènza pa bishimikidi bimwèbimwè byàkacyènzèlèYe musangu wà kumpàla abi. Piikalàbi ní Ùtu muujè muntu kampànda ne Nyumà Mwimpè, bikèngela Àcyènzè pa bishimikidi bimwèbimwè byàkacyènzèlèYe musangu wà kumpàla abi's. PiikalàYe ní wàkabiisha muntu kampànda mu lukita, bikèngela Àcyènzè musangu mwibidi, ne musangu mukwàbò wònsò, pa nshindameenu umweumwe awu.

⁸⁴ Yèyè kàtu ùshintuluka to. Kaa, ditèkemena kaayi didici cimpèèsha's wè! Ncinyi ciinè aci? Kí mmu dilongesha kampànda dikwatakaja kùdi bantu to, cintu kampànda cidi bisumbù byà bantu bidisangishila to; kàdi Dìyì Dyèndè didi kadiyi mwà kushintuluka adi.

Wèwè udi wamba ne: "Aci m'Bulelèlèlè anyi?"

⁸⁵ Yèyè wàkamba ne: "Dìyì dyà muntu yònsò diikalè mashimi, kàdi Dyànyi diikalè dilelèlè." "Bwalu mauu ne buloba nebijiminè, kàdi Dìyì Dyànyi kadyakupangilaku nànsha." "Mufundu wònsò mmufidiibwe ku disonsodiibwa, ke bwà cinyi mmwimpè ne ùkwàcisha bwà kulongesha." Nèku vùlukàayi ne: "Mufundu wònsò neùlè," kantu ne kantu Kààwù.

⁸⁶ Mònaayi mùshindù ùdi Nzambi ùtùtòokeshilaci. Nèku bu ne aci kacivwa dishindika di—dinène, dimpè. . . dibènesha dinène, dyà dinanga dyà kùdi Nzambi's! Pàndi mmòna cyòci eci, ne ncimòna kacya ku bwànà, musangu wà nanzànzà wàkawkàtakù Kilistò naanyi mudimu, ncicidi misangu yònsò ànu ndongesha bitùpà bisàtù byà ngàsà abi. Mònaayi ní kí mbilelèlè mpindyewu's.

⁸⁷ Mpindyewu, cidya cyà kumpàla cidi "nkanyinganyinga kumpàla kwà Nzambi." Ne pashishe cidi cilonda paanyimà pàà cyòci aci, ndibàtiiza dyà mu màyi, "dibàtiiza dyà mu màyi," "Nyingàlalaayi, nùbatijiibwè mu Dìna dyà Yesù Kilistò." Nwamònu's, dibàtiiza dyà mu màyi didi dilonda, bileeja ne kanyinganyinga aku kàvwa kashùwashùwàlè. Anyi, bwà "kulekelela" mpèkaatù yètù yà kale ayi, aci kí ncitàngile mpèkaatù ucilwalwa awu to. Cidi ànu cilekelela. "Nyingàlalaayi, nùbatijiibwè mu Dìna dyà Yesù Kilistò." Bwà cinyi? "Dilekelediibwa." Dyumusha dyà mpèkaatù wa kale kadyèna ne cididi dyenzela mpèkaatù ucilwalwa to. Cidiku ncyà ne, mpèkaatù webè awu mmuumùshiibwe, ùvwà mwenze awu.

⁸⁸ Kwèna mwà kunyingalala bwà cyàkenza Adàmà to. Kacya kùtu mucyènzè to; Adàmà nguvwa mucyènzè. Udi ànu upeta difwidiibwa dyà luse bwà byùdi mwenze. Ngiikàdilù wa kale awu ùcidi ànukù.

⁸⁹ Ngǎnjì ngàngate mboodi ewu bwà katanci kakesè cyanààna. [Mwanèètù Branham ùdi ùzòla bimfwànyì ku mboodi—Muf.] Mpindyewu, mwoyi wa muntu ngwôwò ewu. Mpindyewu, ncyèna . . . Ndi kule be ne kwikala muzòdi. Mwoyi wa muntu ngwôwò ewu; ne mwoyi wa muntu's ngwôwò ewu. Mpindyewu, ewu ùdi lwà *apa* ewu ùdi ne nyòka munda mwàwù, ki mpèkaatù's, n'yèyè ewu ne mwoyi wèndè. Ewu nùnkù ùdi lwà *apa* ewu ùdi ne nkuci munda mwàwù, udi Nyumà Mwímpè ewu, n'yèyè ewu ne Mwoyi. Èè, ewu nùnkù ewu, ùdi ne budimù, lukinu, lukùkà; ke cìdì cìbyènza, mmulùmnyànà udi kaaba aka ewu. Èè, ewu nùnkù udi lwà *apa* ewu ùdi ne dinanga, ne disànka, ne mwoyi mule; nènku Aci's ke cìdì cìcyènza, kwìnshì *eku*.

⁹⁰ Mpindyewu, paùdi ulòmbiibwa, anyì ufwidìibwa luse ku mpèkaatù yèbè, udi mwenzè ànu eci cyanààna, muumùshe *aci*. Kàdi cintu civwà cikwenzejacì aci cìcìdì ànumù. Ke muji wà kale wà bubì awu; wùcìdì ànumù. Mònaayi ne, dìbà adi udi unyingalala ne ubàtìjiibwa mu Dìnà dyà Yesù Kìlistò, bwà ne Yèyè mmùkufwile luse ku mpèkaatù yèbè. Mònaayi.

⁹¹ Dìbà adi, ciibìdì, kùlwalwa dijidiibwa, cìdì citèèka meeji ètu mu bulongàme bwà cijila, bwà kwela meeji majaalàme. Muumùshìibwe . . . dijidiibwa mmwàkù mwenza ne bitùpà bibìdì wa cyena Ngelikà, ùdi ùmvwija ne “musukula, ne mutèèkìibwa ku luseke bwà mudimu.”

⁹² Pashìishe, cìdì cilonda aci, cilwalwà ndibàtiiza dyà Kapyà ne Nyumà Mwímpè, bwà Nzambì wàmòna mwà kusòmbela munda mwètù. Nènku Kapyà kàà Nzambì kàdi kàkezula myoyi yètù ku mpèkaatù, ne kàtèèka Nyumà Mwímpè munda amu. Dìbà adi tudì tutwàla Mwoyi wùmwèwùmwè wàkatwàla *Cyòcì* eci awu, bwalu Aci's cìdì munda mwètù.

⁹³ Mònaayi ne, mu dileidiibwa dyà mu bufùki emu, pàdì mukàjì ùlela mwànà. Mwoyi wà mu bufùki ùdi cimfwànyì cyà mwoyi wà mu nyumà. Pàdì mukàjì ùlela mwànà, wa mu bufùki ewu, cintu cyà kumpàla cìdì cyènzekà ndipàtuka dyà màyi, pashìishe mashi, ne pashìishe nyumà (mwoyi). Bàbàkula kakwàcikwètù aku kàdi kukàtapa dipì, kàdi's ke kwòkò kàyaaya kàka, kèèla lubilà. [Mwanèètù Branham ùdi ùtuuta cishondo—Muf.] Màyi, mashi, nyumà.

⁹⁴ Nènku mpindyewu pàdì mwànà ùlediibwa mu Bukalenge bwà Nzambì, ùdi ùlwa mùshindù wùmwèwùmwè awu: màyi, Mashi, Nyumà.

⁹⁵ Mpindyewu mònaayi, dijidiibwa, citùpà ciisàtù . . . citùpà ciibìdì cyà cyòcì aci, dìdì dìkezula meeji; dìdì dītèèka mwoyi, meeji à mu mwoyi, mu bulongàme bwà cijila.

⁹⁶ Muntu ùdi mwà kunyingalala ku mpèkaatù kàdi ùcìdì ànu welanganakù meeji à . . . Èè, pàmwàpa yèyè ùdi mu—mulùme wa masandi, dìnà mukàjì yònsò wa mmwènekèlu wa masandi udiyè upeta awu, ùdi ùdyèlapù. Pàmwàpa mmukwàciki wa

maalà; musangu wònsò wùdiye ùmvwa mupùùya wà maalà, ùdi ùdyèlapù. Nwamònu anyi?

⁹⁷ Kàdi pashiishe pàdiye ùjidiibwa, aci cidi cìsukula cìpàtula dijinga adi munda mwèndè. Nwamònu anyi? Cidi cyùmusha dijinga dyàcì adi. Ùcidi ànu mwà kuteeciibwa, kàdi Yèyè ùdi ùmusha dijinga dyàcì. Nànsha nànkù, kí mmwanjì ànu kwikala mujaalàme to.

⁹⁸ Pashiishe, yèyè ùdi ùbàtijiibwa ne Nyumà Mwímpè ne Kapyà. Musukula, mwosha, mukezula; ne pashiishe mutèèka ku mudimu wà Nzambi.

Dijidiibwa òtu ànu òmutèèka ku luseke *bwà* mudimu.

⁹⁹ Nènku mònaayi ànu menemene mùdì cyòcì aci cìlwa, mikenji mùdìyi milwà. Martin Luther, dibingishiibwa; John Wesley, dijidiibwa; beena mpenta, dibàtiiza dyà Nyumà Mwímpè. Mikenji ayi, ke mùdiku kawùyi mwà kwikala kàbìdì bikondo bikwàbò byàyi to, nwamònu's. Tukaadi ku cikondo cyà nshìikidilu. Bitùpà bisàtù. Dibàtiiza ndìdì dikezula mwoyi ne Nyumà Mwímpè.

¹⁰⁰ Mùshindù mwinè wùdìbi byà bikòka ntèmà mpindyewu's, Yèyè ùdi wàngata mwaba wutwikale ne cyà kusòmbelamù awu, ùwùpìcisha mu bitùpà bìmwebìmwè abi.

¹⁰¹ Mpindyewu, Yèyè ùdi ùbìikidila Èkèleeziyà ku dibingishiibwa, ùMubiikidila ku dijidiibwa, pashiishe ùMuuja ne Nyumà Mwímpè ne Kapyà. Ki Yèyè kuMupìcishila mu njila wa kulonda, bwà Yèyè Mwinè, Nyumà Mwímpè Yèyè mwinè, Mwànà wa Nzambi awu, wàmòna mwà kusòmbela mu mwoyi wà muntu. Mpindyewu, bikèngela Àpicilè mu byòbì abi kumpàlà kwà Yèyè kumòna mwà kubwelaMù.

¹⁰² Mònaayi ne, Yèyè wàkenza buloba, mwikala Mukàji-musèla awu mwà kusòmbela amu, mùshindù wùmwèwùmwè awu, ndongamu Wendè umweumwe wa—wa lupàndu awu.

¹⁰³ Mònaayi buloba bwà kumpàlà kwà mvùlà yà Noà. Yèyè, paanyimà pàà bumanè kunyingalala, ku Mukàji-musèla wa ditùkù adi, Noà, Wàkabùpèsha dibàtiiza dyà mu màyi, kubùwikidija ne màyi. Pashiishe, dibingishiibwa, munkacì mwà kuleeja ne Yèyè Ùdi mu njila bwà kubìikila buloba bùdì budìshinde, kubangila ku Edènà abu, kubwàluja ku dyakalujiidiibwa dyàbù cyàkàbìdì.

¹⁰⁴ Pashiishe ke Kilistò kulwa ne kwelapù Mashi Èndè, ùbùkezula ne ùbùnana. Nwamònu's, aci's ke buloba butùdì basòmbèlemù mpindyewu ebu.

¹⁰⁵ Nwamònu mwàkateeta Sàtaanà, mu Mifundu emu, bwà kuMufikisha ku dinyangakaja ndongamu wa Nzambi bwà kubùpeta, kuMupèèshabù pàakayàye Nendè kuulu kwà mukùnà, ne kuteeta bwà kuMupèèshabù kakùyi difuta dyà mushinga wa Mashi?

¹⁰⁶ Nukààvwakù bamòne mùvwà Abraham, pàakateetàbo bwà kumupèèsha buloba abu, ne wàkabùsùmba ne nshekèlè yà mfrangà búngì kampànda, kumpàlà kwà bantu, bu cimanyishilu, bu bujaadiki anyi? “Bimanyike leelù ewu ne ndi musùmbe mwaba wà majambu ewu.” Nwamònu’s, muwùsùmbe! Kàdi Sàtaanà kuteetayè bwà—bwà kuMupèèsha bukalenge bùdi bwèndè bwà mpindyewu abu. Wàkateeta kuMupèèshabù bu ditàpishi, kàdi Yèyè kàakaswa kubwàngata to. Bwalu bidi ne, nwamònu’s, díbà adi Sàtaanà úvwà mwà kutùngunuka ne kwikalapù ne díyì. Kàdi, bùvwa ne cyà kusùmbiibwa. Amen. Yèyè úvwà Díyì mu kaabujimà kàadi. Kabàvwa mwà kuMuseeswishamù to.

Dìbà adi, bikèngela mpindyewu bwà kupetabù dibàtiiza dyà Kapyà.

¹⁰⁷ Nwamònu’s, bùdi mpindyewu...Cìdi cyenzèke ncinyi? Kilistò wàkalwa ne wàkabiikila Èkèleeziyà ku kanyinganyinga, dibàtiiza mu Dìna dyà Yesù Kilistò, bwà dilekelediibwa; kujidila Èkèleeziyà; nènku ne Kapyà kàa Nzambi kutùùluka bwà kwosha manyaanu wònsò, ne kulwa kusòmbela mu mwoyi wà muntu.

¹⁰⁸ Mpindyewu, buloba, bwà kupikudiibwabù bwà muntu mupikùdibwe ewu, Yèyè ùdi ùkwàta mudimu ne ngenzèlù Wendè umwèumwè awu. Yèyè wàkabùbàtiiza mu màyi, paanyimà pàa kabùtù kàa mvùlà yà Noà. Wàkabùmacishila Mashì Èndè pambidi, bwà kubùjidila ne kubùnana. M’Bwèndè Yèyè.

Sàtaanà wàkateeta kwamba ne: “NènKupèèshèbu.”

¹⁰⁹ Yèyè ne: “To, mukalenge, Nèmbùsùmbè.” Kwikalè ntèmù. Yèyè wàkabàndishiibwa kuulu, bu cimanyinu, cyà ne Yèyè wàkabùsùmba. Wàkabùfidila mushinga.

¹¹⁰ Kàdi mpindyewu bikèngela bùpicilè mu dibàtiiza dyà Kapyà, Kapyà kàa cijila kàa kùdi Nzambi, kàdi kàkezulà buloba ne mauu àdi mabùnyùngùlùkile awu. Dìbà adi, mbufidila mushinga bwà bapikula bààmòna mwà kusòmbelapù, kusòmbelamù mu ditalala. Mònaayi ne, dibàtiiza dyà Kapyà didi mbwà kubùkezula ku mpèkaatù, ku disaamà, ku twìshì twà disaamà, ku bangènzàmpèkàatù, ku dyabùlù ne cisùmbù cyèndè cyònsò. Ùdi ne cyà kwipaciibwa, kwediibwa mu Dijiba dyà Kapyà. Kapyà kàa Cijila kàa kùdi Nzambi, kàtùùluka kàfùmina kùdi Nzambi, mu Dyulu, ne kàbwòsha butubutu, mònaayi ne, mbwà kubùlongolola bwà Nzambi kusòmbelamù. Bwalu, Nzambi, mu Buloba Bupyabùpyà bùcìlwalwà abu, ùdi ne cyà kusòmbela pa buloba. Bwalu, wèwè udi wamba ne: “Nzambi, Yèyè ùtu ùsòmbela mu mwoyi wà muntu.” Kàdi, Yèyè ne Mukàji-musèla bàdi bàlwa Umwe, ne bàyaaya ku Cisòmbedi cyàbò mu Buloba Bupyabùpyà. Nènku ndongamu umwèumwè wa bupikudi awu ngudi mukwàta nendè mudimu bwà kupikula, byònsò bìbidi, buloba ne bantu bàdi bàsòmbemù.

¹¹¹ Nwamònu's, bikèngela mwoyi wùsukudiibwè mùshindù awu. Kumpàlà kwà Nzambi kubwela mu mupersonà wa Nyumà Mwímpè, udi mwikàle Kilistò ùpweka ne ùsòmbela mu mwoyi wà muntu, ùdi dyàmbedi ne cyà kwikala munyingàlèle. Ùdi ne cyà kubàtijiibwa mu màyi, mu Dìnà Dyèndè, bwà kuleeja ne yèyè awu ngwa nganyi.

Pashiishe ùdi ne cyà kukezudiibwa kùdi Mashi à Yesù.

¹¹² Ne pashiishe Kapyà kàà cijila ne Nyumà Mwímpè, byà kùdi Nzambi, bidi bìpweka ne byòsha dijinga dyònsò dyà mpèkaatù, ngiikàdilù yònsò wa buloba. “Nènku, kì bwà cinyi, ewu udi wenza mpèkaatù ne budiswile bwònsò paanyimà pàà mumanè kupeta dimanya dyà Bulelèlà awu. . . .” Pashiishe, kàbìdi Bible mmwambè ne: “kabyèna mwà kwenzekakù to. . . .” “Bwalu, mu—muntu udi mulela kùdi Nzambi kèna mwà kwenza mpèkaatù to; kàtu wènta mpèkaatù to.” Kakwènakù mùshindù wà kwenzayè mpèkaatù to. Mmunyi mùdiye mwà kwikala ngènzàmpèkàatù, ne mupikula, musangu wùm wèwùm wè awu? Mmunyi mùndi mwà kwikala mu nzùbu wa dyeyeka bintu, ne pambèlù pàà nzùbu wa dyeyeka bintui, ànu musangu wùm wèwùm wè awu? Nwamònu anyi? Kaa, Yèyè wàkatùpikula ku Mashi Èndè; ku Nyumà Wendè Yèyè kutùkezula; ne pashiishe kulwa bwà kusòmbela munda mwètù, Èkèleeziyà. Kàdi, kì ndingumba to; Èkèleeziyà!

¹¹³ Mònaayi ne ntèmà mpindyewu patùdi twangata cyòci eci apa, myaba yitùdi ne cyà—cyà kusòmbelamù. Mpindyewu, mpindyewu, kanyinganyinga kàà—kàà kumpàlà kwà mvùlà yà Noà, dìbà adi, kàakatwàla dibàtiiza dyà mu màyi. Pashiishe ke Kilistò kulwa ne kwela Mashi Èndè pa bwòbù abu, bwà kubùkezula ne kubùnana. Nènku pashiishe kùlwalwa, cidi cìlonda, kabùtù kàà buloba bwà mpindyewu ebu.

¹¹⁴ Mpèkaatù yònsò udi mu maulu muulu awu: “yèyè ùdi mfùmù wa bukolè bwà mu mpeepèlè,” ùdi ùpangisha (ùlwangana bwà kupangisha) mabènesha à kùdi Nzambi. Mwómò amu mmùdi mikungulu ya mikenyi yilwa ne yituuta buloba, ne bikwàbò byònsò, byùmukila mu maulu, mvùlà yà mabwe à nêjè, ne mvùlà yà kajoomona, kajoom-. . . mvùlà yà bipeepèlè bikolè ne bikwàbò byònsò, “bifùmìna muulu,” mbwena kwamba ne kùdi Sàtaanà, “mfùmù wa bukolè bwà mu mpeepèlè.”

¹¹⁵ Mònaayi ne, mònaayi mwàkateetà Sàtaanà bwà kubwàngata, mungàmbi mu katanci kakesè emu, mu kubùpèesha Yesù kàkùyì dibùsùmba to. Pashiishe, Sàtaanà ùcidi ànu mutungùnùke ne kunana, bwalu mbutwà cimanyinu, nwamònu's. Kàdi Yesù ùdi ùbùsùmba ku Mashi Èndè meela panshi ne ùbwàluja kùdi mwenabù mulelèlà. Nwamònu anyi? Ke mùsindù wàkatùsùmbaYe awu's, ku Mashi Èndè, mùshindù wàkasùmbaYe Èkèleeziyà.

116 Nènku mpindyewu dibàtiiza dyàbù dyà Kapyà didi dibùkezula ku twishi twònsò, màsaamà àbù wònsò, màsaamà wònsò, nànsha mene bintu byònsò byà nyumà; bìdì kutùdì abi, kàbìdì, bìdì byènzeka mùshindù ùmwèùmwe awu; bwà kubùlongolola bwà Nzambi kusòmbelayemù, mu cikondo cinène cìdì ne cyà kulwa eci, Buloba Bupyabùpyà. Nwamònu's, Ùdì ùbùpikula mu mùshindù ùmwèùmwe wùdìYe ùpikula cisàmbà Cyèndè awu. Ùdì ùbyènza byònsò ànu mùshidù ùmwèùmwe awu, ndongamu Wendè wa bupikudi. Bwala, Yèyè ùdì Nzambi utu kàyì ùshintuluka awu, misangu yònsò ànu umwèùmwe awu mu ndongamu Yèndè.

117 Mùshindù wungààkanwàmbilà, kumpàla, ne kunùmanyishaci, ne munda mwà bikondo byònsò ne, Nzambi kèna mwà kushintuluka to; kucìmanyisha, mishindù yònsò, mùmwèmùmwe amu.

118 Yèyè kuwùmanyisha, mukenji Wendè wà nzànzànzà, mu cikondo cyà kumpàla kwà mvùla yà Noà, kùdì Noà mupròfetà.

119 Mvwa ngààkula ne mwanèètù wa balùme munanga udi musòmbè naanyi kaaba aka mpindyewu ewu. Makèèlèlà awu, yèyè kwamba ne: “Cintu cimwèpelè cyùvwà mwambe, Mwanèètù Branham, cìtù ànu cinnyùkusha misangu yònsò.”

Mèmè ne: “Ncinyi ciinè aci, mwanèètù?”

120 Ki yèyè kwamba ne: “Cyùdì wèwè mwambè ncyòci eci,” ne ncilelèlà, “Banyààbanyà, mwikalà kasùmbù kakesè mwà kusùngidiibwa mu matùkù à Dilwa.’ Nènku tuvwa twakula bwà mwàkambà Yesù ne: ‘Mushikù wà mbelu mmubùmbàkàne ne njila mmubùlàkane, nènku nekwikale ànu bakesè bààmupetà.’ Mpindyewu mònaayi ne, Bible mmwambe ne: ‘Ànu mwàkadibi mu matùkù à Noà mwàkasùngidiibwà misùkà mwandamukùlù ku màyi, ke mwikalàbi kàbìdì ku Dilwa.’”

Mèmè kwamba ne: “Mwanèètù, udi wèwè ànu ne. . .”

Yèyè kwamba ne: “Vùlukàayi ne, kùdì misùkà ànu mwandamukùlù mwaba awu.”

Mèmè kwamba ne: “Udi wèwè ànu ne cyàbìbìdì cimwè cyà cimfwànyì.”

121 Nànsha nànu, Noà wàkadi cifwànyikijilu cyà bashààdile bààkatùtumunyìibwà, kì mmusùmbà wa bantu bambwibwe to. Henòkà, muntu umwèpelè, wàkaya mu Dyambwibwa kumpàla kwà dipaasalala dyà màyi adi kulwadi, bileeja ne Èkèleeziyà kèna ùbwela mu dikèngà dinène anyi ní ncinyi mu nyùngulukilu amu to. Henòkà wàkashintuludiibwa, muntu umwe. Kaa, èkèleeziyà ùdì mwà kwikala musùmbà; kàdì Mukàji-musèla neikalè kasùmbu kakesè kùikalà mwà kwenza Mukàji-musèla. Mpindyewu, èkèleeziyà ùdì mwà kwikala musùmbà munène; kàdì, Mukàji-musèla, nudi numòna's, fwanyikijaayi mwandamukùlù ne umwèpelè. Mushààdile

misangu mwandamukùlù, ke mwikala Mukàji-musèla, mushàadile kùdi èkèleeziyà.

122 “Nènku pìikalàbi ne mwakàne wàkasùngidiibwa ne lutàtù, ngenzàmpèkààtù ne udi kàyì ùneemeka Nzambi nebìikalè penyi,” aba bàdi bamanyè cidi cimpè, bwà kucyènza, kàdi bàtùngunuka ne kwenza cyà nàka nànsha byà munyi? Aba bàdi bàlondà mikenji yà dìngumba pamutù pàà Dìyì abu, nebàmwènekelè penyi, bàà bwalu bàbìikidiibwa ne mbeena Kilistò, bàngata ne Dinà dyà Kilistò?

123 Mpindyewu, ànu menemene, Noà ùvwa cifwànyikijilu cyà aba bàakatuntumunyiibwà. Vùlukàayi ne, pàakapàtukà Noà, Ham ùvwa nendè. Mpèkaatù ùcivwa ànu muntwamu. Mpèkaatù wàkatùngunuka ànu ne kuya, kupicila mu bwàtù amu. Bupidyà, mpatà, byàkabwela mu bwàtù amu, byambwibwe pamutù pàà cilumbulwidi. Kàdi Henòka wàkabànda muulu kutàmba bwàtù abu, wàkaya too ne mu Bwikadi bwà Nzambi. Kàdi Noà wàkapicilamù ne kupàtuka, nènku mùvwa ànu mpèkaatù; cifwànyikijilu cyà Bukalenge bwà bidimu cinunu, bwà ngiikàdilù wa buloba.

124 Bukalenge bwà bidimu cinunu kî nndekeelu to. Nekwikalè ànu cikondo paanyimà pàà Bukalenge bwà bidimu cinunu. Bukalenge bwà bidimu cinunu bùdi ànu ncipòòlò cyà cikondo; kàdi, kî m’Buloba Bupyabùpyà to. To, nànsha kakesè. Mònaayi ne, mu cyôci aci, netùkùfikè paanyimà pàà katanci.

125 Nwamònu’s, buloba, bupikùdiibwe, bwàlukila buludì kùdi Mwenabù wa ku cibangidilu awu kàbidì. Bwàkangata... Yèyè wàkabùnyènga Sàtaanà. Yèyè kukòka, kunyènga buloba kùdi Sàtaanà, ànu mwàkakunyèngàYe kùdi Sàtaanà amu, bu mwàkanyèngàYe mukàji mukesè wa ku ciinà cyà màyi awu kùdi Sàtaanà. Ke mwakwidi awu mwimàne apu, ùdyàmbidila mùvwàye ne Nzambi, pèndè kàyì cintu nànsha cimwè to. Nwamònu anyi?

126 Ndi muswè kunùzòlelaci ànu bwà katanci kakesè cyanàànà. Mpindyewu, tudi baswè kuumvwa cyôci eci bitòòke tòò, nànku mpindyewu tàngilàayi ne ntèmà yònsò mpindyewu pa dilongesha edi. [Mwanèètù Branham ùdi ùzòla bifwànyikijilu ku mboodi mu ndambù wa tusumbù twà milongo tùdi tùlonda—Muf.]

127 Mpindyewu, eci *eci*, eci nùnkù’s n’Nzambi. Nzambi, udi wa Cyendèlèlè awu, kàyì . . . Kakwèna mukwàbò to ànu Yèyè. Kàdi, mu Nzambi amu, Yèyè ùvwa ne byambiibwà. Mpindyewu, eci *eci* cidi cileeya Dìyì, Dìyì dyà Nzambi, dyàkavwijiibwa mubidi ne dyàkasòmbela munkaci mwètù mu mupersonà wa Yesù awu adi.

128 Mpindyewu eci *nùnkù*, mulùmyànà ewu, netùmwenzè mùshindù *ewu*. Mpindyewu, *eci* cidi cibìikidiibwa ne mukàji wa ku ciinà cyà màyi. *Ewu* mmwakwidi, Mùfaalèsà. Nènku kunùdi

numòna *eci* aku, citùpà cyà mboodi cyà munda mutupù eci, cidi cyùmvwija ne ngàsà ne lupàndu.

¹²⁹ Mpindyewu: “Ku cibangidilu kwàkadi Dìyì. Ne Dìyì dyàkavwijiibwa mubidi ne dyàkasòmbela munkaci mwètù.” Bitùpà bisàtù. Dyàmbedi civwa cyambùibwà, cyàkadi mu Nzambì, cyàkadyèlelaYe meeji mwikale muntu; kàdi aci’s cyàkamutùntumuna too ne panshi bwà kwikala Yesù; nènku mpindyewu, bwà wèwè kufika Kuntwaku, wèwè ànu ní uvwa Nendè kacya kale. Bwalu, kùdi mùshindù ànu wùmwpèlè wà Mwoyi wà Cyendèlèlè, n’Nzambì; ne bivwa bikèngela bwà wèwè kwikala citùpà cyà Nzambì ku cibangidilu, kí ncyùdi usungula ànu pànwapa to. Yèyè ngudi mukusungùle. “Bwònsò bàdi Taatù muMpèèshe nebàlwe.”

¹³⁰ Mpindyewu tàngilàayi nsaserdòsè ewu kaaba aka. Tudi tusangana citùpà cyèndè cyà kwinshì, *kaaba aka*, mwoyi wèndè wa kumpàla kwà kulwayè, lwà paanyimà pèndè apu, didyanjila-kulongolola dyèndè paanyimà apa, ùdi mu mpèkaatù.

Ke ifernò ewu, lwà kwinshì *eku*.

¹³¹ Mpindyewu, katùpà kakesè kàdi munda *emu* aka, kàdi kafwànàngàne ne mboodi aka, kàdi kàleeja bukezùkè bwèndè. Yèyè ùvwa mwakwidi. Ùvwa muntu wa kuneemekiibwa. Aci civwa cileeja *eci*. Yèyè ùvwa, kabidi, bivwa bikèngela bwà kwikalayè muntu mwìmpè, bwà cyanàànà kàvwa mwà kwikala mwakwidi to. Kàdi nudi numòna mwàkacipètaye amu, civwa ndilonga dyà mamanya à mu mutù.

¹³² Mpindyewu, mukàji mukesè ewu, nsòmbelu wèndè wà kumpàla, lwà kuulu *eku*, yèyè ùvwa ndumbà, ùvwa mukooyike yèyè yònsò. Kàdi lwà munda mwèndè amu, *emu* nùnkù, ùvwakù ànu ne ndambù mukesè wa luumvu. “Ndi mumanyè ne pààlwà Maasiyà . . .” Nwamònu anyi? Nwamònu’s, aci’s ke civwà mwaba awu.

¹³³ Mònaayi ne, pàakalwà Yesù ne kumwènesha Dìyì, bwalu Dìyì dyàkajingulula meeji àvwà mu mwoyi; bu mùdi Ebèlù 4 wàmba ne nebìikale nànkù, 4:12, ne Yèyè neàjingulule meeji. “Dìyì divwa dijinguludi dyà meeji à mu mwoyi,” ne Yèyè wàkalwa bu Mwànà wa muntu, Mupròfetà awu. Cyàkenzekà ncinyi? Mwakwidi ewu, ànu ne malonga à mu mutù cyanàànà awu, kwambayè ne: “Eci’s ndémon,” bwalu aci’s ke mùvwà dingingumba dyèndè dicibìikila. Cyàkenza cinyi? Yèyè kàvwa ne cimfwànyì to, ke kumutùkijaci mu mifitù.

¹³⁴ Kàdi mukàji mukesè ewu kàvwa ne kantu nànsha kàmwè kàà kuleeja to; ùvwa ne manyaanu ne bukooya ànu ne mwèndè mwònsò. Kàdi, mònaayi ne, munda mwèndè menemene amu, yèyè ùvwa ne cimfwànyì, nwamònu’s. Nènku, dībà adi, ùvwa mwindile bwà cyòci eci kuvwijiibwaci mubidi.

Nènku pàakambàYe ne: “Ndà ùkangàtè bàyeebè kàdi ùlwe mwab’ewu.”

Yèyè ne: “Mukalenge, ncyèna nànsha nendè to.”

135 Yèyè kwamba ne: “Wám̄bi bulelèlè, bwalu ukààvwa naabò bàtaanu, ne ùdì nendè mpindyewu awu kî ngwebè to. Uvwa naabò bàtaanu. Bàdi bènza bàsambòmbò bàùvwa naabò.”

136 Yèyè ne: “Mukalenge!” (Kî nnè: “Wèwè udi,” kabiya nè, “Beelèzèbùlè to.”) “Ndi njingulula ne Wèwè ewu udi Mupròfètà. Mpindyewu, tudi bamanyè Maasiyà, udibò bàbìikila ne n’Kilistò awu, neàlwe. Ne pààlwàYe, Yèyè neènzè cyòci eci.”

Yèyè ne: “Mémè ki Yèyè awu.”

137 Kakùciyi kàbìdì mpatà to. Kabìvwa bikèngela bwà wèwè kucyùmvwija to. Yèyè wàkacimòna. Wàkaciitabuuja. Ki yèyè uyààya wàwa! Bwà cinyi? Cyàkamwenzela cinyi? Cyàkamupikula.

138 Mpindyewu tàngilààyi, Yèyè wàkalwa bwà kwikala Mupikudi. Ncyà bushùwà anyi? *Kupikula* mbwena kwamba cinyi? “Kwaluja.” Bwà cinyi Yèyè kààkangatakù mwakwidi awu’s? Kacya yèyè kàvwakù mwanji kwikala kuulu aku to. Nwamònu anyi? Nwamònu’s, kàvwakù ne cimfwànyì nànsha cimwè to.

139 Yèyè wàkalwa bwà kupikula aba bààkadi badishinde. Mu cibulà, *eci’s* civwa cisopakaja, ne nsongààkàji awu; kàdi Nzambì ùvwa nendè mu meeji Èndè kumpàlà kwà difùkà dyà dyulu ne buloba, ne Yèyè wàkalwa bwà kumuhezula. Nwamònu anyi? Dìbà adi Yèyè. . . Mukàji awu ùvwa ne Mwoyi wà Cyendèlèlè. Nwamònu anyi?

140 Pàdìbi ne, mwakwidi awu, cyàkamwenzela cinyi? Cyàkamwaluja buludi kwèndè kwàkadiye mulongolwela. Kàvwa ne cintu nànsha cimwè to, twamb’eku twamb’eku, ànu malonga à mu mutù àwu mamònàngàne.

141 Mpindyewu, wèwè mulundà wanyi tèèlejà, pìikalàbi ne cintu cimwèpelè cyùdiku pèèbè naaci cidi ànu dilonga dyà mu mutù cyanàànà, kèba bwà kupeta cintu cyà cishìilàngàne ne aci. Kàdi kwàkukùmbanakù mwà kuCìpeta pawikalà kùyì ne cimfwànyì to. Ndi ngèlè meeji ne ki bwà cinyi nudi nufùmina ku esètè ne ku wesètè, ku nord ne ku sud; Dìyì, dìdì ne mwoyi, dimwènèshìibwe.

142 Mònaayi mpindyewu mùdìYe ùmanyisha njila Wendè kùdì bapròfètà Bèndè, ku cibangidilu. Kacya Yèyè kàtukù mwanji kucishintululakù nànsha.

143 [Katùpà kàà mukàbà wà mèyì munda mutupù—Muf.] . . lupàndù. Yèyè wàkabingisha muntu; kumujidila; kutùma Nyumà Mwìmpè ne Kapyà, ne kwosha mpèkaatù mu yèyè, ne kusòmbela munda mwèndè, Yèyè mwinè.

144 Yèyè ùdi wenza buloba, bwàkwàtàYe naabù mudimu mu ndongamu wa bupikudi abu, mùshindù wùmwèwùmwe awu. Bwàkanyingalala ne kubàtìijibwa mu màyi, mu . . . kùdì Noà. Yesù wàkalwa ne kubùjidila, ku dimacishapù Mashi Èndè, ne

kubùnana. Nènku mu Buloba Bupyabùpyà bùcìlwalwà abu, bùdi ne cyà kupeta dibàtiiza dyà Kapyà dyà cijila, bwà kubùsukula ku dìnà démon yònsò, kishi kwònsò, bubèèdi bwònsò, byònsò bidiku abi, ne kubùvwija bupyabùpyà. “Mémè kumòna Dyulu Dipyadìpyà ne Buloba Bupyabùpyà.”

145 Udi ulwa muntu mupyamùpyà. Amen! Kì ng’ànù wa kale awu mulamakaja ne biteetela, ku dikashààla wa mu èkèleeziyà kampànda anyi ku diteeta kubuulula dibèji dipyadìpyà to, kàdi wèwè udi muntu mujimà mupyamùpyà ne bupya bwèbè. Nzambi ùdi wàngata muntu wa kale awu ùmwosha ànu yònsò nkòong, ne Nyumà Mwimpè ne Kapyà, ne ùlwa Yèyè mwìnè, ùpwekesha cimfwànyì cyèbè. “Muntu nànsha umwe kèna mwà kulwa kùNdi pàdi Taatù Wanyì kàyì mumukòke to. Ne bwònsò bàdi Taatù muMpèèshe nebàlwe kùNdi.” Nudi numòna bwalu abu anyi? Ndongamu umwèumwè awu; mùshindù wùmwèwùmwè awu.

146 Sàtaanà ùvwa . . . neùmushiibwè pa buloba, ànu menemene mùvwà Sàtaanà muumùshiibwe kùdi amu. Sàtaanà kèna mwà kutàcisha to; anyi, ùdi mwà kuteeta, kàdi kèna mwà kupeta mwena Kilistò mulediibwe cyàkàbìdi to. Bwalu, Nzambi, kacya ku difùkà dyà dyulu ne buloba, wàkadyànjila kumumòna, ne wàkatùma Yesù bwà kumupikula, ne Mashi àdi àkula bwèndè yèyè. Mmunyi mùdiye mwà kwenza mpèkaatù pàdìbi ne kayèna mwà kumwènèka, mene to, kùdi Nzambi? Kèna nànsha . . . Cintu cimwèpelè cidiYe ùmvwa cidi n’diyi dyèbè. Yèyè ùdi ùmòna cimfwànyì cyèbè. Amen! Aci’s ncilelèlè. Nwamònu anyi?

147 Ku cintu cimwècimwè aci, bwalu buloba bùdi cimwè cyà ku byambiibwà Byèndè ànu mùshindù wùmwèwùmwè mùdi wèwè cimwè cyà ku byambiibwà Byèndè. Buloba bùdi bùlwa cimwè cyà ku byambiibwà Byèndè, bwalu cìvwa mmeeji à Nzambi, ku cibangidilu. Kwikala ne buloba, kwikala mu Nkwasa wa butùmbi, kwikala Mfùmù, kwikala Mupikudi, kwikala Mwondopi, s’ke byambiibwà Byèndè mbyòbi abi.

148 Ànu bu cyambiibwà cyèbè. Ncyèna mwà kwamba ne—ne “dikunji” pàndi nciyi ngèèla meeji ku dikunji to. Ncyèna mwà kwamba ne “muntu” pàndi nciyi ngèèla meeji ku muntu to. Nènku pàndi ngèèla meeji ku muntu, dibà adi ndi ngàmba ne “muntu,” meeji awu ncyambiibwà cyànyì ne dyakula adi n’diyi. Nwamònu anyi?

149 Bu mùdi Yeshààyi, mmunyi mùvwàye mufwànyine kwamba, ne: “Virgò ùvwa ne cyà kwimita difu”? Meeji nciyi?

150 Mpindyewu, bààbùngì bàà kunùdi bàdi bàdikonka ne mmunyi mùtù, dijingulula adi, dilwa. Ndi nnwàmbila. Nwamònu’s, n’diyi dindì ngàmba. Nènku kì mmeeji àànyì mèmè to, bwalu ncyèna mumanyè to. Ncyèna mumanyè kwela meeji pa bwalu abu to. Mmunyi mùndi mwà kukwambila ne wèwè udi nganyì ne kùdi mufùmìne, pàndi nciyi mukumanyè? Mmunyi mùndi mwà kukwambila cyùvwà mwenze kukaadi

bidimu dikumi, pàànyì kacya ncitu mwanji kukumòna kacya bandela? Mmunyì mündi mwà kukwambila mwaba uwikalà mwà kwenza ne ciwikala mwà kwenza mu bidimu dikumi kuumukila ku mpindyewu? Mmunyì mündi mmanya maalu àcilwalwà? Kàdi's mmeeji à Muntu mukwàbò.

¹⁵¹ “Meeji àvwà mu Kilistò awu ikalè munda mwènù. Meeji àvwà mu Kilistò awu ikalè munda mwènù.” Nwamònu's, díbà adi kí mmeeji èbè to. Cikaadi mmeeji Èndè, mu wèwè amu. Nènku kwèna wamba mèyì èbè wèwè mwinè to; udi wamba patòòke Méyì Èndè.

¹⁵² Ke mùtù misangu yàbùngì bânà bèètù bapeta cibwejàkàji, mu dyumwija dyà myakulu, ne bikwàbò. Nwamònu's, bàdi bàma bintu bìdi kabìyi mu byòbi to, kabèena bafika ku dyumwiva ne aci n'Sàtaanà to. Wèwè udi wamba ne: “Mu budimi bwà Nzambì?” Indilà ànu cyanàànà too ne patwàjikijà, bwà kujandula ní kabyèna nànkù, anyì to. Bisoosa bibì ne blé bìdi bitòloka mu budimi bùmwebumwè abu. Byònsò bìdi ne mwoyi ku díbà òmwèdimwè adi ne mvùla umweumwe awu. Nwamònu anyì?

¹⁵³ “Kàdi kwòkò kampànda munkaci mwènù amu mwikàle mupròfeta, Mémè Mukalenge nèngàakulè nendè. Nènku bìdiye wamba byòbi byenzèke, díbà adi awu's m'Mémè, nwamònu's, bwalu kèna ùdyàkwila mu yèyè nànsha. Yèyè ùdi wamba patòòke meeji Àànyì, byambiìbwà Byànyì byà maalu àdi nè cyà kulwa, ne Mémè nènkwate mudimu ne mukana mwèndè bwà kubyàmbilamù. Nènku paanyimà pàà yèyè mumanè kubyàmba, bìdi ne cyà kwenzeka. Maulu ne buloba nebijiminè, kàdi Diyì Dyànyì kadyàkupangilakù to.”

¹⁵⁴ YesHàyì wàkamba ne: “Virgò neimìtè difù.” Aci's ncikose bwalu. Yèyè neimìtè difù. Cìdi Nzambì mwambe, ke cìdiYe wènza.

¹⁵⁵ Kaa, ùmanyishila, kùdi bapròfeta Bèndè, mamwèneshiibwa Èndè wònsò, bwalu cìdi byambiìbwà Byèndè byà meeji Èndè mapàtula patòòke.

¹⁵⁶ Mpindyewu, ki cyòci eci, mu mukàji mukesè ewu. Yèyè ùvwa umwe wa ku byambiìbwà Byèndè. Nwamònu anyì?

¹⁵⁷ Kàdi's ke mwakwidi wàwa, ùleeja Bukènkè. Ùvwa muBùlongèle mu Bible. Ùvwa mulonge ne Nzambì ùvwa Nzambì. Ùvwa mulonge ne cijila cìvwa cyà bushùwà. Ùvwa mulonge ne kùvwa mukenji wa Nzambì. Ùvwa mucìlongele ku mmwènenu kampànda wa mu mutù. Ne yèyè ùvwa mulediìbwe mu ndelàngànyì mijaalàme; ùvwa mwena Lewì. Kàdi ùvwa mucìmanyine ànu ku mmwènenu wa mu mutù. Nènku pàvwà Bukènkè bwà díbà adi...Nwamònu's, yèyè wàkabùyiila ku *cìvwa* cyenzèke, kí nkucìvwa munkaci mwà kwenzeka to; cìvwa cyenzèke aci's! Nènku pàakasanganàye cìvwa munkaci mwà kwenzeka, dingumba dyèndè adi kadyàkamba cintu nànsha

cimwè pa Bwalu abu to, ki bwà cinyi kàvwa ne cimfwànyì cyà Bwalu abu to.

158 Kàdi ke Mupikudi ewu pa buloba mu ciinè cikondo aci, bwà kupikula byambiibwà byà Nzambi abi, ne mukàji ewu kucipeta. Kàakeelakù mpatà to. Wàkamba ne: “Pàalwà Maasiyà, Yèyè neenzè cyôci eci,” aci kàdi kukòsaci bwalu. Ke kucimònayè cyènzeka, pa nànkù... Yèyè kwamba ne: “Mémè ke Maasiyà awu,” ki aci kukòsaci bwalu’s. Kakùcyèna kàbidì mpatà to. Yèyè wàkaya ànu cyanààna, wènda ùlondela bantu bwònsò ne: “Lwâyì, kanùmonàayi Ùndì mupetè.”

159 Nshintùlùkilù eyi yidi yitùvwija bakezùke, ntempèlù bwà cisòmbedi Cyèndè: dibingishiibwa, dijidiibwa, dibàtiiza dyà Nyumà Mwimpè ne Kapyà. Aci’s cidi cyenza dikezula dyà (wetù) ntempèlù ewu.

160 Nànkù, ànu mùvwabi ne mbùngakeenu wa buloba wa kale awu kàakabütudiibwa, kùdì màyi pàakkwoweshiibwabù apu; mbùngakeenu wa dibùlunga adi, mbùngakeenu wa kale awu, kùdì... bulaba bwònsò, bintu byònsò byàkatèeka Nzambi pa buloba abi, kabyàkabütudiibwa pàakabütudiibwa buloba bwà dyàmbedi abu to. Pèndè Bible mmwambè ne “bwàkabütudiibwa,” kàdi kabyàkabütula mbùngakeenu awu to. Byàkabütula ànu mpèkaatù ne bangènzàmpèkaatù bàvwàpu abu. Mbùngakeenu wàkashàala.

161 Kàdi, nudi numòna’s, bu dibingishiibwa, munùdì nwènù ba-Baptistes ne ba-Méthodistes baswè kwela meeji pa bwalu abu, ànu dibingishiibwa cyanààna, nwitabuuja ne biikàle babàtjiiibwe, aci kî mbikùmbane to. Newàlukilè buludi mu maalu à pa buloba, kàdi kubèbula nsukì yèbè ne kuwàla tupùtulù, ne bikwàbò byònsò. Nwamònu’s, kî nkwanji kwenzeka cintu nànsha cimwè to. Wèwè kwela ànu mèsù paanyimà ne kumòna ne uvwa mwenze bibi.

162 Dibingishiibwa dyàkenzela buloba cinyi? Kadyàkabwènzela cintu nànsha cimwè to; kubangishilulabò cyàkàbidì, mpèkaatù ànu bùngì buvwayè kwònsò eku abu. Ke mùshindù ùtù muntu wènza, ne ke kwònsò kùdiye mwà kuya kafika aku.

163 Mùshindù awu ke ùvwa ùkengela bwà mutangadiki munène awu, Billy Graham, kumònaye. Wàkamba ne: “Ndi nya mpeta bantu bakùdimune mucima binunu makumi àsàtù, dyà ngàalukila mu cidimu cimwè ncyènà mbapeta nànsha makumi àsàtù to.” Ke kwònsò kùyaayàbo kafikila aku’s. Nwamònu anyi? Nènku, cyà bushùwà, bàdi banyingalala. Ndi ngiitabuuja ne bàdi banyingalala; bààbùngì bàà kùdìbo, anyi bàmwè bàà kùdìbo, nànshakù’s. Kàdi kî ncidi cikèngelà to. Cidi cijaadika nànkù kaaba aka.

164 Mpindyewu, nànkù mbùngakeenu wa kale wa buloba awu kàvwa mubütudiibwe kùdì màyi to. Buloba bùvwa ànu

bwowèshiiibwe ne mâyi cyanààna. Bwàkapeta dibàtijiibwa dyàbù. Bwàkabàtijiibwa.

¹⁶⁵ Ke mwàshààlà mbùngakeenu awu, nànsha bwòbù mwà kooshiibwa ku Kapyà. Kakèèna kàbùtula buloba to, nwamònu's, kàdi ànu kàbutula mpèkaatù udi pa bwòbù awu.

¹⁶⁶ Mònaayi mwab'ewu, bàmwè bàà ku nwènu balongi bàà Bible, ne nangànangà Docteur Vayle udi muntàngile ewu. Mònaayi ne mu Peetèlò, mu nshapità mwi² wa Peetèlò ewu, nshapità mwi³'s wè, ùdi ùkwàta mudimu ne mwàkù “buloba,” bu mwàkù wà mu cyena Ngelikà *kosmos*, wùdi wùmvwija ne, “ndongolwelu wa buloba.” “Buloba nebùjimine, kwengulula bìdi byenza buloba ne luuyà lukolè.” Nwamònu anyi? Kabyèna biswa kumvwija ne buloba, kabùlunga aka, nebùjimine to. Kàdi buloba, *kosmos*, cidiidi, bangènzàmpèkàatù, ndongolwelu, mpèkaatù, disaamà, twìshi, cintu cyònsò cyà cibì aci, necijimine. Cintu cyònsò cìvwà musangu kampànda . . .

¹⁶⁷ Nzambì wàkanyùkusha maulu musangu kampànda, kàdi bwà ewu musangu Wàkamba ne Neànyùkushè buloba, maulu ne buloba . . . “Yèyè wàkanyùkusha buloba,” èyowà's wè, “ne pashiishe bwà ewu musangu Neànyùkushe maulu.” Nwamònu anyi? “Bwalu tudi tupeta Bukalenge bùdi kabùyì mwà kunyungishiibwa nànsha.” Cidi Bukalenge bwà Cyendèlèlè. Tàngilàayi nùmonè mùdiye ùcyàmba.

¹⁶⁸ Mònaayi mwab'ewu ne, Peetèlò wàkamba ne: “Nènku nebyèngulukè ne luuyà lukolè, ne byenzedi bidìmu nebyòshekè,” kí ndibùlungà to. “Byenzedi bidìmu,” byenzedi byà bantu, beena cidiidi bààbò bwònsò ne màyelè àbò, ne màngumba àbò wònsò ne màyelè makwàtakaja kùdi bantu awu, nebìye naabù byònsò pòoshekabù apu.

¹⁶⁹ “Nènku—nènku maulu neàjiminè ne mutooyi mukolè.” Nukaavwaku bamòne mwaba ewu anyi? “Maulu neàjiminè ne mutooyi mukolè.” Tèlèjàayi! Buloba bujimà nebùkwate kapyà, ne nebùlàkushe gâzè yìdi munda mwà buloba ne kubùtaayisha. Ncyà bushùwà menemene. Nwakula bwà . . . Bible mmwàmbe mwaba ewu, Peetèlò mmwàmbe ne: “Ne maulu neàjiminè, ne buloba, ne mutooyi mukolè.” Ditaayika bu nàнку nedibùnyùkushe, kaa, ekèlekèlè, bwalu bùdi ne cyà kushipa dìnà disaamà dyònsò, dìnà mungòngà wònsò, dìnà dyèba dyònsò. Cyònsò cidi cikèngelà bwà kwenjiibwa aci, Kapyà aku nekàcyòshè. Nènku, nwavùlukaayi ne, kacyèna cyònsò ànu bu kapyà kèètù katùmònamonà aka to, cidi kàbìdi Kapyà kàà cijila, nwamònu's, aci's necyùmushè Sàtaanà ne kèndè pa kèndè kwònsò, démons yònsò ayi. “Dyulu ne buloba byònsò,” amen, “nebìjiminè,” ushipa twìshi twònsò, bìshiishi byònsò, mwoyi wònsò wà mu bufùki pa buloba ne eku ne eku kwàbù, nànsha mene H₂O (mâyi's) neàtùdikè. Anji elàayibi meejikù. Nwènu bàmbambà bwà mutooyi's!

170 Nudi nwela meeji ne kaamutooyi kakesè mu Tucson emu kàvwa cintu kampànda, pàakakàngulàYe Bitampì bisambòmbò, aci's cyàkanyükusha eku ne eku kwà citùpà cyà buloba aci, kàdi bantu akùlaayi's. Indilaayi too ne pààpetà buloba ebu dibàtiiza dyàbù's!

171 Nudi bamanyè's, pàdi muntu upeta dibàtiiza dyà Kapyà, kùdi mutooyi búngì cyanàànà mu nyungulukilu amu. Bàdi bèèla meeji ne aci mbundù's, bwà kuumvwa bantu bèèla mikunda ne bèèla mbilà mùshindù awu. Indilà ànu cyanàànà too ne pàdi buloba ebu bupeta dibàtiiza dyàbù's!

172 Èyowà, necyùmvwije... necibùtaayishe, H₂O awu, màyi's, bwalu Bible mmwàmbe mwab'ewu mu Bwàkabuulwibwà 21 emu ne: "ne kakùcivwa kàbìdì mbù to," wàkataayika. Eci's necishintulule mpàla mujimà wa buloba bwònsò nkòong. Nebütùdike ne kutaayika kushàala tupesetupese. Pambèlu pààbù pwònsò apa, cisèbà aci, too ne mwinshì mwàbù mu bule bwà nkàmà yà makàsà, nebùshimbudiibwè bwònsò nkòong. Bibwàshìbwàshì, gâzè bìdi mu buloba mpindyewu ebi, mùdìbo basangana missilè yidi kayiyi mwà kubwelamù ayi, cipaapu cinène muulu amu, lwà muulu amu mu cipaapu cyà mùshindù kampànda mùdi gâzè yà mishindù yònsò amu, mutùbo bamba amu; kàdi nebitùdike. Cijji cokolè cyà cijila cyà Nzambi necilwepù, nwamònu's, ne necibùkezùlè, necishintululè mpàla yònsò nkòong.

173 Mpindyewu, bààbùngì bàà kunùdì bàdi baswè kufùnda mwàkù ewu, mwàkù wà mu cyena Ngelikà awu, "kujimina." Ùdi ùfùmina ku mwàkù... Bìvwa bikèngela bwà ngupetè. Mémè kudyàmbidila ne: "Mmunyì mwàjìmina buloba ebu, pààbì netwikale basòmbelepu?" Kàdi bu nwènu mwà kumòna, bàmwè bàà kunùdì bàdi baswè kucifùnda abu, mémè nènùnùtèlèlèci ku dileetà ku dileetà. Ncyèna mufwànyine kucishindumuna bimpè to, p-a-r-e-r-e-c-h-o-m-i-a. Ncyèna mumanye mwà kucishindumuna to.

174 Mpindyewu, mùshindù awu, mûngãmbì, pandi mpeta... Pàdi busonsodi bundenga bwà cintu kampànda, pashiishe ndi mpingana bwà kujandula mwàkù awu. Mpindyewu, apa, ncyèna mwà kwamba mwàkù awu ku dileetà ku dileetà to, anyi ncyèna mwà—ncyèna mwà kuwùshindumuna to. Kàdi, mu cyôci aci, Mukalenge ùcidi ànu mumpèeshe mùshindù kampànda. Ndi nya bwà kujandula cidì mwàkù awu ùmvwija, pashiishe ncìpeta. Nwamònu anyi? Dìbà adi ndi mucìpetè, kàbìdì. Nwamònu anyi?

175 Maulu ne buloba *nebijiminè*, mpindyewu, mwàkù ewu udi uswa kwamba ne, "kuumuka ku mmwènekeli kampànda kuya ku mukwàbò." Kacyèna cyùmvwija ne "dibutudiibwa" to, mùdi mwàkù wà mu Anglais mufwànyine kumvwija amu, *kujimina*, ne mbubütüdiibwe. Kàdi mwàkù wa mu cyena Ebèlù, anyi mwàkù wa mu cyena Ngelikà ewu, kawèna wùmvwija *kujimina* to; ùdi

ùmvwija ne: “kuumuka ku cintu kuya ku cikwàbò.” Tàngilàayi, kàdi, “kuumuka ku ngiikàdilù kampànda,” cidi cyàmba ne, “kuya ku mukwàbò.”

¹⁷⁶ Mpindyewu mōnaayi ne, Pólò wàkawkwàta naawù mudimu, panwikalà baswè kucibala mpindyewu. Cifundaayi, nudi mwà kucibala pashùshe. Mu Tiitò 3:5, Pólò ùdi ùkwàta mudimu ne mwàkù wùm>wè>wùm>wè ewu, wùdi wùm>wija ne difùkuludiibwa dyà muntu, muntu awu mmuumùke ku ngènzàmpèkààtù muyè ku munsantu, kàyi mubùtùdiibwe kashidi to. Padi muntu ùshintuluka, kî mmubùtùdiibwe to, kàdi yèyè mmuntu mushintùlùke. Yèyè mmushintùlùdiibwe muumùke ku ciwàye muyè ku cidiye aci, kî mmubùtùdiibwe to.

¹⁷⁷ Yesù wàkawkwàta mudimu ne mwàkù wùm>wè>wùm>wè awu mu Maatàayi 19:28; mpindyewu, kî 28:19 to. Mpindyewu, 19:28, Yèyè wàkabàmbila ne: “Nenùsombè Naanyi mu Bukalenge bwà Taatù Wanyi, bafùkùlùdiibwe,” nudi numōna’s, “bashintùlùke,” paùdi mushintùlùke. Wàkawkwàta mudimu ne mwàkù wùm>wè>wùm>wè awu.

¹⁷⁸ Kàbidi Wàkawkwàta mudimu ne mwàkù ùmwè>ùm>wè awu pàakambàYe, bwà kànà kàà mpunda aku, wàmba ne: “Sù>lulàayi kànà kàà mpunda nù>kàlekèlè kàye.”

¹⁷⁹ Wàkamba cintu cìmwè>cìmwè aci ku dibiikà dyà Lazàrò ku lufù ne: “Musù>lùlaayi! Mushintù>lùlaayi! Yèyè ùvwa muswikiibwe; mulekèlaayi àye!”

¹⁸⁰ Cidi cyùm>wija cinyi? Buloba nebù>sù>ludiibwè ku dikwàta dyà Sàtaanà. Nebù>sù>ludiibwè. Nebù>sù>ludiibwè ku cidiidi, nebù>sù>ludiibwè ku ndongolwelu yà butèndeledi yà cyena màngumba; bwà kukwàtabo naabò mudimu bwà Bukalenge bwà Nzambì, bwà kubù>shindamija pa buloba apa. Kàdi bwà pàcidiibu ànu mu byanza byà Sàtaanà, cidiidi. . .Sàtaanà mukò>keshi wa buloba, mmubù>shiye bwèndè yèyè; bù>kaavwa bwèndè, kàdi mpindyewu Kilistò mmubù>pikùle.

¹⁸¹ Musangu kampànda, mvwa cintu cyèndè, kàdi bwà mpindyewu to. Musangu kampànda, mukàji mukesè awu ùvwa cintu cyèndè, kàdi bwà mpindyewu to. Nwamònu’s, Yèyè wàkalwa bwà kubù>sù>lula ku nzàdi yìvwa mibù>pye. Wàkasù>lula ku dikwàta dyà nzàdi yà mpèkaatù, dyà Sàtaanà, pa nsòmbelu wanyi, pa nsòmbelu webè, ne mpindyewu katwèna bèndè yèyè to.

¹⁸² Misangu yàbù>ngì nukaadikù bangumvùm>wwe ngàmba, mu disambila ne: “umùsha byanza byèbè ku bintu byà Nzambì’s”? Nwamònu anyi? Amen! Ikàlà ne diitabuuja bwà kunana webè sungasunga. Ke makenji èbè ngòwò awu. “Umùshà byanza byèbè kùdi mukàji ewu! Umùshà byanza byèbè kùdi mulùme ewu!” Nwamònu’s, diitabuuja nedyènzè nànkù. Kaa, ekèlekèle! Kí nkucibù>tula butubutu to, kàdi, ànu ne: “Umùshà byanza byèbè

ku cyòci aci,” bwà kucisùulula, kucilekela ciye, kucipicisha. Cìdi cishintuluka.

¹⁸³ Buloba nebùshintulukè. Cìdiidi necishintulukè. Ntèndeleeleu neyishintulukè. Màngumba neàjimine. Cìdiidi necipitè. Bukalenge bwà Nzambi nebùshindamijiibwè.

¹⁸⁴ Tudi tubala mu Yone, tubala Yone mu Bwàkabuulwibwà 6:14, nwamònu’s: “byàkaya bu mukàndà muvùnga.” Bible mmwambè ne...ne cìdi...Yone mmwambè ne: “Ngàkamòna dyulu ne buloba byùmuka bu mukàndà muvùnga.” Yone, Bwàkabuulwibwà 6:14.

¹⁸⁵ Yesù wàkamba ne: “Maulu ne buloba nebìjiminè,” anyi, mu ngaakwilù mukwàbò, “maulu ne buloba nebishintulukè.” Nwamònu’s, mukwàte mudimu ne mwàkù ùmwèumwè awu ànu mwaba awu kàbìdi.

¹⁸⁶ To, kí ncibùtùdiibwe butubutu to. Bwalu, pashìshe, mu Bwàkabuulwibwà 21:2 too ne ku 24, wàkamòna Yèlusàlèma Mupyamùpyà ùpweka ùfùmina kùdi Nzambi mu Dyulu, ne ùsòmba pa buloba apa. Kí mbwena kwamba ne nebùbùtudiibwè butubutu to. Ndongolwelu neishintulukè.

¹⁸⁷ Danyèlè wàkamòna cintu cimwècimwè aci. Lubwebwe kutuutalù buloba, lwàkatùuka kakùyì dyambulwisha dyà byanza to; ne cimfwànyì cijimà cyà ndongolwelu ayi aci cyàkashimbudiibwa ne kulwaci bu bisòte pa cishiipwidi mu muvù wà luuyà, ne lupeepèlè kuyalù naaci. Ne Lubwebwe alu, Lwòlù mene, kudyunda bu Mukùnà munène wàkabwikila buloba. Tàngilàayi Mukùnà awu mpindyewu, mu katanci kakesè emu. Mukùnà awu wàkabwikila buloba.

¹⁸⁸ Kàbìdi, tudi tusangana kaaba aka, lwà mu, kàbìdi, mu Bwàkabuulwibwà amu, mbàmbe ne: “Bamfùmù bàà Buloba Bupyabùpyà nebàtwalèmu luumù lwàbò ne butùmbi.” Pa buloba, mmusòmbè...Yèlusàlèma Mupyamùpyà mmusòmba pa buloba ebu. Nwamònu’s, bwàkashintuluka ànu cyanààna.

¹⁸⁹ Wèwè udi muntu umweumwe awu, mu cipidi, wa bwena ùvwà pàakakubiikilà Nzambi apu, mukàji umweumwe awu. Kàdi, nudi numòna’s, cyàkenzàci, cìvwa ndifùkuludiibwa. Mwoyi wà kale wùkaadi muumùke. Dijinga dyà kale adi dikaadi diyè. Pàdìbi ne, ùvwa ne ciibidilu cyà munange kunwa maalà, ne kucipangana, ne kukòkangana, ne kubìnduluka, ne kunyeemakanangana eku ne eku, ne nsòmbelu wa masandi, cintu aci cyàkamana ànu kufwà. Nwamònu anyi? Kàdi mpindyewu ukaadi mwibidile...Kumpàla uvwa cyamu cyà mudimu cyà Sàtaanà; mpindyewu udi mupikùdiibwe.

¹⁹⁰ Nènku ke cìikalà buloba aci, mùshindù wùmwèwùmwè awu, bupikula, Maulu Mapyamàpyà ne Buloba Bupyabùpyà.

¹⁹¹ Ànu bu wèwè: “Udi cifùkiibwà cipyaciipya.” Nènku mwàkù wà mu cyena Ngelikà mwaba awu, muntu kana yònsò

ewu's mmumanyè, mmwámbe ne: "Udi bufùki bupyabùpyà." Amen! Bufùki bupyabùpyà mu ntempèlù umweumwe wa kale awu. Àlèluuyàh. Tàngilàayi nùmonè cìdì cyènzekà kaaba aka mpindyewu. Cyà butùmbi's wè! Èyo.

¹⁹² Mpindyewu tudi tusangana ne buloba ebu nebùlamè bamfùmù bàà pa buloba.

¹⁹³ Nènkù, kàbìdì, mu Maatàayi 5:5, Yesù wàkamba ne: "Bapòle nebàpyanè buloba." Kacyàkwikala, kabààkwikala ànu ne buloba bukwàbò to. Neciikalè ànu buloba bùmwebùmwe ebu. Ndi nteeta bwà kunùtwàdila ndo—ndongamu wa bupikudi, kumpàla kwà, nànsha mèmè nciyi mutwàla cìngà cintu to, nwamònu's. Dibàtiiza dyà Kapyà, pa bwòbù abu, didi ànu bwà kubùkezula ne kubùwija mwaba mukùmbànyine bwà bapolè Bèndè bwà kusòmbelabòmu. Nwamònu anyi? Kaa!

¹⁹⁴ Bu mwàkatwènzàye, bufùki Bwèndè, bwà kusòmbelamù. Kumpàlà kwà Yèyè kumòna mwà kubwelamù, byàkakèngela bwà kutùpèèshaYè dibàtiiza dyà Kapyà; dibà adi Nyumà Mwìmpè kubwelamu ne kusòmba, dibàtiiza dyà Kapyà. Pashìshe, paùdì upeta dibàtiiza dyà Kapyà adi, dibà adi Nyumà Mwìmpè ùdi mwà kubwela. Nciyi aci? PàdiYe ùbwela, Ùdi wòsha bintu byònsò bìdì kabìyi bìpetangana ne Dìyi abi, ùbìpàtula mu wèwè amu. Nwamònu anyi? Yèyè kàadyàkwitabuujakù cìngà cintu to ànu Dìyi, bwalu Yèyè ùdi Dìyi. Nwamònu anyi? Nwamònu anyi? Nwamònu anyi?

¹⁹⁵ Mpindyewu, ki citùvwà twamba ditùkù adi aci, cileeeji cyà Nyumà Mwìmpè. Nwamònu anyi? Cileeeji cyà Nyumà Mwìmpè mpaùdì mwà kwakidila Dìyi; kì nndongolwelu kampànda to, kàdi kwikala ne luumvu lutòoke tòò. Mmunyi mùdì umanya ne Dìyi nditòòke, ne udi uDyùmvwà? Tàngilà mùdìDi dìDìshìndika.

¹⁹⁶ "Èè," mùdì wamba, "mèmè's ndi mmòna *cikampànda* cìcyenza, ne *cikansanga*." Kaa, èyowà's, bisoosa bibi bìdì ne mwoyi mu mùshindù ùmwèumwè awu. Nwamònu anyi?

¹⁹⁷ Kàdi cìdì ne cyà kwikala Dìyi mu kaabujimà. Bwà kwikala Mukàji-musèla, bikèngela wikalè citùpà Cyèndè. Yèyè ùdi Dìyi. Nwamònu anyi? Ne nciùpà cyà ku Yèyè kaayi cìdici? Dìyi didi dilayìbwe bwà ditùkù edì pàdiYe ùbìkila Mukàj'Èndè-musèla apu. Ikàlà citùpà cyàDì. Nudi nucyùmvwà anyi? Mpindyewu, kanwikadi—kanwikadi nwàcìjimija mpindyewu to. Mònaayi.

Nènkù Yèyè wàkacìvwija mwaba mukùmbàne wà kusòmbela mu Cyèndèlèlè cìjimà.

¹⁹⁸ Mònaayi ne, eci kì ncyanjì ànu kutèèdiibwa bu... Bukòokeshi bwà Bukalenge bwà bidimu cinunu ebu, bidimu cinunu, kì m'Buloba Bupyabùpyà to. Nwamònu's, bukòokeshi bwà Bukalenge bwà bidimu cinunu mbukòokeshi bushìlàngàne. Ke mutùdì tubwela amu, Bukalenge bwà bidimu cinunu, kàdi aci kì m'Buloba Bupyabùpyà, Dyulu Dipyadìpyà to. To, to. Aci's cìdì ànu mwaba wà diikisha, nwamònu's, cipungu cyà

diikisha, kî m'Maulu Mapyamàpyà ne Buloba Bupyabùpyà to nànsha kakesè; bwalu, nudi numòna's, mu Bukalenge bwà bidimu cinunu tudi ne bintu bìdì kabìyì mwà kubwela mu Cyôci aci to. Ncifwànyikijilu cyà ditùkù dyà mwandamutekète dyà kale adi, mu Edènà mwàmwa; ditùkù dyà mwandamutekète, paanyimà pàà Yèyè mumanè kwenza buloba. Ditùkù dyà mwandamutekète, Wàkiikisha mu Edènà, nènku Bukalenge bwà bidimu cinunu.

¹⁹⁹ Nwamònu's, buloba bùkaadi mpindyewu ne bidimu bìpacila ku binunu bisambòmbò, byà dikola's. Nwamònu anyi? Ku bidimu binunu bìbidì byònsò bùtu bupeté ka—kabùtù kampànda. Nwamònu anyi?

²⁰⁰ Binunu bìbidì byà kumpàla, dipaasalala dyà màyi adi kulwadì, ne Yèyè kubùbàtiiza ne (cinyi?) màyi.

²⁰¹ Binunu bìbidì byàkalondà abi, Yesù wàkalwa bwà kubùjidila ne kubùnana, kumacishapù Mashi Èndè, kubùbùikila ne m'Bwèndè. Èyo.

²⁰² “Nèndwe cyàkàbìdì,” uh-huh, mpindyewu bu Mfùmù ne Mukalenge-mukàji Wèndè, ne bidimu binunu bìbidì biibìdì abi (cidìYe wènza ncinyi?) Ùdi ùlwa ne ùfila cipungu Cyèndè cyà diikisha.

²⁰³ Ne pashìshe ùbwòsha, ne ùbùnana Bwèndè Yèyè mwine; wàlujapù Bèndè Sungasunga.

²⁰⁴ Kàdi mònaayi ne, kî mbuloba bupwàngàne to, Bukalenge bwà bidimu cinunu ebu, ncifwànyikijilu cyà ditùkù dyà mwandamutekète. Pashìshe Cilumbulwidi cyà Nkwasa Mutòke cilwalà. Nwamònu's, tucìdi ànu ne cilumbulwidi. Tucìdi ànu tubala dibà, mu Bukalenge bwà bidimu cinunu. Nditùkù dimwèpelè, bidimu cinunu abi's. Kùdi cintu pààci ne ncikondo. Kî, kàdi, kanùbwejakajikù aci ne Buloba Bupyabùpyà to, bwalu kî mbwòbù to.

²⁰⁵ Nudi bafwànyine kungambila bwalu ebu. Mpindyewu ndi ndyumvwa ànu ne muntu mmufwanyine kungambila bwalu ebu, ne: “Mpindyewu, Mwanèètù Branham, ciwènza ncinyi mpindyewu? Ukàadi mujikije yèbè mwandamutekète yònsò nkòong. Mpenyi pawùyaayà bwà kwenza mpindyewu? Mpindyewu, wèwè's udì mwena bipungu.” Cyôci mene, s'ke cìndi. Ndi ngùtabuuja ne Nzambi ùdi nànkù, pèndè's. Fùndaayi, numòne's. “Ukàadi mujikije bifwànyikijilu byèbè byà bipungu abi. Bwalu, wèwè mutèèke cintu kampànda dyàmwàmwa dyà ditùkù dyà mwandamutekète adi, neùcipete munyi? Uyaàya kwèpi mpindyewu?”

²⁰⁶ Èyo, nènkokè ntèmà yènù ku cintu kampànda, nwamònu's. Uh-huh. Nwamònu anyi? Pa nànkù, ncyèna mupàtùke—ncyèna mupàtùke mu bipungu to, nànsha nànkù. Ndi ne mukwàbò Mufundu mwaba ewu. Nènku, vùlukàayi ne, bikèngela bwà Cyôci cyònsò cyùlè, kantu ne kantu kààCì. Nwamònu anyi?

207 Mpindyewu wêwè udi wamba ne: “Mwanèètù Branham, wêwè udi uteeta kutèèka cintu kampànda kule kwàka dyàmwàmwà dyà ditùkù dyà mwandamutekète adi, nsabatu wa ditùkù dyà mwandamutekète awu.”

208 Ànu mwàkenza Nzambi buloba ne kukwàta mudimu matùkù àsambòmbò, ne kwikisha dyà mwandamutekète, cìvwa ànu cimfwànyì cyà cikondo, cikondo. Kàdi ngàfumu ku dyamba kaaba aka ne, tudi tulwa bàà Cyendèlèlè.

209 “Pa nàнку cimfwànyì cyèbè aci cìdi penyì mpindyewu? Wêwè’s utu mwambè ne udi mulongeshi wa ne bimfwànyì. Nàнку, wêwè, s’ukàadi mumànè bimfwànyì mpindyewu.” To, ncyèna mubìmanè to. Twanjààyiibi ànu kujandula ní tudi babìmanè.

210 Tùyaayi mu Lewitiki, twalukila mu nshapità wa 23 wa Lewitiki. Mpindyewu ndi muswè bwà nùmonè mu Lewitiki, mutùvwà mu dyàlumingu dishààle, anyì mu dyà ndekeelu. . . Eci ke cyàkampèeshà cingenyinyenyi, kaaba aka mene. Nshapità wa 23 wa Lewitiki, ku mvensà wa 26.

211 Mpindyewu vùlukàayi ne, kùdi matùkù mwandamutekète à mafestò. Difestò dyà mpungi, difestò dyà—dyà bisambusambu, difestò dyà dinyukusha dyà cisekiseki, kùdi. . . Byònsò ebi, kùdi matùkù mwandamutekète à mafestò manène, aci cìvwa ànu cimfwànyì cyà Bikondo Mwandamutekète byà Èkèleeziyà. Kàdi nudi bavùlùke ne nsabatu búngì kaayi yìvwà yìsanganyibwa pankaci pàà edi ne dikwàbò anyì? Nwamònu’s, nsabatu mwandamutekète pankaci pàà mpenta ne mpungi, cìvwa Bikondo Mwandamutekète byà Èkèleeziyà. Nènku kùvwa matùkù mwandamutekète à mafestò, àvwà àleeja Bikondo Mwandamutekète byà Èkèleeziyà. Lamàayi nombà yènù ayi yènda yitùngunuka.

212 Wêwè udi wamba ne: “Èè, mpindyewu, Mwanèètù Branham, s’ukàadi mumanè kujikija. Ukàadi ne mwandamutekète yèbè ayi.”

213 Èyo, twàngatàayi difestò dyà ndekeelu, didi diikale difestò dyà bisambusambu. Mpindyewu mònaayi mwab’ewu mu mvensà wa 36.

Nenùlambulè milàmbù mu matùkù mwandamutekète myenza ne kapyà kùdi MUKALENGE: mu ditùkù dyà mwandamukùlù—mu ditùkù dyà mwandamukùlù nekwikala dibìkidiibwa dyà cijila (kùdi cìkwàbò cikondo cyà cijila munkaci mwà kulwa). . . dibìkidiibwa dyà cijila kunùdi; nènku nenùlambule mulàmbù mwenza ne kapyà kùdi Mukalenge: nènku cìdi disangisha dyà kadìyì tuseku to; ne nwènù kanwàkwenzakù mudimu mucimbàkàne nànsha ùmwè to.

214 Mpindyewu tudi ne “ditùkù dyà mwandamukùlù.” Mpindyewu, kùdi matùkù ànu mwandamutekète, kàdi’s ntwètù aba twakula bwà “ditùkù dyà mwandamukùlù,” dibìikidiibwa dyà cijila, dibìikidiibwa. Mònaayi ne: “Kanwènjimù mudimu to.” Ditùkù dyà mwandamukùlù, tudi (cinyi?) baalùkile ku ditùkù dyà kumpàla adi’s. Mòna’s, didi dyàkula bwà Cyendèlèlè, pàdici cyènda cinyunguluka kaciyi ne mwaba wà kwimanyina to. Amen. Nudi nucimòna anyi?

215 Mònaayi ne, cívwa kàbìdì pa ditùkù dyà mwandamukùlù edi. Ditùkù dyà ndekeelu, difestò dyà bisambusambu, mònaayi ne paanyimà pàà cyòci aci, paanyimà pàà ditùkù dyà difestò dyà ndekeelu, paanyimà pàà Cikondo cyà ndekeelu cyà Èkèleeziyà, paanyimà pàà matùkù mwandamutekète a ndekeelu wònsò nkòong pa buloba, paanyimà pàà Bukalenge bwà bidimu cinunu, ke pàdì Dibìikidiibwa dyà Cijila edi dyènzeka.

216 Vùlukàayi ne, edi ndifestò dyà bisambusambu, *bisambusambu*, “myaba yà kudisangishila.” Amen! Mwaba awu, “Mu Bukalenge bwà bidimu cinunu,” mùdì Bible mwambe ne: “nebiibakè nzùbu; nebàsòmbelèmu.”

217 Kàdi mu Buloba Bupyabùpyà, Yèyè ùkaadi mumanè kuya ne mulongòlòle mwaba awu. Mmwibaka. Katwèna ne cyà dyenza mu diibakiibwa dyàwù nànsha cimwè to. Amen. Wa Cyendèlèlè! Kaa, mèmè ntu ànu munangè Dìyi adi’s wè! Èkèlekèle! Dibìikidiibwa dyà Cijila, ditùkù dyà mwandamukùlù. Pàabi, kùdi ànu matùkù mwandamutekète cyanààna. Pashiishe mu ditùkù dyà mwandamukùlù, didi dyàlukila cyàkàbìdì ku ditùkù dyà kumpàla adi, dyàlukila buludi ku ditùkù dyà kumpàla, ditùkù dyà mwandamukùlù didi Dibìikidiibwa dyà Ciji-... Dibìikidiibwa.

218 Mònaayi ne, matùkù mwandamutekète, bikèngela ànu bwà kwenza nànkù ne bufùkì bwà kale, cikondo cyà buloba. Matùkù mwandamutekète, ke Bukalenge bwà bidimu cinunu mbwòbù abu, ditùkù dyà diikisha. Mùvwà Nzambi mukwàte mudimu mukolè mu matùkù àsambòmbò amu, wàkiikisha mu dyà mwandamutekète; Èkèleeziyà ùdi ùkwàta mudimu mukolè mu matùkù àsambòmbò, ne wikisha dyà mwandamutekète, kàdi wèwè ucidi ànu mu citùpà cyà cikondo. Ncyèna ngàakula bwà dyà Cyendèlèlè to.

219 Kàdi, nudi numòna’s, cintu pààci ne mmatùkù mwandamukùlù kacitukù to; nudi nwalukila cyàkàbìdì ku ditùkù dyà kumpàla, nwamònu’s, ditùkù dyà kumpàla.

220 Nsabatu ùdi wàkula bwà mikenji yà kale, yìvwà ne cyà kujika ayi. Dineemekela dyà nsabatu, dikaadi “dijike adi,” anyi, mvwa mwambe ne: “dishintùlùke mu dikwàbò.” Kàdivwa dijike to; divwa ànu dishintùlùke dyumùke ku mikenji yà kale ayi, yà dineemekela ditùkù kampànda dyà lumingu.

221 Yeshàayi, nshapità wa 19, wákamba, ngèèla meeji 28:19, mmwambe ne: “Bidi ne cyà kwikala kanungu pa kanungu; ndambu apa, ne ndambu pààpa.” “Shààlaayi bakwàte bikolè ku cidi cimpè.” “Bwalu ku mishikù yidi yikùkuminà ne mu myakulu mikwàbò mmungàakulà ne cisambà eci. Kàdi’s ke diikisha ndyòdi edi.” Nwamònu anyi?

222 Wèwè udi ubwela mu Mwoyi, kí nkuneemekela kwa ditùkù kampànda anyi mundidimbi to. Pòlò mmwambe, mu Ebèlù amu nshapità mwí4. “Nutu nunemekela matùkù ne mindidimbi, ne bintu byà mùshindù awu; ndi ne bwòwà bwà dilabula dyènù.” Nwamònu’s, twètù katùtu tucipila mu matùkù kampànda ne mèyi matùma to. “Nudi buumùke ku lufù bàyè ku Mwoyi wà Cyendèlèlèlè,” kí mmatùkù ne bikondo to. Nudi babwele mu Cyendèlèlèlè. Aci’s ke dibìikidiibwa dyà ciji-...dibìikidiibwa, dibìikidiibwa, èyowà’s.

223 *Matùkù mwandamutekète*, tàngilàayi, àkaadi “majike,” anyi, ndi mwambe ne neikalè mwà “kushintuludiibwa mu cikwàbò cintu.” Matùkù mwandamukùlù àdi àkula bwà bufùki bupyabùpyà, nwamònu’s, kí mbufùki bwà kale to. Matùkù mwandamukùlù mbufùki bupyabùpyà.

224 Bwalu, mùvwa mmu ditùkù dyà mwandamukùlù mwàkabiikà Mukalenge wetù ku bafwè. Ke dibìikidiibwa dyènù dikwàbò ndyòdi adi, cijila aci; kabiyi dineemekela dyà nsabatu to, nànsha kakesè, anyi difestò dyà bisambusambu, difestò dyà *cikampànda*, ne difestò dyà mpenta. Yesù wàkabiika ku bafwè, bwà dìbingishiibwa dyètù, mu ditùkù dyà mwandamukùlù. Paanyimà pàà nsabatu mwandamutekète, anyi matùkù mwandamutekète, Bikondo Mwandamutekète byà Ekeleeziyà, Yesù wàkabiika ku bafwè. Ditùkù dyà mwandamukùlù, cidi ciikale dibìikidiibwa dyà cijila, nwamònu’s, cidi ciikale ditùkù dyà kumpàla.

225 Nwamònu’s, nudi, nukàadi bamanè kupicila mu cikondo kujike, ne bakadibwinke mu Cyendèlèlèlè cyàkàbìdì; kí ndineemekela dyà matùkù, ne dineemekela dyà nsabatu; ne ngondu mipyamipya, ne bintu byà mùshindù awu to. “Kàdi *nukàadi* bapite,” bashintùlùle mmwènekeli wènù; kí mbabùtùdiibwe to. Butùmbi’s wè! “Kàdi buumùke ku lufù bàyè ku Mwoyi wà Cyendèlèlèlè.” Kaa, cidi Bible ùtùlongesha’s wè! Nwamònu’s, buumùke ku ewu bàyè ku mukwàbò.

226 Èyo, “bapite,” nsabatu wa kale awu mmujikè. Yesù wàkabiika mu ditùkù dyà mwandamukùlù. Adi òvwa nditùkù dyà kadiyi tuseku to, dyà cijila. Ne kadivwa ditùkù kampànda to; bwalu ditùkù, cikondo kampànda, cimanè kujika. Dyàkabwela mu Cyendèlèlèlè. Nwamònu’s, cyàkaalukila buludi ku ditùkù dyà kumpàla cyàkàbìdì. Nwamònu anyi?

227 Cyendèlèlèlè cidi bu mùdì kakànù kàà—kàà ku munu. Kwèna mwà kupetamù disangu to. Kwèna mwà kupeta mwaba wà

kwimanyina mu cijèngù cipwàngàne nànsha. Udi ànu kacya wamònanngana ne kuya. Kúyaaya nànsha kwòkù bule munyi, udi mutùngùnùke ne kuya. Udi mwà kutwàdija kunyùnguluka mùshindù *ewu's*; wànyùnguluka mwinshi mwà nzùbu mwònsò emu, wèwè kutàmbakana buloba bujimà, kuya dyàmwàmwà dyà buloba, ucidi ànu uy- . . . [Katùpà kàà mukàbà wà mèyi munda mutupù—Muf.]

²²⁸ Bintu byònsò byàkafùkiibwa paanshi *apa* abi, mbinyangakaja, kî mbifùkùibwe to, kùdi Sàtaanà, nebìye mwamwamwa pààdilà ngonga munène wa ngòlò ne pààdilà Mpungi.

²²⁹ Ne kalekale wàwa ku cibangidilu, kwàkajiikiibwa dikunji dyà ciswikidi mu Edènà, pàakalwà muntu pa buloba ne yèyè kudishinda, mwànà mukesè wa mùkòòkò wàkeela mashi èndè paanshi, aci kwakulaci bwà Mwànà wa mùkòòkò munène uvwa ulwa bwà kwela Mashi Èndè paanshi awu. Kàlvariyò kujuulakù nkùrusè, wàkaswikakaja Dipungila Dikùlukulu; kùdi aba bàvwà babingishiiibwe bàvwà bàMukeba. Ne mu cipungu cipyacipyà eci, ku Dilwa dyà Mukalenge, ku Buloba Bupyabùpyà, mwonji wà lupàndù (Mashi, Bukolè bupikudi bündi ngàmba ebu, ne ku ndongolwelu umweumwe awu wàkapikula byònsò bibìdi muntu ne buloba) nèabiike buludi bwà kubwela mu Cyendèlèlèlè cyàkàbìdi. Nènku Dijiba dyà Kapyà nedibutule bintu byònsò bìdi kabìyi bifwàne Nzambì ne kabìyi bidyànza-kulongolwelaKù to. Nudi nucimòna anyi?

²³⁰ Mònaayi ne, ditùkù dyà mwandamukùlù, Yesù wàkabiika ku lufù bwà dibingishiiibwa dyètù. Mfùmù wa Cyendèlèlèlè, ne Bukalenge bwà Cyendèlèlèlè bwà kubàtiiiibwamù, bwà Mwoyi wà Cyendèlèlèlè. Kî mmatùkù mwandamutekète to; kacivwa ne cyà dyenza nànsha cimwè ne matùkù awu to. Cidi cyàkula bwà dikwàbò, dyà Cyendèlèlèlè, dilwalwà; cyàkula bwà cikondo cyà Cyendèlèlèlè, Buloba bündi ngàmba ebu.

²³¹ Nènku, mònaayi, paanyimà pàà matùkù makùmi àtaanu, anyi nsabatu mwandamutekète kuumukila apu, ke kulwakù dikwàbò dibiiikila dyà cijila. Cyàkenzekè ncinyi? Nyumà Mwimpè wàkamata mu Ditùkù dyà Mpenta, mu ditùkù dyà mwandamutekète. . . Anyi, ditùkù dyà mwandamukùlù's wè, ditùkù dyà mwandamukùlù, kumata mu ditùkù dyà mwandamukùlù. Ki cìvwà nsabatu mwandamutekète pashiishe, menemene, paanyimà pàà dibiiikà Dyèndè dyà ku lufù, nwamònu's; nànkù mbifwànyine kwikala aci misangu mwandamutekète kàbìdi, kucyàluja buludi ku ditùkù dyà kumpàla dyà lumingu kàbìdi, menemene. Nwamònu anyi?

²³² S'ke dibiiikidiibwa dyènù dyà cijila adi, kabyèna bitàngila cintu nànsha cimwè cyà cimwèka eci to. Mbipite ne apu's. Cidi mu Bukalenge bwà Nzambì, ne Mwoyi wà Cyendèlèlèlè, ne badyànjlila kulongolola bàvwà kacya kabàyikù babanga abu.

Kacya kacitukù cibanga ditùkù nànsa òm̀wè to. Wèwè kùwwa musùngìdìibwe mu ditùkù kàmpànda to. Úwwa misangu yònsò ànu musùngìdìibwe. Amen. Yesù wàkalwa ànu bwà kupikula bwòbò abu; kàdi wàkasùngìdìibwa, kacya ku cibangidilu, bwalu uvwa ne Mwoyi wà Cyendèlèlè, ànu kwìnè kwònsò aku.

²³³ Mushipa wà dibundu kawàdyàkwikalakù mushipa wà dibanga anyì civuba to. Úwwa mufwànyine kwikalà naaci mu màyi amweamwe awu, kadi wòwò úwwa, kacya ànu ku cibangidilu, mushipa wà dibundu. Bukòndò bwàkamukwàta ànu cyanààna, nwamònu's, kàdi yèyè úwwa aci kacya ànu ku cibangidilu aku. Ki cyòci aci . . .

²³⁴ Mpindyewu, katwèna pambèlù pàà bipungu to. Mm̀wòmò anyì? Tudi buludi mu Mifundu. Paanyimà pàà matùkù makumi àtaanu, kulwaci's.

²³⁵ Nwamònu's, mwandamukùlù kèna mwà kubadiibwa mu lumingu to. Nwamònu's, kèna mwà kubadiibwa to, matùkù mwandamukùlù mu lumingu lujimà. Kwèna mwà kucyènzà to, nwamònu's, bwalu kùdi matùkù ànu mwandamutekète cyanààna mu lumingu lujimà. Nànsa wèwè muàbala mu mùshindù wònsò wùdì muswè awu. Dyàlumingu ke ditùkù dyà kumpàlà dyà lumingu. Nwamònu's, udi ubala mwandamutekète, pashìishe bikèngela walukile cyànyimà ùbangulula cyàkàbìdì. Kubala mwandamutekète, kwalukila ne kutwàdijilula cyàkàbìdì. Nwamònu anyì?

²³⁶ Nènkù tuvwa ne mwoyi mu mishindù yònsò eyi mwòmò emu, kàdi, paùdì ukalenga dyà mwandamukùlù, udi uya mu Cyendèlèlè. Kwèna ulwila ku mikenji, ne mishingà, ne mèyi matùma to. Udi ulwila ku didyànjila-kulongolola. Amen! Ke dibìikidiibwa dilelèlè, dyà cijila adi's! Nwamònu anyì? Nènkù tudi tujikija cikondo cyà mwandamutekète cyà èkèleeziyà, cikondo cyà èkèleeziyà, cikondo cyà beena Mpenta. Nudi nucimòna anyì? Tudi tubwela mu dibìibikidiibwa dyà cijila adi. Tudi tubwela mu Cyendèlèlè cilelèlè, cishùwashùwàlè, mùdì Èkèleeziyà mubìikidiibwe; kì nciàngu kàmpànda, d̀ngumba kàmpànda to, kàdi kubwela mu Cyendèlèlè pàm̀wè ne Mfùmù wabò wa Cyendèlèlè. Nwamònu anyì? Katwèna naaci to nànsa kakesè, cintu pààcì ne mmatùkù, ne bikwàbò, ne bikondo. Udi mubwele mu Cyendèlèlè, mùdì mufùmìne amu. Wèwè uvwa Mwòmò amu, ànu kwine kwònsò aku. Nwamònu anyì?

²³⁷ Wèwè ne Mwoyi wà Cyendèlèlè, kùdi mùshindù ànu ùmwèpèlè, aci's ke Nzambi, ne wèwè udi cyambiibwà cyà patòòke. Nwamònu anyì? Pawìkalà . . . Pawìkalà kùyì nànkù to, kwakwikala kuntwaku to, nànsa byà munyi. "Muntu nànsa umwe kèna mwà kulwa kùNdì pàdì Taatù Wanyì kàyì mumukòke to." Nwamònu anyì? Biinè abi, "bìpita," bintu byònsò byà kale ebi; kàdi Bintu ebi kabyèna bipita to, pa nànkù bìdì byàkula bwà Cyendèlèlè. Nyumà Mwìmpè ngwa Cyendèlèlè. Dìbà adi, wèwè

udi mu Cyendèlèèlè, mwaba wûvwà usanganyibwa dîbà dyònsò edi awu, kàdi wafûmu ànu ku dijingulula cidì cyenzèke.

²³⁸ Nwamònu's, wêwè uvwa mwenjîibwe bwà kiipàcilà kàà Cyendèlèèlè, bwalu uvwa di—dimwèneshiibwa dyà cyambiibwa kampànda cyàkadì mu Nzambi, wakakwelelà meeji ne kukuleeja patòòke; ne Yêyè wàkenza buloba bwà kukupàtulamù, ne bwà kukuvwija muntu. Ki mpèkaatù kulwa ne kunyangakaja njila Wendè. Wêwè kulwa, nànsha nàнку, kàdi uvwa mujimìne pàmwè ne buloba. Ke Yêyè kulwa e kukupikula, cyambiibwà cileejîibwe patòòke, ne ùdi kàbidì ùpikula buloba ebu mu mùshindù ùmwèùmwe awu. Dîbà adi, kiipàcilà Kèndè kàdi kàtungunuka. Nwamònu anyi? Kaa! Àlèluuyàh! Kaa, aci cidì cingenza bîmpè be, pàndì ànu ngèèla meeji bwà cidì cisanganyibwà kumpàla!

²³⁹ Mpindyewu, mu Efèsò 1:10, bàdi bàcibîikila . . . Mpindyewu, panwîkalà nucifûnda, mu Efèsò 1:10, cidì cibîikidiibwa, kí ncipungu to, kí nditùkù dyà mwandamutekète to. Cidì cibîikidiibwa ne: “Kaabujimà kàà cikondo.” Ne pàdi “kaabujimà kàà cikondo” kàlwa, apu mpàdi cikondo cyûla's. Pàdiku kakùciyì kàbidì cikondo to, pashiishe udi ubwela mu Cyendèlèèlè, paanyimà pàà cikondo cyà mwandamutekète cyà èkèleeziyà cimanè kujika, ne ncijike; Cikondo cyà Luther ncijikè, cikondo cyà ba-Méthodistes ncijikè, cikondo cyà beena Mpenta ncijikè. Nènku mpindyewu udi ubwela mu (cinyi?) Cyendèlèèlè; kakùciyì kàbidì byà mwandamutekète, kakùciyì kàbidì byà isàtù, kakùciyì kabidì cintu cikwàbò to. Bàdi mu Cyendèlèèlè, mùdi kamùyì cikondo cyà bu nàнку bu mùdi nombà, ne bikondo, ne bikwàbò to. Amen! Kaa, ekèlekèlè! Nudi nucimòna mpindyewu anyi?

²⁴⁰ Anyi, paanyimà pàà cikondo cimanè kukumbana, mpèkaatù yònsò muyè, muumusha, mu Bukalenge bwà bidimu cinunu, ku Cilumbulwidi cinènè cyà Nkwasa Mutòòke. (Cifwànyikijilu, ku Nyumà Mwîmpè.) Paanyimà pàà buloba bukwàte kapyà ne bubàtîjîibwe, dibàtiiza dyàbù dyà Kapyà kàà cijila kàà mu Dyulu adi; mpèkaatù yònsò kàciyiku, twîshì twònsò tuye, démons yònsò kayiciyiku, mateeciibwa wònsò mamanè kuya, bubì bwònsò buyè. (Cifwànyikijilu mpindyewu.) Dîbà adi Nzambi ùdi wènza cinyi? Ùdi mwà kusòmba pa buloba, nwamònu's, bwalu mpèkaatù yònsò ùkaadi muyè.

²⁴¹ Ncintu cimwècimwè aci cidìYe wènza pàdiYe ùkupèèsha dibàtiiza dyà Nyumà Mwîmpè ne Kapyà. Yêyè ùdi mwà kulwa ne kusòmba neenù, ne tudi mwà kusòmba mu myaba yà mu Dyulu mu Kilistò Yesù, bwalu tukàadi mu Yêyè. Kî nnè “netwîkalè to.” Tudi mpindyewu basòmbè mu Kilistò Yesù. Tudi tubwelamù munyi? Ku dibàtiiza dyà Nyumà Mwîmpè dimwèpelè. “Ku Nyumà umwèpelè ncutùdi bwònsò babàtîjîibwe mu Kilistò,” mbwena kwamba ne, ncutùdi mpindyewu. Katwa “kwîkala” mu Kilistò to; tudimù! Yêyè ùdi Mfùmù munène wa nyumà pa

Nyumà udi munda mwètù awu, bwalu tuvwa munda Mwèndè ku cibangidilu.

242 Nwamònu's, Nzambi, ku cibangidilu, pààkélàye meeji bwèbè wêwè ne kwela meeji bwà bakwàbò mùshindù awu, kwela meeji Bwèndè Yèyè mwine bwà kwikala wa bàlenga ne byanza. Ke civwa meeji Èndè ncyôci aci. Nwamònu anyi? Pa nànkù, Yèyè wàkaleeja patòòke meeji Èndè ku Dîyì. Yèyè ne: "Kwikalè." "Kwikalè," ne kwikalakù. "Kwikalè," ne kwikalakù.

243 Pashìishe, paanyimà pàà katanci, Yèyè kutungunuka ànu ne kwamba ne "kwikalè," too ne mwàkamba bantu, ditùkù kampànda ne: "Kulekedikù Nzambi wàkula to!"

244 Yèyè ne: "Mpindyewu Mèmè nêngààkwilè naabò ku mupròfetà." Nwamònu anyi? "Kubangila mpindyewu, Mèmè nêngààkwilè naabò ku mupròfetà."

245 Ne mupròfetà wàkamba ne: "Nekùlwe; nekwikalè," ne cyàkiikalakù, ne cyàkiikalakù. Nènku cyàkiikalakù, ne cyàkiikalakù, nwamònu's, ànu mùshindù awu. Nwacyùmùvù mpindyewu anyi?

246 "Kaabujimà kàà cikondo" nkafikè paanyimà pàà cikondo cimanè kukumbana. Mpèkaatù kàcyenakù to, paanyimà pàà dibàtiiza dyà buloba, paanyimà pàà dibàtiiza dyà buloba dibùvwije mwaba mukumbànyine; kakùyì ní mmabèèdì, ní ntwishì; ní mmèbà, ní mmingònga; ní n'lufù, ní ntuninganyinga, ní mmàsaamà à mwoyi; ní mbukulàkàji to, cintu nànsha cimwè bwà kuleeja lufù; kakwèna cintu cibì nànsha cimwè to; èyo; cintu nànsha cimwè cyà mu bufùki. Cyà Cyendèlèlè!

247 Pashìishe, cyambiibwà Cyèndè ncileejìibwe patòòke bwalu civwakù, dyàmbedi, ànu kwine kwònsò aku. Ki cyàkeelàYè meeji ncyôci aci. [Mwanèètù Branham ùdi ùfwànyikijila ku mboodi—Muf.]

248 Kàdi cyàkenzekà pashìishe ncinyi? Yèyè wàkateeka Adàmà ne Evà pa buloba apa, ne kwamba ne: "Vulàngànaayi mpindyewu ne nùje buloba." Mibidi yàbò yìvwa yònsò mitèèkiibwe pambèlu apa, bwà wêwè kudyà ne kufwimba mubidi wèbè. Ke mùshindù ùvwàYè nawù wà kucyènza ngwòwò awu.

249 Kàdi mpèkaatù kulwayè ne kwimakaja ndongamu Wendè. Cikondo cidi cyènda citungunuka, ànu mùshindù ùmwèumwè awu, cikondo's.

250 Kàdi cyàkenzà Yesù ncinyi? Nzambi wàkatùuluka ne kuDìleeja patòòke mu mmwènekèlu wa Muntu, muntu wetù ewu; wàkafila mwoyi Wèndè, pamutù pàà kushààla kaaba aka. Pààbi, Yèyè ùvwa Mfùmù, kàdi WàkaDifila bwà kupikula bakwàbò. Nwacyùmùvù anyi?

251 Nènku pàdibi byònsò bijika, díbà adi ncyàlùkile buludi, ne kiipàcilà kàà Nzambi nkújìibwe. Ke cyàkàbidì Mfùmù wa

Cyendèlèlè awu ne bantu Bèndè bàà Cyendèlèlè, muleejìibwe mu mubidi wa buntu, ànu menemene mùshindù ùvwaYe naawù awu; mpèkaatù mmumùshìibwe; dyabùlù muyè; byònsò kabìcyènakù mpindyewu to.

²⁵² Ncinyi cìikalà mwà kucyènza? Buloba ebu kî mbufwànyìne kwikala mwaba bwà Dyulu kusòmbadi mpindyewu to. Tàngilàayi eci, mpèkaatù ewu. Neikale ne cyà kusukudiibwa.

²⁵³ Muntu mulùme nànsha umwe, muntu nànsha umwe, muntu mukàji nànsha umwe, mwànà wa balùme, mwànà wa bakàji, nànsha yèyè nganyi, kî mmukùmbàne bwà kubànda mu cyambilu, anyi mene kulaka mukana kwamba mùdiye mwena Kilistò, kàyi muujìibwe tètè ne Nyumà Mwìmpè to. Kwèna ne bukenji ku didyà dyà mèèsà à Mukalenge, anyi nkòòmuniyò kanà yònsò, dyoweshangana dyà màyi ku makàsà, anyi ní ncinyi cyònsò to, paùdi kùyi musukula kùdi Kapyà kàà Cijila kàà Nzambi to.

²⁵⁴ Muntu nànsha umwe kèna ne bukenji bwà kuyiisha paùdi kùyi, bu Mòsà, mutwilàngàne Nendè kuntwaku mu malaba mansantu awu to, Dikunji dyà Kapyà adi dilembèlèle mwaba awu, mwaba ùdiye mumanye kùdiye ùsanganyiiibwa. Nwamònu anyi?

²⁵⁵ Mònaayi mùshindù, mùshindù utùyaaya. Paanyimà pàà dibàtiiza dyà Kapyà dyà buloba, twìshì twònsò ntuye, dibùvwija mwaba mukùmbàne dībà adi bwà Dyulu kusòmbadi pànu pa buloba apa.

²⁵⁶ Cifwànyikijilu, mpindyewu, cyà kusòmbela mu myaba yà mu Dyulu mu Kilistò Yesù; buumuke ku eci, cìdi cikooyike ànu mwàkadi mukàji mukesè awu amu, kubwela mu cyambiibwà cileejìibwe patòoke cyà Nzambi. “Mpindyewu twètù tudi Bàna bàà Nzambi,” kî nnè *netwikale* to. Tudi byambiibwà byà meeji à Nzambi. Nwamònu anyi?

²⁵⁷ Mpindyewu wèwè udi wamba ne: “Èè, tàngilàaku mwakwidi ewu. Yèyè kàvwa mwànà wa balùme wa Nzambi anyi?” Cyàkajaadika ne kàvwa nàнку to. Kàvwa mwà kujingulula cinyi? Wàkamba ne: “Ndi ngìitabuujja Bible anyi?” Bushùwà’s. Kàdi yèyè kàvwa mwà kujingulula Dìyi dyela patòoke dyà dībà edi to. Úvwa ànu ne dilonga dyà mu mamanya à mu mutù dyà ku cisùmbù kampànda cyàkadiku kale kumpàla kwèndè.

²⁵⁸ Nènku ncintu cìmwècìmwè aci leelù ewu! Nwamònu anyi? Ndi mumanyè ne aci ncikolè, kàdi m’Bulelèlè.

²⁵⁹ Dìyi’s dìvwa mwab’awu, ànu mùvwàdi dyakùdiibwa menemene bwà ditùkù adi amu; kàdi, yèyè, nànsha mùvwàye mumanyi wa dibàla, nànsha mùvwàye muntu wa luumù, kàdi kàvwa mwà kuDìjingulula to. Bwà cinyi? Nànsha byòbi ne yèyè ùvwa mumanyi wa dibàla wa bìshi, cintu bu nàнку awu, kàvwa ànu ne cifwanyikijilu cyà didyanjila-kulongolola to. Nwamònu anyi?

260 Ànu badyànjila-kulongolola nkààyaabò ke bìikale aba bààcyènzà; ànu bôbò nkààyaabò. Nènku ànu wèwè ngudi mwà kucyenza . . . Bwalu, tàngilàayi, cidi cijaadika didyanjila-kulongolola. Bwalu, wèwè ne Mwoyi wà Cyendèlèlè, bìvwa bikèngela bwà wèwè kwikala citùpà cyà Nzambi kwónsòkwónsò eku, bwalu Yèyè ki Umwèpelè udi wa Cyendèlèlè. Nudi nucimòna anyi? Kaa, ekèlekèle! Anji elàayiibi meeji ku bwalu abu.

261 Mpindyewu tàngilàayi nùmonè cidi cyènzekà mu Bukalenge bunènè bwà bidimu cinunu. Mpèkaatù yònsò mmiyè, Bukalenge bwà bidimu cinunu bùdi bùtwadija mpindyewu, dìbà dyàkànyì mpindyewu didi Nyumà Mwimpè wàngata kaaba Kèndè.

262 Ànu mùdiYe wenza munda mwètù amu, “ùmuka ku lufù ùya ku Mwoyi,” musòmbèle mu myaba yà mu Dyulu mu Kilistò, mu Bwikadi Bwèndè bwà butùmbi. Nànsha lufù lwà mubidi kalwàkwikalakù dìbà adi to; ànu mùdi lufù lwà nyumà kalùciyiku mpindyewu amu.

263 Cintu pààci ne ndufù lwà mu nyumà mpindyewu kacitukù to, bwà—bwà—bwà munsantu mubàtijiibwe wa Nzambi. “Nànsha byòbì ne yèyè mmufwe, kàdi neikale ne mwoyi. Ewu yònsò udi ne mwoyi ne ùngiitabuuja Mèmè kààdyàkufwaku to.” Mufùndu wònsò, Wùdi ne cyà kuula. Nwamònu anyi? Kwèna mwà kufwà to. Udi ne Mwoyi wà Cyendèlèlè. Cintu cimwèpelè ncyà nè, Mupikudi mmukufikishe ku dicijingulula. Ne wèwè ùvwa misangu yònsò ànu Cyòci aci, nènku ki bwà cinyì udi umòna ditùkù dyùdi ne mwoyi adi. Mbanganyi bàdi bàcimòna? Elàayi byanza muulu. Nwamònu anyi? Twasàkidi laayi. Nwamònu anyi? Ditùkù ditùdimu ne mwoyi edi, nudi nudìjingulula.

264 Mpindyewu, ba-Méthodistes kwambabò ne: “Paùdi wela mbilà, udi Nèndè.” Bààbùngì bàà kùdìbo bààkeela mbilà kàdi kabàyi baMupètè to.

265 Mpenta kwamba ne: “Paùdi wakula mu myakulu, udi Nèndè.” Bààbùngì kwakulabo mu myakulu, kàdi kabàyi baMupètè to.

266 Tàngilàayi mùvwàbì's, mmwènekèlu yà mìshindù yònsò yìvwà naayi Bàfaalèsà abu, kàdi pàakamwèneshiibwà Dìyi, kabààkaDijingulula to. Nwamònu anyi? Nwamònu anyi?

267 Nènku pawikalà Mukàji-musèla, Mukàji-musèla nciitùpà cyà Bàyèndè. Nènku bu . . . Mwaba wùmwèpelè wùdiku mufwànyine kuDijingulwila, nkujingulula ne nciitùpà kaayi cyà Mulùme awu (Dìyi adi) cyùdi wèwè, cyanààna kwèna mwà kujingulula ne udi Mukàji-musèla to. Mbanganyi bàdi bàmòna aci? Nwamònu anyi? Nwamònu anyi? Bikèngela ùjingulule kaaba kèbè.

268 Kwèna mwà kujingulula kàa muntu mukwàbò to. Amba tũng bu—amba tũng bu ne Mòsà wàkalwa ne mukenji wà Noà? Ne Noà ùvwa citùpà cyèndè, kàdi kacivwa cifwànyine

kwikala cikumbàne to. Ambàbi tǔng bu—bu—bu—bu ne Yesù wàkalwa ne Mukenji wà Mòsà? Kabìvwa bifwànyine kukumbana to. Nwamònu's, cìvwa ncikondo cishiilàngàne, cìvwa ncipròfetà cishiilàngàne, citùpà cishiilàngàne cyà Díyì cìvwa ne cyà kuula mwaba awu. Bàvwa mu ditùkù dikwàbò dyà lumingu. Kabyèna ne, mudimu wa diibìdì kawèna mwà kwenjiibwa mu diisàtù nànsha. Ne wa diisàtù ùdi ne cyà kwenjiibwa mu diisàtù. Nwamònu anyi? Bìdì bikèngela bwà wà diisambòmbò wikalè mudimu wà mu diisambòmbò. Nwamònu anyi?

Nènku, bòbò, bàvwa bàjingulula ne: “Kaa, Mòsà, tudi ne Mòsà.”

269 Yèyè ne: “Bu ne nuvwa bamanyè Mòsà, nùnkù's nudi baMmanyè Mémè, bwalu yèyè awu's nguvwa mwakùle bwànyì Mémè. ‘Mukalenge Nzambì wenù neajuule mupròfetà mufwànàngàne naanyì.’” Nùmvù meeji awu anyi? Kaa, ekèlekèle! Nwamònu anyi?

270 Pashiishe Yesù mmwambè, mu Yone 14 ne: “Yèyè, Nyumà Mwímpè, pàalwàYe, Yèyè neànùvùlwijè maalu aa, nwamònu's, binùleeja ne nditùkù kaayì dinùdì ne mwoyi. Ne pashiishe, cikwàbò cintu kunwàMumanyinà, Yèyè neànùleejè maalu àcìlwalwà,” nwamònu's, nwamònu's, twalukila cyàkàbìdì buludi ku cipròfetà, “pìikalàYe mulwè.” Nwamònu anyi?

271 Mu Buloba Bupyabùpyà ne mu Maulu Mapyamàpyà, kabyàdyàkufiikishiibwakù kàbìdì to, pìikalà Buloba Bupyabùpyà ebu ne cyà kulwa. Dyabùlù neàswikiibwè... Sàtaanà, yèyè ùcidi ànu mulekèlèdiibwe mpindyewu; yèyè mmufundyanganyi. Kàdi mu Buloba Bupyabùpyà, yèyè neàswikiibwè ne neèdiibwè mu Dijiba dyà Kapyà, mu Kapyà kàà cijila aka.

272 Dìbà adi, mu Buloba Bupyabùpyà ebu, tùcitàngilaayi bwà katanci kakesè mpindyewu. Mu Buloba Bupyabùpyà ebu, maulu kaàdyàkufiikakù kàbìdì to; to, aci cìvwa cìfùmina ku mulawu, nwamònu's. Kaàdyàkufiikakù kàbìdì ne mavuba à cijji to. Mpeepèlè kayàdyàkutuutamù kàbìdì mùshindù awu to. Kayàdyàkuupula kàbìdì mici, ne kuupula nzùbu, ne kuupumuna bintu to. Mikenyi ne cijji cicolè aci kabyàdyàkupàtukilakù kùdì Sàtaanà mwàmwa, ne kushebeya muntu uvwa wenda upweka ne njila, anyi kwosha nzùbu to. Nwamònu anyi? To, nànsha kakesè. Kakwàkwikala kàbìdì mvùlà yà bipùpù yipwekamù, anyi bipeepèlè bikolè ne mvùlà mikolè yà kajoomona, ne dyupula dyà nzùbu, ne dishipa dyà bânà bakesè, ne bikwàbò to. Huh-uh, kabyàkwikalakù kàbìdì to. Kuteeta kubutula, kabyàkwikalakù to. Sàtaanà mmwipàcìibwe.

273 Mvw'a kujinga bwà twikalakù ne dìbà mpindyewu. Ndi ànu munkacì mwà kupita Mifundu, mpindyewu, bwà katwikadi twatamba kupicisha dìbà to. Bikèngela nsambidile babèedi.

274 Maulu ne buloba mbitwilàngàne; Nzambì ne muntu mbapungishàngàne. Edènà mwakajulula ùkaadi mutwàdije; nwamònu's, mulawu wònsò kawùcyènakù nànsha.

275 Ànu mùdìbi ne, mulawu wònsò wà mpèkaatù wùkaadi muyè pàdi Nyumà Mwímpè ùkwitaba. Nwamònu's, kwèna uMwitaba to; Yèyè ngudi ùkwitaba, nwamònu's, bwalu Udi cyambiìbwà cyà Nzambì. Nwamònu's, Yèyè mwikale Nyumà Mwímpè, mbwena kwamba ne, Nyumà wa Nzambì; ne cidi ncyambiìbwà, meeji à Nzambì, mmukwitàbe bwalu wèwè uvwa mulongolwela kiipàcilà aku. Nwamònu anyi? Nànsha nànkù, wèwè uvwa mulediibwe mu mpèkaatù; kàdi Nzambì ùvwa ne cyambiìbwà aci, kàdi's ke wèwè ewu muleejiìbwe patòòke pànu pa buloba apa, ne Yèyè ùpweka ne ùkwangata. Nwamònu's, udi paanyimà *apa*; ki mwaba ùdi bu wèbè *awu*. Nwamònu anyi? Nwamònu's, mpèkaatù wàjimiji bukolè bwèndè. Ncyà bushùwà. Dijinga dyà mpèkaatù ndimanè kuumuka mu mwoyi wèbè, pàdi Nyumà Mwímpè ùbwelamù. Wèwè udi muntu mwalujulula.

276 Ne pashiishe pàdi buloba bwàlujuludiibwe, ku cintu cimwècimwè aci, kakwèna mwà kwikala mulawu, mvùlà yà bipùpù, bipeepèlè, anyi mvùulà yà kajoomona—kajoomona kàbidi to, èyowà's wè. Udi mupungishiiibwe; muntu ne Nzambì mbatwilàngàne. Buloba Bupyabùpyà nebùtèekiibwè cyàkàbidi mu bulenga bwàbù bwà Èdènà wabù. Buloba Bupyabùpyà nebùtangelakè, bwòbù, paanyimà pàà dibàtiiza dyàbù dyà Kapyà.

277 Anji elàayibi meeji's, buloba nebùkwatè kapyà ne bwòshiiibwè. Bintu bìdi bibwènze nebyòshikè ne—ne luuyà lukolè. Midimu yònsò yà mu buloba neyòshikè. Ne màyi neàtuutè dikùbàkùbà; neàkwatè kapyà ne kutaayika wònsò. Bintu byònsò nebitaayikè. Volcans neyitùdikè ne, bitoci byàyi byà luuyà lukolè abi nebibuukè muulu, mu binunu byà kilòmèètà mu mpeepèlè. Dìna mùtòlokò wònsò...Nyumà Mwímpè wa Nzambì neàsukulè katùpà ne katùpà kwònsò kàà mpèkaatù yònsò ne bikwàbò byònsò. Démons yònsò neyiswikiibwè ne kwediibwa mu Dijiba dyà Kapyà, Kapyà kàà kwòsha, Kapyà kàà ciiji cìkolè cyà Nzambì.

278 Kakwàkwilakù nyama kuntwaku bwà kunùbùtula cyàkàbidi to. Paudi wenda upweka ne njila, mu budimi bwà bilòngò amu, kamwàkwikala nyòka nànsha umwe bwà kukwela kashibà ne kukusùma, ne lulengu lwèndè lwà mulungu alu to. Kaa, ekèlekèlè! Kabyàkwikalakù bilenga anyi? Tèèlejàayi. Kamwàkwikala mu Buloba Bupyabùpyà abu kaacibumba nànsha kàmwè kiikale ne mushikì wà mashinda à maanyimaanyi ndambù, bu lukità to; kamwàkwikala nànsha cimwè to.

279 Muntu ne Nzambì mbadisangè; Mukàji-musèla ne Mubàki. Maulu ne buloba mbyupùkilàngàne ewu ne mukwàbò; Nzambì

mmutùùlùke panshi bwà kusòmbela munkaci mwà bantu. Ntentà Wendè ùdi naabù.

²⁸⁰ Kamwàkwikalà kàbìdi mpèkaatù to, byà tunyinganyinga kàbìdi to. Kamwàkwikalakù nànsha cinsònji cipwekela pa ditàmà dyà maamù, bwà mwanèndè wa mu dibòkò to. Amen. Kabyàkwikalakù, mu Buloba Bupyabùpyà abu to. To. Mbupikùdiibwe. Mbushààle Bwendè, ne bwà Bèndè bààkapikudiibwàmu abu. Nwamònu anyi?

²⁸¹ Nènku, tàngilàayi, wèwè udi citùpà cyà buloba abu aci. Ncyà bushùwà anyi? Nènku pàakakupikulàYe, Yèyè wàkapikula buloba ne cintu cìmwècìmwè aci, ne nwènù nudi cyàkàbìdi pàmwè. Kaa, mùshindù kaayi wùdìbi bitàmbe kwikala byà bitòòke's wè. Nwamònu anyi? Bikèngela ùpikudiibwè bwalu wèwè udi citùpà cyà ku bwòbù abu. Kàdi pìikalà Mashi kaayi makumacile, kwèna mwanji kupikudiibwa to; kwèna mubiikidiibwe to. Dìbà adi Yèyè ùdi ùbùkezula; ke cintu cìmwècìmwè aci cidìYe wènza mu Kapyà. Nànsha, Mashi mmamatè, bùcìvwa ànu ne cyà kusukudiibwa kùdi Kapyà, ncyà bushùwà, bwà cisòmbedi cyà Nzambi.

²⁸² Nzambi ukaadi mumanè kwangata cisòmbedi Cyèndè, mu mùshindù mushààdile. Bukalenge bwà Nzambi bùdi pa buloba mpindyewu, mu myoyi ya bansantu Bèndè. Byambiibwà Byèndè byàkabangàYe naabi ku cibangidilu. Mpindyewu byambiibwà Byèndè mbipikùdiibwe. CidìYe mwindile ncinyi? Bwà kupikula buloba, bwà kushikikapù byambiibwà Byèndè, bwà kuuja ànu menemene ndongamu Wendè mudyanjila kulongolola awu. Nudi nucimòna anyi?

²⁸³ Mònaayi ne, kamwèna nkita to, kamwèna binsonji to, nànshapù, kamwèna dyela mashi panshi kàbìdi to. Kabwàkuboleshiibwa ne dimata dyà binsònji anyi mashi to. To. Kakwàkwikalà kàbìdi mvità to. To. Nànsha mavuba à movù wà mashika to. Nànsha nèjè yà mashika pa difù dyàbù to; kayàdyàkushààlapù kàbìdi to. Dìbà dyà luuyà lukolè kadyàkwikalakù to, kadyàkwoshakù mashindà àbu nànsha. Àlèluuyàh! Nànsha cipèèlà mene necitòlleshè bilòngò byà rose. "Cipèèlà cyà kale, cyà cyùme ncyoncyonyo aci necibwayishè bilòngò, dīngà ditukù, byenze ànu bu cilòngò cyà rose," Nzambi ngudi mwambe nànkù; pàdìbu bupikùdiibwe, pàdìbu bwàngata dibatiiza dyàbù dyà Kapyà adi. Kùdi mīshindù yònsò yà ntùlu ne mèbà à masongòlòke ne bikwàbò byònsò muntwamu mpindyewu, kàdi bùdi ne cyà kupeta dibatiiza dyà Kapyà dīcīlwalwà.

²⁸⁴ Ànu mùvwà muntu amu, pàcìvwàye ànu ne lukīnu, budimù ne dikòkangana munda mwèndè; pàakalwà dibàtiiza dyà Kapyà, dyàkacisukula. Byà mukàwu kàbìdi to, kakùcyèna kàbìdi cintu nànsha cìmwè to; kakùyi mpatà to cidì ànu mwaba wà cisòmbedi bwà Nzambi. Nènku, vùlukaayi ne, ke kasumbù Kèndè kàa

batùmìibwe bààyà katwilangana Nendè kuntwaku aku. Amen!
Kaa, ncinyi. . .

²⁸⁵ Aci kî ng'ànu bwalu-bulonda to; aci's m'Bulelèlà. Ke cidi Nzambi mwàmbè. Ke cyàkalayàYe aci's. S'ke kùyaayà Mukàjì-musèla mutàngile aku's. "Nànsha mene cipèlà," mwàkambàYe, "necyelè bilòngò, neciikale cilòngò cyà rose."

²⁸⁶ Sàtaanà, mpèkaatù, ne bangènzàmpèkaatù, mbimanè kuya, bwà kashidi. Byònsò mbiye; byengùlùke bikabwele mu Cyendèlèlè. Ne byònsò bivwà binyangakajìibwe abi, mwarkanjèlò munène wàkasòmbamù dīngà ditùkù awu, Sàtaanà, wàkenza bubì bwònsò ebu, neàbütudiibwè. Nudi bavùlùke ne, Bible mmwambè nè: "Musùükà awu kawùyì mwenze mwàkenzàYe amu to, mwàkambàye bwà kwenza amu to, Yèyè neàbutulè musùükà awu mene."

²⁸⁷ Kàdi, nudi numòna's, Yèyè kèna mwà kuDibütula kàdi kushàala Nzambi to. Pa nàнку, piikalàbi ne musùükà awu ngwà pa buloba, ùdi ne cyà kubütudiibwa. Kàdi wòwù wà Cyendèlèlè, mwikale ne Nzambi, kacya kawùvwakù mwanjì kubanga to, bwalu nceitùpà cyà Nzambi ne kawèna mwà kubütudiibwakù to. Amen! Bulenga kaayi's wè! Mùshindù mwine—mùshindù mwine ùtùdi ne kusàkidila, bwà ne Èkèleeziyà bikèngela àmonè cyòci aci's wè!

²⁸⁸ Bantu wa yààyà, byònsò binùdi benze s'mbitèèka ànu mwab'ewu. Eci's ke cindi nteeta bwà kwamba. Ndi mulekèle bimwè byà ku cyòci eci bwalu ndi muswè kwalukilakù cyàkàbìdi.

²⁸⁹ Nànsha bintu ebi, Sàtaanà, bangènzàmpèkaatù, bikaadi biyè, bwà Cyendèlèlè; kabìciyi kàbìdi mwà kwikalakù to. Bwònsò. . .Nwamònu's, Sàtaanà kèna mwà kufùka to. Yèyè mufùke, nàнку yèyè ùdi Nzambi. Nwamònu anyi? Ùdi ànu mwà kunyangakaja cidi cifükìibwe aci. Nwamònu anyi? Nènku cinyangu cyònsò neciikale, dinyakaja adi, nebìikale biyè naaci. Nènku lufù's ndinyangakaja dyà mwoyi; ne pàdi dinyangakaja dijika, kakwèna mwà kwikala kàbìdi lufù to. Bukùlakàjè's ncimanyinu cyà lufù; ne piikalà bukùlakàjè buumùke, mwoyi wùdi wùbwela. Dinyanguka dyònsò ne bikwabò byònsò mbiyè. Mébà ne mingonga's ncimanyinu cyà mpèkaatù, "buloba nebwèdiibwè naabi mulawu," ne byòbi mbyumùshìibwe naabi. Bubèedi bùdi bùlwila, ku cyòci aci; nebwikale buyè naaci. Lufù nelwìkale luyè naaci. Dyela dyà mashi panshi nedìikale dijike.

²⁹⁰ Cintu nànsha cimwè kacyakulengaku mashinda awu to pa kuumusha cijila, Bapikula abu. Kaa, ekèlekèle! Èyowà's. Kaa, ndi ndyumvwa ànu bilenga byà kacya. Nzambi, ne bufùki Bwèndè; ne bifükìibwà Byèndè byà bufùki ebu mbipikula ku Mashi Èndè Sungasunga. Basukula ku njila wa disukudiibwa Dyèndè Sungasunga; dishipa Dyèndè dyà twìshi, njila wa dishipa dyà mpèkaatù's!

291 Byenze bu pàdi cintu kana cyònsò eci cisàbisha bwà kuumushamu twìshì, dyumusha dyà twìshì ditàmbe bwìmpé ditùtùku naadi kacya dítu nku kapyà. Udi mwà kwangata ní ncinyi ní ncinyi cyònsò eci kucisukula ne máyi à ntutu yà nsabanga ne ne mishindà ya manga yònsò eyi yitùbo bàmba ayi, kacýèna ànu cijika twìshì to. Kàdi cyòshèbi ànu kasangu kàmwè's!

292 Nènku pàdi Kapyà kàà cijila kàà Nzambi kàsàbisha buloba ne Mishindà bwà kuumusha twìshì; Yèyè mmubàndishe Mukàj'Èndè-musèla, udi mwà kubwela mu Dyulu pàmwè Nendè awu, pàcìdì eci munkaci mwà kwenzeka apa. Ne wàlukila cyàkàbìdì pa buloba, Maulu Mapyamàpyà ne Buloba Bupyabùpyà. Muvù wà mashika wà mutaleela kawèna mwà kubènzela bibi to. Muvù wa luuyà lukolè awu kawèna mwà kubènzèlakù bibi to. Cipèèla necisampile bu cilòngò cyà rose. Mpèkaatù ne bangènzàmpèkàatù kabààkwikalakù nànsha.

293 Nzambi, ne bifùkiibwà Byèndè ne bufùkì, mbasòmbè pàmwè mu dipetangana dipwàngane. Ànu mùdi maulu ne buloba biikàle mulùme ne mukàjèndè amu, ke mùdi kàbìdì Kilistò ne Èkèleeziyà, ne bwònsò bàdi bàsangila mu ndongamu umwèpelè munène wa butùmbi wa bupikudi ne mbaalujìbwe cyàkàbìdì mu cyàdi cyà Nzambi. Nudi nucimòna anyi?

294 Nènku, mu Buloba Bupyabùpyà, kùdi Cimenga Cipyacìpyà. Kaa, ekèlekèle! Mpindyewu tèèlejàayi ne ntèmà. Kanùpu eci mwoyi to. Cyà ne, Yesù wàkamba, mu Yone 14 ne, Yèyè ùvwa mwà kuya bwà kalongolola. "Myoyi yènu kayilubakanyi to." PàdiYe wènda ùya apu: "Ndi ne kabingilà kàà kuya. Nudi biitàbùùje Nzambi," mwàkambàYe, "ngiitàbùùjaayi ne Mémè pàanyi." Kabàvwa mwà kumòna ne Yèyè ùvwa Nzambi to. Yèyè ne: "Nudi biitàbùùje Nzambi, mpindyewu nungiitàbùùje ne Mémè. Nènku Ndi nya kanùlongolwela Mwaba. Mu Nzùbu wa Taatù Wanyì mùdi bisòmbedi byàbùngì; mu Bukalenge bwà Taatù Wanyì mùdi mabàlaasà àbùngì." Kilistò ùdimù, mumònàngane ne kwiibaka kwà Yelusàlèma Mupyamùpyà ewu mpindyewu. Mpindyewu tèèlejàayi ne ntèmà. Kanùtentemukikù to. Eci, kacinùpicikù to. Kilistò ùdi mu Dyulu, leelù ewu, munkaci mwà kulongolola Yelusàlèma Mupyamùpyà.

295 Ànu mwàkafùkà Nzambi buloba mu matùkù àsambòmbò amu, kwenza buloba mu matùkù àsambòmbò, anyi bidimu binunu bisambòmbò. Bu mwàkambàye ne: "Kanwikadi bapangi to," mutùdi tubala mu Mifundu ne, "bidimu cinunu bidi ditùkù òmwè."

296 Ne Kilistò ùkaadi muyè ne ùdi munkaci mwà kulongolola Mwaba, awu ùdi munkaci mwà diibakiibwa dyèndè munda mwà binunu byà bidimu bùngibì, bùngì cyanàànà, ùlongolola Mwaba. "Nènku Mémè muyè ne mulongòlòle Mwaba, Nèndwe

kàbìdì, bwà kunwàngata; bwà kwônsò kuNgiikala aku, nudi mwà kwikalakù kàbìdì.” Mònaayi Mupikudi ne Bapikula’s!

²⁹⁷ Mvw’a kujinga twìkalakù ne dîbà mpindyewu’s. Ndi naaci cifunda mwaba ewu, Solòmò ùtèèla ne: “mwànà wa bakàjì ewu, Mukàjì-musèla.” Kaa, bikèngela ànu tùcishiyè ku luseke; dîbà dikaadi dyènda diya bikolè be, nwamònu’s. Nèncyàngatè, cyàkàbìdì. “Pàdiye ùteeta bwà kumupeta, kàdi mmubangila kùdì mwànà wa balùme mulami wa mìkòòkò.” Pàmwàpa bàmwè bàvwa bèèla meeji ne cìvwa mmusambu ùvwàye wìmba. Kaa, to. Solòmò ùvwa mupyànyi wa nkwasà wa butùmbi wa Davidì, pa buloba, kàdi wàkaleeja ne bukalenge abu bùvwa ne cyà kupìta. Cìvwa cìfwànyikijilu cyà Kilistò mu dinanga ne Mukàjì-musèla. Nwamònu anyì?

²⁹⁸ Mònaayi ne Yesù wàkamba, mu Yone 14 mpindyewu ne: “nyààya bwà kulongolola Mwaba.”

²⁹⁹ Kaa, necìikalè ne mmwenekelu kaayi’s? Nukààdikù beelè meeji mpindyewu, Mukàjì-musèla, necìikalè ne mmwènekelu kaayi? Nciilongolola ne cyenza kùdì Maanyimèèla Nzambi. Cimenga aci necìikale ne mmwènekelu kaayi? Mpindyewu, netwàkule bwàcì munda mwà tusunsa tukesè emu. Maanyimèèlè Nzambi ngudi mucìlongòlòle, mucyènze. Nènkù, tàngilàayi, Yèyè mmucyènze ne byanza byà dinanga, bwà Mukàj’Èndè-musèla munanga. Necìikale ne ne mmwènekelu kaayi?

³⁰⁰ Nudikù mwà kudìfwànyikijila mulùme ùsela mukàjì, mulùme wa makàndà awu, mùdiye wìbaka ne ùtèèka kantu kakesè kwônsò ànu menemene bwà kupetanganakù nendè, ànu cìdì mukàjì awu muswè aci’s? Amen.

³⁰¹ Mpindyewu, Maanyimèèlè Nzambi mmulongòlòle Cimenga Cipyacìpyà, mwìkalaYe mwà kusòmbela ne Mukàj’Èndè-musèla, ànu mùdìbi bìMukumbànyine. Kabyèna bikèmesha to pàakambà mùpostòlò awu ne: “Cìdì dísù kadiyì dimòne, dicitì kadiyì dyumvwè, anyì cìdì kaciyì cyanji kubwela mu mwoyi wà muntu.” Twánjàayibi kumòna ní tudi mwà kucikenketa ànu bwà katanci kakesè, bwà kumòna bwà ne necifwànganè ne cinyi’s.

³⁰² Maanyimèèlè Nzambi mmulongòlòle eci bwà Munanga Wendè. Nwamònu anyì? Kaa, mmwaba wà mùshindù kaayi ùdici ne cyà kwìkala, pàdìbi ne, Ngiikàdìlù wa Bunzambi, Maanyimèèlè wa Bunzambi mmucìlongòlòle bwà cyambiùbwà cyà Nzambi cìvwa cidyanjila kulongolola mu Bunzambi kùdì Nzambi wa Bunzambi bwônsò Udi—Udi Mwena Mwoyi wà Bunzambi’s! Cimenga aci necìikale ne mmwenekelu kaayi’s! Elààngànaayikù meeji tǔng.

³⁰³ Vùlukàayi ne, kî n’Dyulu to. Yone wàkamba ne: “Ngàakacimòna cìpweka cìfùmina mu Dyulu.” Cìdì ne cyà kwìkala pa buloba. Nwamònu anyì?

³⁰⁴ Kî mbuloba bùdì ne cyà kujìmina ebu to; mbuloba bupikula. Nzambi kàakamba ne Yèyè neàjuule lukongo lupyalùpyà to;

Yèyè neàpikule elu lùdi kaaba aka. Yèyè kààkujuula lukòngò lupyalùpyà to; Ùdi ùpikula elu lùkàadi mwab'ewu elu. Yèyè kààkwenza buloba bupyabùpyà to; bùdi ànu ebu bùdiku ebu. CyènzaYe ng'ànu kubwòsha, kubùkezula, bu mwàkakukezulàYe wèwè amu. Mpàngù Yèndè yidi ne cyà kushààla kashidi. Mpindyewu, tàngilàayi, nebwikalèku.

305 Vùlukàayi ne, kacyàkwikala Dyulu to. “Cidi cipweka cifùmina mu Dyulu.” Cidi m'Mwaba wà kushikama, Mwaba wà kushikamamù, bwà kuwènza Kwèndè kumbèlu. Ànu bu, ùvwa n'Yone, mu cisanga cyà Paatèmò, mu Bwàkabuulwibwà 21 emu, yèyè wàkacimòna “cipweka.” Yone wàkamòna Cimenga aci, “cipweka cifùmina mu Dyulu,” bu nkuci, bu mwàkamònàye.

306 Ki Nzambi ulwàlwa ewu, ùpweka pa ntentà Wendè wa pa buloba, Yesù, mu . . . “ùpweke ùfùmine mu Dyulu.” Yesù wàkabàtijiibwa, wàkaya buludi . . .

307 PààkatuutakeenàYe ne mupròfetà's! “Dìyi dùtu dila kùdi mupròfetà.” Ne Yèyè ùvwa Dìyi. Ne mupròfetà ùvwa mwimàne mwaba awu, ùvwa màngumba àbò wònsò, ne bikwàbò byònsò. Nènku, pààkamònàye Dìyi, Dìyi dyàkalwa buludi kùdiye.

308 Nènku mupròfetà awu ùvwa mulengiibwe bikolè, kwambayè ne: “Bidi bikèngela bwà mèmè kubàtijiibwa kùdi Wèwè. Udi ulwa kùndi bwà cinyi?”

309 Yèyè ne: “Twàla bwà bìikalè nànu, bwalu mbikumbane mùshindù ewu bwà twètù (tudi bamanyè mukenji) bwà kukumbaja bwakàne bwònsò. Mèmè ndi Mulàmbù; Ùdi ne cyà kusukudiibwa.” Wàkacitwàla.

310 PààkapàtukàYe mu màyi, wàkamba ne: “Ngàkamòna mauu muunzulula.” Mupròfetà awu wàkacimòna. Wàkamòna mauu muunzulula.

311 Kàdi's ke mmwènekeli wa Nkuci ulwàlwa ewu, ùpweka mufùmine mu Dyulu; ne Dìyi, dyàmbe ne: “Eci nciùpà Cyànyi cyà buloba cìNdi mupikùle, ne ku eci citùpà cyà buloba Mèmè nèmplikwilèku bikwàbò byà ku cyòci aci, bwalu Yèyè ùdi Dìyi Dyànyi dimwèneshiibwe.” “Nènku buloba bujimà, Mèmè kwakula bwà kwikalabùku ku Dìyi Dyànyi,” Ebèlu 11. “Kàdi Sàtaanà ùvwa mubùkwàte cikondo cyònsò eci, kàdi Ndi mulwe bwà kubùpikula. Ndambù wa ku bwòbù abu mmwenzè mubidi Wendè, ne Mèmè ndi ndwa bwà kusòmbelamù.”

312 Yone wàkamba ne: “Ngàkamòna Cimenga cyà cijila, Yelusàlèma Mupyamùpyà ùtùluka mu Dyulu, bu Mukàji-musèla mulengeja bwà Bàyendè.” Kàdi cyàkashikameena penyì? Ànu menemene mwàkenzaci kuntwaku amu; pa buloba.

313 Yesù ùvwa citùpà cyà buloba bùvwa Nyumà Mwimpè mutùlùkepù abu, (ncyà bushùwà anyi?) ne kushààla pa Yèyè kashidi. Kacyèna mwà kuMushiyakù to. Citu misangu yònsò

à nukù. Yèyè ne Nzambi bàdi Umwe. Bikèngela misangu yònsò ànu bishaale nànkù!

314 Ne pa nànkù Yone wàkamòna Cimenga cyà cijila aci, Yelusàlèrà Mupyamùpyà awu, cipweka bu ntumbà wa muulu, anyi n—nkuci, cipweka cìfùmina mu Dyulu ne cìshikameena pa buloba bujimà, bupikula, (bwà kwenza cinyi?) bwà kunana patòòke cyambiibwà cyònsò cyàkenzelàYe buloba aci. Muntu mulùme yònsò uvwa muleejibwe mu Cyendèlèlè awu, ne mukàji yònsò, mmupikudiibwe dîbà adi. Wàkakezudiibwa ne kwoshiibwa kùdi Kapyà.

315 Yesù, mu mateeciibwa Èndè à makolè awu mu cipèlèlè, munda mwà matùkù makùmi ànaayi. Paanyimà pàà cyòci aci, mònaayi ne, cìvwa cilongolola bwà mudimu Wèndè wà bwambi dîbà adi.

316 Anji elàayi meeji ku bwalu abu, Nyumà Mwimpè ùpweka pa buloba, Yesù, ne Mashi à cijila awu's! Mpindyewu tàngilàayi, ne ndi ntèkemena ne ncyèna ntàmba kuya neenù mu ndòndò to, nwamònu's. Mashi à cijila àvwà mafùkiibwe kùdi Nzambi awu; Mashi awu, Mwoyi, bufùki bwà Nzambi. "Yesù ùvwa cibangidilu cyà bufùki bwà Nzambi." Kaa! Nudi nucimòna anyi? Nzambi, wàkenza mu bufùki. Yèyè ùvwa Nyumà. Bible mmwambè ne: "Yèyè ùdi cibangidilu cyà bufùki bwà Nzambi." Yèyè wàkabanga bishi? Mu difù dyà muntu mukàji. Ncinyi aci? Mukàji kèna . . .

317 Ànu mùshindù ùdi bantu bafòfo abu kabàyi mwà kumòna "dimiinu" dyà nyòka apa mene to. Nwamònu anyi? Evà wàkatèèkiibwa pa buloba apa, ne, kumpalà mene kwà Sàtaanà kumulengayè, anyi ní ncinyi cikwàbò, Nzambi wàkabàmbila ne: "Vulàngànaayi ne nùje buloba." Ncyà bushùwà, kàdi Sàtaanà ùdi ùbwela emu. Nènku, bu ne ùvwa mwànà wa Adàmà, dîbà adi mwaba ùvwà . . .

318 Adàmà ùvwa mupàtùkile buludi kùdi Nzambi. Nènku wèwè udi wangata ànu ngiikàdilù wa muledi webè awu.

319 Nènku paùdi ulediibwa cyàkàbìdì, udi wangata Ngiiikàdilù wa Muledi webè, wa mu Dyulu. Ne Muledi webè wa mu Dyulu awu ncyambiibwà cyà Dìyi. . . Anyi, Dìyi didi cyambiibwà cyà Muledi webè. Dîbà adi, mmunyi mùdì mwà kuDivila, bwà dīgumba? Kaa, ekelekèle!

Ndi ntèkemena ne kanwèna nupangilakù eci to. Ndi mumanyè ne ncyà kùdi Nzambi.

320 Yesù. Ki Yèyè ulwàlwa ewu, wènda ùpweka; ne kùvwa Yesù, cyambiibwà cyà Nzambi.

321 Mpindyewu: "mukàji awu," yèyè. Tàngilàayi. Nzambi wàkamba ne: "Bwalu mbenze eci," yèyè ne, "Nèntèekè lukunà pankaci pàà Dimiinu dyèbè ne dimiinu dyà nyòka." Ncyà bushùwà anyi? Ne mukàji kèna ne dimiinu nànsha dimwè to. Nukààdikù bakwèlèlè meeji anyi? Yèyè ùdi ànu ne budimi bwà

dikùna, kî ndimiinu to. Nwamònu's, nyòka ùkaavwa mumanè kutèèka “dimiinu” dyèndè mwaba awu.

322 Dìbà adi, mukàjì yéyè kàyì ne dimiinu to, ùdi ne cyà kushààla bwà kwikala ne Dimiinu.

323 Nudi numòna's, ku disangila dyà mulùme ne mukàjì mwaba ewu, dyàkalwilà kùdì Sàtaanà, nyòka, ùvwa kàyì nyama wa ùdikoka panshi awu to; ùvwa ne mikòlò, bwalu mikòlò yèndè yàkamukòshibwa. Yéyè ùvwa mutàmbe budimù, nyama ùmwèpelè uvwa mufwànyine—mufwànyine kukùmbanangana ne mukàjì awu's.

324 Dimiinu dyà nyama kadyàkucyènza mpindyewu to, ne cintu cikwàbò nànsha cimwè. Mbateetè. Kabyàkukùmbanakù to. Nwamònu's, dimiinu dyà mwoyi dyà cilùme kadyàkubwela mu mukàjì nànsha. Kadyàkucyènza to.

325 Kàdi aci cìvwa cintu cyà citàmbe kwikala pabwìpì menemene. Nwamònu's, kabèèna mwà kupeta mùshindù pankacì pàà nsòkòmntù ne muntu to. Nwamònu's, muntu ne muntu, pàdici cishintuluka, cyùmukila ku nyuunyi, ne cìya citùngùnùke too ne ku nsokò, ne bikwàbò, too ne ku nsòkòmntù, pashìshe kùdì cìdì “cijìmine.” Awu ùvwa nnyòka, kî nnyòka mukèsè ewu to; mmwènekèlu yònsò mmujìmine ku yéyè aku, bwalu yéyè wàkeediibwa mulawu.

326 Mpindyewu, Nzambi kààkeela Adàmà mulawu to; yéyè ùvwa mufwànyine kwikala mwenzè cintu cimwècimwè aci, kàdi Yéyè wàkeela buloba mulawu, “mèbà ne mingònga.”

327 Yéyè kààkeela Evà mulawu to, kàdi wàkamba ne Adàmà neikale wèndè “mukòòkeshi.” Kubangila ku mpindyewu, yéyè kèna uteeta kuyiisha anyì ní ncinyì cyònsò to, Adàmà ngudi mukòòkeshi wèndè. “Ne matùkù èbè wònsò à mwoyi, ne mu tunynganyinga, nènku neütwalè . . .mwoyi pa buloba.” Kàdi Yéyè wàkamba ne: “Nènteekè lukunà pankacì pàà Dimiinu dyèbè . . .”

328 Mpindyewu, yéyè kàvwa ne dimiinu nànsha dìmwè to, yéyè kacya kàvwa naadi to, nànkù, byàkakèngela bwà kupetayè Dimiinu mu mùshindù kampànda. Nzambi wàkamupèèsha Dimiinu, kî nku disangila dyà mulùme ne mukàjì to, kàdi ku difùka.

329 Nwènu bampofo kanwènaayiku mwà kumòna ne ke “dimiinu” dyà nyòka ndyòdì adi anyì? Kaa, ekèlekèlè! Sàtaanà wàkafika kuntwaku kumpàlà kwà Adàmà; aci ke cìvwa “dimiinu.”

330 Kàdi mukàjì wàkapeta Dimiinu. Cìvwa ncinyì? Nzambi Yéyè mwine. “Yéyè ùvwa cibangidilu cyà bufùkì bwà Nzambi.”

331 Mpindyewu tàngilàayi pàakalediibwà Setè, anyì Abèlè, yéyè ùvwa muntu mwakàne, wa kùdì tatwèndè. Setè ùdi mùshindù wùmwèwùmwè awu.

332 Muntu mubì awu mmufùmìne penyì; mushebeyanganyi, mwena mashimi awu? Nwamònu's, nwamònu kùdici cifùmìne anyi? Cìvwa ne cyà kwikala “dimiinu,” bwalu yêyè ùvwa dimiinu; Kaayinà ùvwa muntu.

333 Kaa, bampofò abu bàdi penyì? “Nzambì wa buloba ebu mmubàfòfòmije.” Èè, kabyèna bikèmesha to, mwàkambà Yesù ne muntu nànsha umwe kèna mwà kucimòna to. Nudi numòna anyi?

Wèwè udi wamba ne: “Bwà cinyi kabèèna bàcìmòna?”

334 Yesù wàkambila bayiidi Bèndè, musangu kampànda ne: “Mbinùpèèbwe bwà kumanya Bukalenge bwà Nzambi, kàdi kí mbwòbò to.”

335 Nènku's ki bwà cinyi nudi bafùmìne ku ntàntà wa kilòmèetà binunu bibidi ne nkàmà yinaayi mu nseke ne nseke yònsò, nwamònu's: “Mbinùpèèbwe bwà kumanya Bukalenge.” Tàngilàayi, bakwètù bàdi bàfùmìna mene ne ku Àfrikè wa ku Sud ne mu nyùngulukilu amu, dîbà dyà ndekeelu edi pàdi Mukàji-musèla wènda wènjiibwa bwà kubwela mu Bukalenge.

Ncyèna ànu ne dîbà dikùmbàne to. Mònaayi. Tàngilàayi mpindyewu, nwamònu's.

336 Mpindyewu nudikù mwà kumòna “dimiinu” dyà nyòka mwaba awu, kumòna mwàkacyènzàye anyi? Mbipwàngàne, nwamònu's. Mpindyewu bàmwè bàà kùdibo bàakamba . . .

337 Mpindyewu, bu mulumyana wa mu Tucson wa ditùkù adi, ùteeta . . . Àa, yêyè's ùdi mwà kutèèleja mukàbà wà mèyi ewu. Kàdi, byòbì nànkù, muntu wetù, ndi muswè nkwàmbilèku cintu kampànda.

338 Pàakambàye ne: “Èvà wàkamba ne,” s'ki kùtùbu bàya eku, “ndi mupete mwànà wa balùme wa kùdi Mukalenge, anyi muntu kùdi Mukalenge.” Mòna's, cyà bushùwà. Nzambì ùtu ne mukenji kampànda.

339 Tàngilàayi, nudi nwangata dimiinu nudikùna kuntu kwàka mu budimi kampànda mùdi blé ùsanganyiibwa, kàdi nukùna mingònga kuntwaku. Nànsha byòbì biikàle cinyi, dîbà dimwèdimwè adi ne mvùla umweumwe awu ùdi ùtwàla dimiinu adi ku mwoyi. Nzambì ùdi ne mukenji kampànda, ne mwinè mukenji awu kawèna mwà kunyakajiibwa to.

340 Nànsha byòbì ne—byòbì ne . . . mukàji wa ngiikàdilù mutàmbe bubì mu cimenga emu ne mulùme wa ngiikàdilù mutàmbe bubì awu, nànsha kabàyi basèlàngàne ne bikwàbò byònsò, mbafwànyìne ku—kusangila, kushààla pàmwè ne kulelabò mwànà; bivwa bikèngela bwà mwànà awu kulwayè ku mukenji wà Nzambì, bwalu kakwèna mungà mùshindù to. Kabìyi nànkù to, udi uvwija Sàtaanà mufùki, nènku dîbà adi yêyè n'zambì. Kaa, mùshindù mwinè ùdi mwà kwikala mpofò's wè! Nwamònu's, mukenji wà Nzambì, cyà bushùwà.

341 Wêwè ànu mupetè mwânà wa mu dibòko, nànsha byòbì ne ùvwa ng'Esawù, Yakòbò, nànsha mwikàle nganyi, anyi muntu wa luumù lubì, nànsha bu ne ùvwa n'Yudààsà, bìvwa bìkèngela kulwilayè kùdì Nzambì. Nzambì ùdì ne mukenji kampànda.

342 Bible mmwambè ne: “Dìbà dìdì dikenkeshila bìmpè ne babì; mvùla ùtu ùlòkela baakàne ne bab-...” Ebèlù nshapità mwi6, nènku ùdì wàmba ne: “M—mvùla ùtu ùlwa pa buloba misangu yàbúngì, bwà kubùmuyamina màyi, ne kubùlongolola bwà cidibo babwakàjile, nudi bamanyè's, bwà kutwàla mwoyi; kàdì mèbà ne mingònga bìdì ne mwoyi ku màyi àmwèàmwè awu, muunyà wùmweùmwe awu.” Bwalu, mmukenji wà Nzambì, bwà kubobesha dimiinu ne dimiinu dyònsò, bwà kwenza ne dimiinu dyònsò didipàtula dyòdì diinè.

343 Pa nàнку, bìvwa bìkèngela citwale “dimiinu” dyà nyòka. Ne kacya kacitukù—kacyàkapangishakù Nzambì to; cyàkuuja ndongamu Wendè yònsò nkòong, cyàkaMuvwija Mupikudi. Mpofo kanà yònsò ewu mmufwànyìnekù ànu mwà kucimòna, ànu byòbì ne ncisokoka. “Nzambì wa buloba ebu” ùvwa mukùsokòkeci. Ncitòoke tòò ànu mùdì cintu kanà cyònsò cyùdì mwà kumòna aci. Ki bwalu mbwòbù abu's. Ki “dimiinu” dyèbè dyà nyòka adi's. Mpindyewu mònaayi.

Kàdì: “Yesù ùvwa cibangidilu cyà bufùkì bwà Nzambì.”

344 Mpindyewu mukàjì ùdì wènza cinyi? Pààbì's, civuba cìdì cìfùmìna ku mubidi wa bulùme. Mpindyewu nudi nuvila aci anyi? Mukàjì kèna ne mwoyi munda mwèndè to, nànsha kakesè. Ùdì yèyè ànu ne kaadiyi kakesè cyanààna, cìdì ciikàle budimi pambèlù apa.

345 Ànu mùdì wangata budimi ne ubùbùndulula bwònsò nkòong, ne—ne welamù bwanga bwà twìshi, ne ushipamù twìshi twònsò atu ne bwanga abu. Nènku kakwèna—kakwèna nànsha cisoosà anyi cintu nànsha cimwè cìdì mwà kutòlokamù to; ne pashìishe ubùfukisha cyàkàbìdì, umyaminamù dimiinu kampànda dìmpè. Mwena lukuna yèyè mulwè ne mummyamìne dìngà dimiinu dyà cyanààna, mukenji ùmwèùmwe wà Nzambì newùbobeshè mamiinu wònsò àbìdì awu.

346 Èè, Nzambì kàvwa ne meeji à kwikalabì nàнку to, nwamònu's. Kàdì cyàkenzekà ncinyi?

347 Nwamònu's, bilùme byà kùdì mulùme abi bilwalwà ne tubùlù twà mashi twinè tùdì mashi atu. Mu mashi amu ke mùdì mwoyi's. Nènku bu wèwè kacya... Nkaatu mucibandile, mu disopakaja dyà mamiinu à ngombe ne bintu bu nàнку. Mwanèètù Shakarian ne mèmè twètù kucyangata, ne bangàngàbukà ne bakwàbò, tubandila mùshindù ùvwabi byenzeka, ne benji bàà mishindà. Nwamònu anyi? Pashìishe ki màyi à kùdì mukàjì àlwalwà aa, cìdì ciikàle mushikì wà mayi. Ke bilùme byà kùdì mulùme bilwalwà ebi, cìdì ciikàle musumbà wa bivuba.

348 *Eci* kacyèna ne mutòlokù nànsha mukèsè mu cyôci to. Cidi ànu cintu cyangata ku muntu mulùme awu. Ke mùshindù ùdiye ùbwela mwaba ewu, dyàmbedi, ne yéyè ùdi ànu budimi. Kùdi diyì; didi ne buloba bwà bufukè bwà mwoyi ewu. Nènku mwoyi ewu ùdi ùtentemuka ùdikoka ne munda. Kùdi bwalu busokoka, mùshindù ùdi . . .

349 “Pàmwápa,” múdi wamba, “èè, cyà kumpàla cidi cituutakeena ne diyì. Bikwàbò byònsò bìdi bifwa.” Èè, mùshindù mene, nganyì udi ucisunguluja? “Èè, cyà kumpàla.” Neciikale eci cidi kumutù kwà mulongo anyì; diyì dyà kumpàla didi kumutù kwà mulongo, ne civuba cyà kumpàla anyì? To, to.

350 Ncifwányine kwikala diyì kampànda; lwà paanyimà apu, mu ndekeelu, munkacinkaci mwà bilumè, nekùlwè cilumè kampànda bwà kuya katuutakeena naadi. Bìdi bileeja ne lungenyi kampànda ndùdi lùleeja ne neikale wa mutù mukùnze, anyì mutù mufiike; anyì neikàle mukèsè, munène; mulùme anyì mukàji. Nwamònu anyì? Kwèna mwà, kwèna mwà kwenza cingà cintu pa bwalu abu to; kabyàkukùmbanakù to. Udi mwà kubisambakaja pàmwè, ne bikwàbò byònsò, kabyàkwenza dishiilangana nànsha dikesè to. Nzambi ùdi ùcileeja. Nènku paanyimà pàà katanci, kaacivuba kakesè kàmwèpelè nekàbwelè mu budimi amu, diyì adi. Ciine aci ciikale ne kaamukila kakesè, bu nànkù, pa cyôci aci, kàdinyònda eku ne eku; kàmata, ne kwòkò aku kùtwàdija dinungu dyà mwongo wà mwànà.

351 Yéyè ùdi cinyì dībà adi? Kèna ne dimiinu to. Ùdi ne budimi bwà kwakidila dimiinu. Pa nànkù . . .

352 Nwamònu’s, mwena lukunà wàkapàtuka. Pàvwà mummyaminyi mwîmpè wa mamiinu ùpàtuka, wènda ùmyamina Dimiinu dîmpè; ki mwena lukunà kulwa paanyimà pèndè, wenda ùmyamina dimiinu dyonèke. “Kàdi mvùla ùtu ùlòkela bîmpè ne babì; ne dībà’s.” Bìdi bikèngela bwà byònsò bikòlè.

353 Yesù wàkamba ne: “Bilekèlè bikolelè pàmwè. Mu ditùkù adi nebìswikiibwe bisumbù, lupelà’s.” Nènku bìdi munkaci mwà kuswikiibwa mpindyewu, mu malongolodi manène; byènda bishààla bisumbù binène, Nsangilu wa Buloba bujimà wa Maèkèleeziyà. Nènku ndekeelu ùvwa cinyì? Mbwà kwoshiibwa. Kàdi bikèngela lutete alu bàye naalu mu diyeeba. Nwamònu anyì? Pàabi’s, byònsò bibìdì bìdi ne mwoyi ku cintu cimwècimwè aci, màyi àmwèàmwè awu, mvùla umweumwe awu.

354 Mucì wà didimà, aci’s—aci’s mmucì wà orange, newùkwamè, newikale ne cyà kukwàma; nebikwàminèpu, wôwù musomekapù, cimuma cyà grenade. Newùkwame cimuma cyà mpùsù. Newùkwame cimuma cyà mbòmà. Nwamònu anyì? Kàdi kacyàkwikala cimuma cyà orange to, kàdi cidi ne mwoyi ku mwoyi ùmwèùmwè ùdi mucì wà orange awu ùpàtula.

355 Màngumba mmafinyikiibwe mu Mwonji wà mvinyò. Bwalu, bwòbò bàmba ne “mbeena Kilistò,” bàdi ne mwoyi ku cyôci aci.

Kaayifa ùvwa; nudi bamanyè cìvwaye, kàdi nànsha nàнку yéyè kwamba too ne cipròfetà. Nwamònu anyi? Nwamònu's, bàdi ne mwoyi ku cyôci aci.

³⁵⁶ Kaa, mvw'a kujinga bwà twìkalakù ne lumingu lujimà, bwà twamòna mwà kulonga cintu eci cyònsò, ne kutamba kunùtòòkeshelaci—nwènù bwà kanùpangikù bwà kucimòna. Mpindyewu nènshiyè bìmwè byà ku bintu ebi ku luseke.

³⁵⁷ Mpindyewu tàngilàayi. Tàngilàayi, byanza abi bìvwa bilongolola eci bwà Mukàj'Endè-musèla Munanga, bilongolola mu dinanga dyònsò bwà Mukàj'Endè-musèla.

³⁵⁸ Vùlukàayi ne Nyumà Mwimpè wàkapweka pa Yesù, bu mùdìbi ne, Yesù ùvwa citùpà cyà buloba. Bwà cinyi? Mùtòlokù wà Nzambi, Mwoyi wà Nzambi, wàkatèèkiibwa mu difù dyà muntu mukàji (ncyà bushùwà anyi?), uvwa buloba awu. Èyo. Ki pashìishe Mwoyi wà Nzambi kubwelawu munda, nàнку: "Yéyè ùvwa cibangidilu cyà bufùki bwà Nzambi." Nwamònu anyi? Nènku pashìishe Mashi à Nzambi awu, àvwàmu ku mùtòlokù awu; pààkeediibwàwu paanshi ku Kàlvaryò, kupònawù pa buloba. Bwà cinyi? Bwà kupikula buloba. Mpindyewu, mbubingishiibwe; mbujidiibwe; bubìikidiibwe, ne bulòmbiibwe; nènku mpindyewu bùdi ne cyà kupeta dibàtiiza dyàbù dyà Kapyà, ne kukezudiibwa bwà Yesù ne Mukàj'Endè-musèla.

³⁵⁹ Ne nwènù nudi bitùpà bikwàbò bìdi bipàtùdiibwe mu buloba ebu. Buloba, wèwè udì citùpà cyà buloba; mubidi wèbè awu. Musùùkà wèbè ncitùpà cyà Nzambi, cyambiibwà cyà Nzambi, cileejìibwe patòòke pànu pa buloba mu mubidi kampànda. Bikèngela bwà mubidi awu ùpikudiibwè.

³⁶⁰ Mpindyewu, musùùkà awu mmupikùdiibwe, bwalu ùvwa mu mpèkaatù. Pa nàнку Nzambi wàkatùluka, ku njila wa dibingishiibwa, dijidiibwa, dibàtiiza dyà Nyumà Mwimpè, ne wàkapikula musùùkà wèbè.

³⁶¹ Nènku wèwè, mwikàle citùpà cyà buloba, ncipikùdiibwe ku cyôci aci. Udi mu nshintùlùkilù mpindyewu. Cìdi cyènda cikola. Mubidi wèbè wùvwa mubingishiibwe mu dibàtiiza dyà Noà. Amen! Nènku, mubidi wèbè, pààkamatàYe mwaba awu apu. Ne buloba bùdi ne cyà kusukudiibwa kùdi Kapyà, mwaba wuwikala mwà kusòmbela awu, ne dibàtiiza dyà Nyumà Mwimpè; cisòmbedi bwà Kilistò ne Mukàj'Endè-musèla, Yelusàlèmà Mupyamùpyà.

³⁶² Tàngilàayi Cimenga eci; buloba, kutèèka cisòmbedi cyèndè pa buloba. Mpindyewu nudi mwà kumòna bitòòke tòò mungàmbi, kùdi... dishintuluka edi, buloba bùdi ne cyà kushintuluka. Kabwèna mwà kuBùpeta mùshindù ewu to. Èkèleeziyà kì mmufwànyine kuya... Anyi, bàà pa buloba kì mbafwànyine kutungunuka, paanyimà pàà Bukalenge bwà

bidimu cinunu, kabàyi bashintùlùdiibwe to. Nwamònu anyì? Bwà kupeta Mwaba bu nànkumù, bikèngela bùshintulukè.

363 Ànu bu mutùdi ne cyà kushintuludiibwa kùdi Kapyà Kèndè kàà cijila, twetu pèètù amu, bwà kufikisha mu ngikàdilù ne kwenza kaaba bwà Yèyè kusòmbela munda mwètù; mbwena kwamba ne, Nyumà Mwimpè.

364 Mònaayi mpindyewu ne, nekwikalè mwaba wàbùngì mu Buloba Bupyabùpyà. Uh-huh. Nwamònu's, mwaba wàbùngì! Nebùvwijiludiibwè bupyabùpyà, aci's mbulelèlè, ku Kapyà, kàdi kakwàkwikala kàbidi mbù to. Mònaayi ne, Cimenga aci cidi ne kilòmèètà binunu bibìdi ne nkàmà yìnaayi mu nseke yònsò.

365 Mpindyewu tèlèjààyi ne ntèmà menemene patùdi tuzòla bipaapu ebi apa. Ndi muswe kukùpula ku mboodi, ànu bwà katancì kakesè cyanààna.

366 Dibuuulula dyà ndòndò ndyòdi edi dyà kùdi Nzambì. Apa, nèngiimanyikilè ànu kaaba aka. Nànsha umwe wa ku bikwàbò ebi. . . Nènyiishè bikwàbò ebi, bu Mukalenge mwà kwanyisha.

367 Mònaayi mpindyewu ne buloba bùdi. . . Èè, nwènù buulùlaayi mu Mukàndà wà Bwàkabuulwibwà, nudi mwà kumòna mwàkacìpimàye ne nkùbità ne ku ntàntà. Binunu makumi àbìdi ne bisàtù. . . Nànku mpindyewu tudi tusangana ne Cimenga aci—aci ncipimiibwe ne: “kilòmèètà binunu bibìdi ne nkàmà yìnaayi” ku nseke yònsò.

368 Nudi bamanyè ntàntà udicì mwà kukafika anyì? Mwua mucìpime cyònsò, lumingu elu. Cidi mwà kuumukila ku Maine too ne ku Floride, ne kuumukila ku mwelelu wà mbù wa esètè kupìta too ne pa kilòmèètà nkàmà citèèmà ne makumi àsambòmbò, lwà ku wesètè kwà Mississippi. Mu ngaakwilù mukwàbò, cyàbibìdi cyà États-Unis, ànu bwà Cimenga aci.

Wèwè ùdi wàmà ne: “Kakwènakù mwaba to.”

369 Pìikalà mbù muumuke nekwikale mwaba, bwalu pabwìpì ne byàbìtaanu binaayi byà buloba bìdi mu màyi. Ncyà bushùwà anyì? Cikùminà cidi cyùmisha mbù, citayisha buloba. Kaa, ekèlekèlè! Vùlukàayi ne, mu ntàntà wa kilòmèètà binunu bibìdi ne nkàmà yìnaayi mu nseke yònsò, n'Cimenga kaayipu's wè! Nènku, kàdi, nwavùlukaayi ne, mbù mmumane kuuma.

370 “Nènku bucyàmà ne butùmbùke bìdi dyàcimwè.” Aci mbwena kwamba ne kilòmèètà binunu bibìdi ne nkàmà yìnaayi mu elu luseke, kilòmèètà binunu bibìdi ne nkàmà yìnaayi mu *luàlwa* luseke; kilòmèètà binunu bibìdi ne nkàmà yìnaayi; mu bule mu bucyàmà ne mu butùmbùke. Kilòmèètà binunu bibìdi ne nkàmà yìnaayi, elàayiibi meejikù, ngòlò wa lumwenu. Kàdi Cimenga aci cìvwa cinyungulula ne cimanu.

371 Mpindyewu, mpindyewu, aci kaciyèna ànu menemene cyùmvwija, ku diikala bule mùmwè. . . Cidi cyàmà ne: “Ne bimanu ne cishimikidi bivwa mùmwè,” aci kaciyèna ànu

menemene cyùmvwija ne ncipaapu cyà nseke yinaayi yà mupimbu ùmwè anyi cyà nseke yinaayi yà bule mùmwè to. Kùdi cikwàbò cipiminu cyà maalu à buloba, mùdì bunène bwà mwomùmwè, mbwena kwamba ne, cipaapu cyà musàkà. Cyà nseke yinaayi yà mwomùmwè ne: “cifwàngàne ne cyà nseke yinaayi,” ne bimanu bìvwa mùmwè.

³⁷² Lekèlaayi ncizòlè. Nwamònu’s: bule, bucyàmà, butùmbùke. Netùbwele mu cintu kampànda, ncyà bushùwà ànu menemene. Nwamònu anyi? Mònaayi ne, bunène bwà *edi* ditumba bùdi bwà mwomùmwè menemene, bwònsò bwàwù, bule ku—ku butùmbùke. Kùdi cipimu cikwàbò, cipaapu cyà musàkà, cidi cìcijaadikà.

³⁷³ Eci, bu mùdici mùshindù ewu, ncifwànyine kwandamuna ànu menemene cimanyinu cyà Henòkà mu Èjiipitù, cipaapu cyà musàkà aci. Mmwòmò anyi? Henòkà, kumpàlà kwà kabùtù kàà mvulà yà Noà, pàvwa dibingishiibwa dìbwela, wàkapàtula cimanyinu, ne mu cipaapu cyà musàkà eci mùdi bibàndilu mwandamutekètè bìya bitàngile ku cibambalu cyà mfùmù. Tàngilàayi pa cibàndilu cyà mwandamutekète, panwikalà ní nukàadikù balonge bunène bwà cipaapu cyà musàkà, cidi cìpàtukà bwà kwangata mwenyi, bwà kumufikisha kùdi mfùmù. Tàngilàayi ne nciikishilu cyà nganyi cidi cìsanganyibwa mwaba awu, nènku nenùmòne ditùkù mutùdi ne mwoyi, mu cipaapu cyà musàkà aci.

³⁷⁴ Mpindyewu, Nzambì wàkenza Bible yisàtù. Mpindyewu, kùdi dilongesha dyà cipaapu cyà musàkà dìdì dyà lukutukutu, kàdi kùdi cipaapu cyà musàkà cishùwashùwàlè. Nwamònu anyi? Mònaayi. Mpindyewu, Nzambì, Bible wa kumpàla . . . Yèyè wàkenza yisàtù. Bikèngela kwikale bintu byònsò mu bisàtù.

³⁷⁵ Yesù ùdi ùlwa misangu yisàtù. Wàkalwa, musangu kampànda, bwà kupikula Mukàj’Èndè-musèla; musangu ùdi ùlondà, bwà kwangata Mukàj’Èndè-musèla; musangu ùdi ùlondà, ne Mukàj’Èndè-musèla. Nwamònu anyi?

³⁷⁶ Mpindyewu mònaayi mùdibi bilenga byà dikèma. Nwamònu anyi? Nènku mu cipaapu cyà musàkà eci mùvwa bibàndilu mwandamutekètè, ne pashiishe cibambalu cyà mfùmù. Ne tudi mu cikondo cyà mwandamutekètè cyà èkèleeziyà, bangabanga ne Mfùmù kwangatayè Nkwasa Wendè wa butùmbi. Nènku, vùlukàayi ne, cipaapu cyà musàkà aci kacyàkatèèkiibwakù dibwe dyà mùsongà kumutù to.

³⁷⁷ Bible wa kumpàla wa Nzambì ùvwa mu maulu, Cidiminanzaji; ùdi ùbanga ne wènda ùpicila mu cikondo ne cikondo cyònsò. Cyà kumpàla, ntwàdijilu wa Cidiminanzaji, ùdi m’virgò; ki mwàkalwàYe, dyàmbedi. Cimfwànyì cyà ndekeelu mu Cidiminanzaji cidi n’Leo nyama wa ntambwe; Dilwa diibìdi. Kumpàla menemene kwà kwikalaku mishipa micyamàkàne, cidi

ciikàle cikondo cyà kànsèrè aci; mutùdì ne mwoyi mpindyewu emu.

378 Kùvwa cipaapu cyà musàkà paanyimà pàà cyôci aci, Henòkà, wâkafila bujaadiki ànu menemene awu. Katwèna bafwànyine kupeta díbà dyà kubwelamu to, kàdi, dîngà ditùkù, ku dikwàcisha dyà Nzambì, nènùleejè, kuzòla ànu menemene bunène bwà díbà ditùdimu ne mwoyi edi. Nwamònu anyi?

379 Mònaayi ne, kàdi cipimu cyà maalu à buloba citùdì naaci mpindyewu eci, cìdì ne bunène bwà dyàcimwè aci, kacyèna ànu ciswa kwamba ànu menemene ne bikèngela ciikale cipaapu cyà—cyà nseke yinaayi yà mupimbu to. Mònaayi ne, eci ncifwànyine kwandamuna cyà Ejiipitù. . . anyi cimanyinu cyà Henòkà mu Ejiipitù.

380 Mu cikondo cyà dikezudiibwa dyà buloba, ku dibàtiiza dyàbù dyà Kapyà adi, nekwikalè volcan, mu mùshindù wà buloba ebu butaayika, ne nebùpatule Mukùnà bu cipaapu cyà musàkà. Nwamònu anyi? Mwaba bûngì cyanàànà bwà kucyènta! Cintu cyònsò eci mu kaabujimà necishintulukè. Bwalabàla bujimà bwà buloba nebùshintulukè. Nudi bacyùmve anyi? Necisùkume Mukùnà bu cipaapu cyà musàkà.

381 Eci ncifwànyine kwikala menemene ne Dìyì cyôci mwà kucyènta, ke cyènzaci mene. Mpindyewu mònaayi, bwalu, mu Yeshàayi 65:25, mutùdì tubala emu, mmùdiYe mwâmbè.

Kabàakwenzelanganana bibi anyi kubùtulanganana mu mukùnà wànyì wònsò wà cijila amu to, mùdì MUKALENGE wàmba.

382 Kaa! “Mukùnà Wànyì wònsò wà cijila!” Vùlukàayi ne, citu misangu yònsò ànu “Mukùnà.”

383 Bimanu biikala ànu byolòlòke buludi kuulu ne paanshi, Cimenga aci civwa cifwànyine ànu kwikala cimwèneshiibwe lwà pambèlù. . . anyi lwà munda, Nkwasa wa butùmbi ùdi ànu mwà kumwèneshiibwa lwà munda; kàdi mònaayi ne ncifwànyine kumwèneshiibwa ànu lwà munda.

Kàdi mpindyewu tudi tumòna mulayi wà Yeshàayi 4:5. Tùcibalàayi ànu cyanàànà.

384 Nudi mu dilwijakaja anyi? [Disangisha didi dyàmbe ne: “To.”—Muf.] To, kanwikadikù mu dilwijakaja mpindyewu to. Tudi—tudi—tudi ku—ku cintu cyà pabwàci mpindyewu, díbà dyàbûngì menemene—dyàbûngì menemene—dinùdì ne cyà kuumvwila ànu mwab’ewu. Bwalu, ndi muswè kutòkkesha cyôci eci. Ne pashiishe patwàlukilà cyàkàbìdì ku cyôci aci, Nèn—nènùleeje díbà adi mwaba utùdì—patùdì twakwila bwalu abu, ciikalàci, mu dilonga dyètù didi dilonda pa bwalu ebu, dikwàbò díbà.

385 Kaa, Mukalenge Yesù àtumbè! Tàngilàayi kùnweku, mùdì Mèyì kaayi mwà kupangila to. Mpindyewu tàngilàayi mu

Yeshàayi emu. Ndi naaci cifunda kaaba aka, bu mémè mwà kucipeta cyàkàbidi, katanci kakesè cyanààna. Yeshàayi 4:5. Mpindyewu tèelejàayi, ùdi wàkula bwà Dilwa dyà Mukalenge, mùdi bakàji mwà kwikala ne nsòmbelu wa masandi wa dikemà. Kaa, yèyè ne: “Bakàji mwandamutekète. . .” Tèelejàayi, tucibalàayi ànu cyanààna, tàngilàayi kùnweku:

Nènku mu ditùkù adi bakàji mwandamutekète nebakwate mulùme umwe, bamba ne: Twètù netùdidiishe dyàmpà dyètù, . . . kudìwàdika cyètù cilàmbà: tùlekèle ànu tubùkidiùbwe ku dìnà dyèbè, bwà kutùumusha bundù bwètù.

³⁸⁶ Ke cikondo cyà nshìikidilu ncyòci aci, citùdi ne mwoyi mpindyewu eci; dibàkà, dishipa dyà dibàkà, ne bundumbà, ne bikwàbò byònsò.

Mu ditùkù adi ditàmbà dyà MUKALENGE nedùikalà dilenga ne dyà butùmbi, . . . cimuma cyà buloba necùikale citàmbe bwìmpè ne cilenga kumòna. . . bwà aba. . . bapàndùkè bàà Izàlèèlà. (Mùshindù mwine ùdi mupàndùke ku dipiishiiibwa dyònsò adi's wè! Nwamònu anyi?)

Ne nebyènzekè ne, ewu udi mushààle mu Sìonà, ne ewu udi mushààdilè mu Yelusàlèmà awu, nebùikale. . . (Tumònàayi.) . . mu Yelusàlèmà, nebàmubùikile ne wa cijila, ne ewu yònsò mene udi mufùndiùbwe munkaci mwà bàdi ne mwoyi mu Yelusàlèmà awu, nwamònu's:

Mwìkalà Mukalenge musukùle bukooya bwà mwànà wa bakàji wa mu Sìonà, (vùlukàayi ne, aci cidi misangu yònsò ànu Mukàji-musèla, nwamònu's) . . . ne nebàkezulè mashi à Yelusàlèmà (abu mbàshààdilè bàà beena Yudà, kusangisha ne Mukàji-musèla, nwamònu's) . . . ne munkaci mwàci ne nyumà wa cilumbulwidi, kapyà. . .

³⁸⁷ Aci's cidi misangu yònsò ànu cilumbulwidi cyà Nzambì, pàdiYe wènza dilumbulwisha Dyèndè dyà ndekeelu. Ukubiikila, ùkubingisha, ne ùkutwàla ku bupikudi; dìbà adi cilumbulwidi Cyèndè cidi cibwayika pambidi pèèbè, ne Nyumà Mwìmpè ne Kapyà bikezula mpèkaatù awu. Dìbà adi wèwè udi Wendè.

³⁸⁸ Cintu cimwècimwè aci cidiYe wènza pa buloba, pàdiYe ùbùpicishila ku Kapyà ne: “ne ku nyumà wa ùlàkuka kapyà.” Mpindyewu tàngilàayi. Tèelejàayi! Nudikù anyi?

Nènku MUKALENGE neàfukè pa mwaba wònsò wà cisòmbedi cyà mukùnà wà Sìonà, ne pa disangisha dyèndè, ditutu dyà mwìshì mundaamuunya, ne dibàlakana dyà. . . kapyà butùku: bwalu pa butùmbi bwònsò nepùikale ngabu.

389 [Mwanèètù Branham ùdi ùleejila ku mboodi—Muf.] “Mukalenge, mu ditùkù adi, pa lusongo lwàcì apu, neàfukè Kapyà kàà Bukênkè bwà kwosha mu ditùkù adi.” Nènku cìdi cìtùngunuka cyàmba ne: “Neciikalè cisokomenu, diikisha, cinyeemenu.” Mònaayi ne, wènza ànu menemene dyakula dyà Bible, ànu menemene. Bu ne bimanu bivwa bilulàme kuulu ne paanshì, kanwèna bafwànyine kucimòna. Cìvwa ne cyà kwìnama. “Mukùnà Wànyì wònsò wa cijila . . .” “Yèyè neàfukè Bukênkè ebu pa Mukùnà ewu, ne nebwikalè bu ngabu.” Kaa, twètù’s tutu twimba musambu awu wà ne:

Kaa, Cimenga aci pa Mukùnà wà Siònà,
Mèmè bu mwena lwendu, kàdi ncidi ànu
mucinange;
Mpindyewu ne mu bikondo abi,
Pangààfika ku Cimenga aci pa Kakùnà apu.
(Nwamònu anyì?)

390 Mònaayi ne, Mukùnà wà Sinàayi ùvwa mmwaba wàkapwekà Nzambì ku lusongo lwàwu aku, pààkaakulaYe ne Izàlèèlà mu Dikunji dyà Kapyà. Wàkapweka ku lusongo lwà mukùnà, Mukùnà wà Sinàayi.

391 Pa Mukùnà wà Dikùdimuka dyà mpàla, pàakambàYe ne: “Ewu m’Mwan’Àanyi munanga; Mutèlèlèjaayi,” Wàkapweka mu Dikunji dyà Bukênkè ne kubàlakana ne bukênkè, pa lusongo lwà mukùnà, kumpàla kwà Peetèlò, Yakòbò, ne Yone. Nènku, mwômò amu, Yèyè ùvwa muleejìibwe ne Mòsà ne Eliyà bwònsò bàbìdì; bàdì bashintùlùdìibwe, ne bafwè babiishìibwe ku lufù. Butùmbi’s wè!

392 Cimenga Cipyacìpyà ne Buloba Bupyabùpyà; bufùkì bupyabùpyà; Cimenga pa Kakùnà, ne Nkwasa wa butùmbi ku lusongo lwàkù. [Mwanèètù Branham ùdi ùzòla bimfwànyì ku mboodi mu tusùmbù twà milongo tùdì tùlonda atu—Muf.] Nkwasa wa butùmbi lwà luulu *eku*, ku lusongo, ne beenamù, kuulu kwònsò ne paanshì, pa Mukùnà ewu.

393 Ne cimanu cìdì ciwùnyùngulukile eci aci, cìvwa ne bishimikidi dikùmi ne bibìdì. Ne yònsò wa kùdìbo ùvwa ne dibwe dyà pa cyàdì òvwa mu Aalònà adi, diine òvwa dìleeja bisàmbà dikumi ne bibìdì byà Izàlèèlà adi.

394 Nènku, mu biibi, bàvwa ne biibi binaayi bitèèka ànu menemene mùvwà ntempèlù mu cipèèlà amu, mùvwà ntentà mu cipèèlà amu. Mònaayi ne muntu ne muntu, ùvwa—ùvwa ne bàpostòlò, bàsàtù ku luseke ne ku luseke, bàpostòlò dikumi ne bàbìdì. Yònsò. . . Nènku cìvwa ne butùmbùke bwà nkùbità lukàmà ne makumi ànaayi ne yìnaayi. Nkùbità lukàmà makumi ànaayi ne yìnaayi yìdì yènza ànu menemene byàlà nkàmà yìbìdì ne dikumi ne bisambòmbò, ùvwija dyònsò dyà ku mabwe manène awu ipacila bule bwà makàsà makumi àbìdì, cibwikilu cyà pa

cyàdi mu ciibi aci, bàbàndisha cimanu cìvwà cinyùngùlùkile Cimenga aci.

³⁹⁵ Mpindyewu cidi, Cimenga aci, kacýèna cìikishila pa lusongo lwà cimanu to, bwalu cimenga, kilòmèètà binunu bibìdì ne nkàmà yìnaayi, kacìvwà mwà kwenza nànkù to. Neimanu *mwab'ewu* cinùdì nubwelelamu, bu mùdì biibi byà Yelusàlèrà wa kale awu. Nudi nubwelela mu cimanu, nubwela mu cyòci aci.

³⁹⁶ Nènku yònsò wa ku yòyi eyi, ùvwà ne bishimikidi dikùmi ne bibìdì, ne cyònsò cìvwà ne diikala dyà màyi à matàmbe ne mabwe mashiilàngàne, bivwà bileeja bisà dikumi ne bibìdì byà Izalèlèlà.

³⁹⁷ Nènku bàpostòlò, yònsò ne yònsò, kuulu kwà ciibi cinène, cicolè, pàvwà dìnà dyà mùpostòlò kampànda. Kàdi Yesù kàakambakù ne: “Nenùsòmbe pa nkwasà yà butùmbe dikùmi ne yìbìdì, nulumbulwisha bisàmbà dikùmi ne bibìdì byà Izalèlèlà anyi”? Nganyi uvwa musòmbe ku ciibi aku awu, bwà kulumbulwisha, pàakabwelabo mu Cimenga aci? Kaa, ekèlekèlè! Ki bwalu mbwòbù abu's. Bamfùmù bàà buloba bàbwela mu Cimenga aci, bàlwa kumpàlà kwà mulumbulwishi wa cìpostòlò awu, bu mwàkalayà Yesù. Kaa, ekèlekèlè!

³⁹⁸ Pa Nkwasa wa butùmbe ewu, kumutù kwèndè, mu butùmbùkè bwà kilòmèètà binunu makùmi àbìdì ne bìnaayi, buloba bujimà nebùmonè Bukènkè bwà bàà pa buloba, Yesù, musòmbe pa Nkwasa wa butùmbe pamutù pàà buloba, kumutù kwà Èkèleeziyà, ku lusongo lwà Mukùnà wà Sìonà; udi mwikalè kilòmèètà binunu bibìdì ne nkàmà yìnaayi, cyàbìbìdì cyà Ètats-Unis, ne ùbànda muulu too ne panùdì mwà kuMumòna buloba bujimà, mu butùmbùkè bwà kilòmèètà binunu bibìdì ne nkàmà yìnaayi.

³⁹⁹ Ne mu dibànda dyònsò ne mu dipweka *emu*, ke mwikalà Bapikula. Nemwikalè nzùbu yà ngòlò mukezùke. Nekwikale misèèsù, ne myaba yà dipìcishila kapeepà, ne mpangu yà bilòngò. Ne Musùlù wà Mwoyi ùlwa, ùpòngoloka ùfùmìna ku Nkwasa wa butùmbe, ne wènda ùpwekela mu bipòngòpòngò bikesè ne, kaa, lwà mu myaba myalàbàle ayi. Nènku Muci wà Mwoyi newelè bilòngò mu cìpaapu cyònsò; ne ùkwama mamuma Àwù, misangu dikùmi ne yìbìdì ku cidimu, mamuma mashintùlùke ku ngondo ne ku ngondo yònsò.

⁴⁰⁰ Ne bamfùmù bàà pa buloba nebàbwelèmu ne nebàlwe ne luumù lwàbò. “Ne mabèjì àdi bwà dyondopiibwa dyà matùnga,” pàdì bamfùmù bàsanganyiibwa mu ditalala kuntwaku. Pàdìbò bàpàtuka, nebàmbule mucì, bàtùlùkà dibèjì mùshindù *awu*. Bu mwàkaalukilà nkuci, bwà ne cìiji cicolè cyà Nzambi cìkaavwa cijike, ne mutwàle dibèjì dyà mucì wà houx mu bwàtu. Nànkù pàdì mfùmù ùùmuka, pa kutwàla butùmbe bwèndè mu cibambalu cyà Mukàjì-musèla muneemu mu Cimenga emu, yèyè neàtwàdilé mfùmù mutumba nendè dibèjì,

ne: “Tudi mu ditalala bwà kashidi.” Amen! Dyondopiibwa dyà matunga! “Byònsò mbijike. Musangu kampànda tuvwa tulwanganyishangana bwà mashi à muntu ne mukwèndè, mwanèètù. Ke twètù kunanga, ne kwela mbilà; kutuuta bingoma, ne kwosha bânà, ne bikwàbò byònsò. Kàdi mpindyewu kùdi ditalala, dyondopiibwa.” Kî ndyondopiibwa dyà disaamà to; byònsò mbyenjìibwe. Dyondopiibwa dyà ditunga! Amen!

⁴⁰¹ Cimenga ciikàle ne Nkwasa wa butùmbi ku lusongo. Bwàkabuulwibwà 21:23, “Ne kabèèna bàkèngela bukènkè to, bwalu Mwànà wa mùkòòkò ne Mukalenge Nzambi ke udi Bukènkè bwàbù.” Nwamònu anyi? Mukalenge Nzambi ke Dikunji dyà Kapyà dyàkalondà bânà bàà Izàlèèlà mu cipèèlà adi. Ne Yèyè wàkabànda pa Nkwasa wa butùmbi, mu Bukalenge bupwàngàne abu. . . pàdi cikondo. . . “Bukalenge bùdi Yesù ne cyà kulekeleela Taatù, bwà Nzambi wàmòna mwà kwikala byònsò, ne mu bwònsò.” Yesù mmusòmbe pa Nkwasa Wendè wa butùmbi mwab’ewu bu wetù Yòzefù. Ne Mfùmù awu ki Bukènkè bwikale ku lusongo lwà Mukùnà wà Sionà, ne Bukènkè Bwèndè bwà cijila abu nebùpaasalè mu Cimenga cijimà amu. Àlèluuyàh!

⁴⁰² Butùmbùke bwà kilòmèètà binunu bibìdi ne nkàmà yinaayi, ne kilòmèètà binunu bibìdi ne nkàmà yinaayi mu nseke yònsò, ne mpàlàdiizò yà Nzambi miibaka mu Cimenga aci cyònsò; mu misèèsù, ne bàlàbalà! Balàayi Bwàkabuulwibwà bwènù 21, tàngilàayi numònebi ní kî ncyà bushùwà. Nwamònu’s: “Kabèèna dijinga ne bukènkè mwaba awu to, bwalu Mwànà wa mùkòòkò m’Bukènkè.” Ne pa Nkwasa wa butùmbi pàdi mwà kumwèka, basòmbeputù, mu ntàntà wa kilòmèètà binunu bibìdi ne nkàmà yinaayi.

⁴⁰³ Kacyèna ciya cyolòlòke buludi cibànde mùshindù *ewu* to. Nciinàmekù, bu mùdi cipaapu cyà musàkà amu. Bu cyòci mwà kwikala cyàbibìdi cimwè cyà ntàntà awu, dìbà adi’s ncifwànyine kwikala bu cidi cibànda nùnkù *ewu*, nudi numòna’s, kuumuka ku cimenga kampànda kuya ku cikwàbò. . . mpindyewu bu nwènù mwà kumòna, kuumukila ku luseke lùmwe lwà Cimenga kuya ku lukwàbò.

⁴⁰⁴ Ndi mwà kusàkidila kantu kakesè kampànda kaaba aka bu nwènù baswè bwà mèmè kwenza nànkù. Nuvwaku bamòne kasùmbù kakesè aku mwab’ewu anyi? Bidi ànu bu citùpà aci, cijèngù cidìku kàbwikidija aku. Mu Géorgie, mu Californie, ku Saskatchewan; kuumukila mu Kansas, too ne ku mwelelu wà mabwe à ku Maine; ki cidi cisangile ncyòci aci. Ki cidi bu cileejiibwe kaaba aka mene, mu ntàntà wa kilòmèètà mitwè ku binunu bibìdi ne nkàmà yinaayi ku nseke yònsò.

Kaa, mbafùmine ku Esètè ne ku Wesètè,
Mhafùmine ku buloba bwà kulekùle,

Ku difestò ne Mfùmù wetù; bwà kudyà. . .

(Bwalu kaayi? “Muntu kààkwikala ne mwoyi

ànu ku dyâmpà nkààyadi to.” Ku Dyâmpà,
Dìyì!) . . . bwà kudyà bu beenyi Bèndè;
Mùshindù mwine udi beena lwendu aba
babènèshìibwe’s wè!

Mu buloba ebu, bikèngela ngàmbè ne, ncitukù mwanji
kumòna bantu bu bwòbò abu to.

Kaa, kubandila mpàla wendè wa cijila
Ùkenka ne Bukênkè bwà Nzambi;
Baabanyanganyi babènèshìibwe bàà ngàsà
Wendè,
Bu masàngà à ku cifulu Cyèndè cyà butùmbi
netùbàlakanè.
Kaa, Yesù ùlwalwa kataàtaakà,
Dìbà adi ntàtù yètù neyijjike.
Kaa, ambàbi túng bu Mukalenge wetù mwà
kulwa pa dìbà edi?

⁴⁰⁵ Kabyàkunènga to. Byònsò mbipwàngàne. Bilondèshìle
maalu à buloba, Sodoma, baamisànjeelà; bintu byònsò bisòmbe
ànu mu byòbi menemene. Nwamònu anyi? Cìdi cyùmvwija
cinyi? Anji elààyibi ànu meeji, kulwa ku kaatabernacle kakesè
kàmwèpelè aka, bàfùmìna mu ntàntà wa kilòmèètà binunu
bibìdi ne nkàmà yìnaayi mu nseke yònsò, kuumukila ku cipaapu
cìmwècìmwè aci.

⁴⁰⁶ Bwà cinyi Nzambi wàkeela meeji bikolè ne kucyùka bikolè
bwà kaaba kakesè kàà Pàlèstinà aku, nwamònu’s, pààkù
kiikàle ànu kaaba kakesè nàka? Kàdi ànu mwómò amu ke
mùdì ntempèlù ùsanganyibwa. Ke mwaba wikalà Yelusàlèma
Mupyamùpyà mwà kujuukila, mwaba awu mene. “Olèvà,
Munkùnà wà Olèvà newùpandike bipese, cipese ku dyàbalùme
ne ku dyàbakàjì,” bushùwà, pààdisukumawu ùumukila mwinshi
mutàngile muulu. Kì ne, bàdi bàmba ne, ùdi ùdisaka bipese
bibìdi mùshindù *ewu* to. Ùdi ùdisàka ùbànda: “Mu ditùkù
adi pàdi Ye udyata makàsà Èndè à cijila pa Mukùnà apu.”
Mònaayi ne, pa Nkwasa Wendè wa butùmbi, mu butùmbùkè bwà
kilòmèètà binunu bibìdi ne nkàmà yìnaayi’s!

⁴⁰⁷ Vùlukàayi ne, Sàtaanà wàkateeta bwà kuMwela butèyi,
musangu kampànda, ku lusongo lwà mukùnà kampànda.
Nwamònu anyi?

⁴⁰⁸ Cimenga Cipyacìpyà cìdi ne bishimikidi dikùmi ne bibìdi,
mutùvwà bacimòne amu, bankambwà dikùmi ne bàbìdi; nkùbità
lukàmà ne makùmi ànaayi ne yìnaayi; bu mùvwà cibwikilu cyà
pa cyàdi cyà Aalònà; biibi dikùmi ne bibìdi byà masàngà, mènà
dikumi ne àbìdi a bayiidi.

⁴⁰⁹ Yesù mwimàne, Dibwe dyà mùsongà, pa Nkwasa wa
butùmbi, piikalà bansantu Bèndè baMwàsè cifulu cyà butùmbi
ne: “Mfùmù wa bamfùmù, Mukalenge wa bakalenge.” Kàdi
Yèyè’s ke Dibwe dyà mùsongà.

⁴¹⁰ Ncyèna ne mpùtùmùnyi wanyì to. Kàdi bu nwênù mwà kumòna mu mpùtùmùnyi webè amu, pawikala ne kabèji kaa ndola umwe, bàdipù ne cìtampì cyà États-Unis; mukanku ku ditengu kampànda, kacya wàkwàta mafùma, bipàkù byà makolè à ditunga, ànu mwàkadibi amu; ne ku ditengu dikwàbò aku, didi ne cipaapu cyà musàkà, ne dísù dyà dimòna byònsò ku lusongo lwàci aku. Nwamònu's, kabàvwa bamanyè cìvwàbo bènza aci to. Nènku ànu pòpò apu mbafùnde mu Latin, nènku nenùsanganè ne cidi cicyàmba, eci ke "cìtampì cinène." Kabàvwa bamanyè cìvwàbo bènza aci to. Nànsha Kaayifà pèndè kàvwa mumanyè ne ùvwa munkaci mwà kwamba cipròfètà to.

⁴¹¹ [Mwanèètù Branham ùdi ùleeja mukàndà ku mboodi wa mamanyisha—Muf.] Ke Cìtampì Cinènè ncyòcì eci. S'ki cyòcì eci, nwamònu's, Cimenga aci. Kacyèna ànu kapeyipeyi kàà mupimbu mukèsè bu *nùnkù* to, nwamònu's, kàdi nciinàmeku bwà cyàmòna mwà kumwèneshiibwakù. Ne pa Mukùnà wà cijila wà Mukalenge ewu, Mukalenge neàtuulukè pa lusongo lwà Mukùnà Wèndè; s'ki Yèyè *ewu*. Ki bwà cinyi dibwe dyà mùsongà adi kadivwa ditèèkiibwe kùdi Henòkà to. Nwamònu anyi? Ki bwà cinyi bidi bikèngela bwà Dibwe dyà mùsongà kulwadi mpindyewu. Ne Mukùnà newùsàkiibwè muulu, nènku newiikalè Mukùnà wà Mukalenge.

⁴¹² Ne *mwòmò emu* ke mwàsòmbela Bapikula. *Ebi*, misèsù ne bibeeba binène ebi, ànu mwàkadibi, myaba yà dipìcishila kapeepà, ne Musùlù wà Mwoyi newùpweke, ùpìcila ànumù. Ne nzùbu ne nzùbu yònsò neikale mwenza ne ngòlò wa lumwenu. Ne misèsù neikale myenza ne ngòlò. Ne micì yà Mwoyi neyiikalèku, ne neyikwàme bimuma mìshindù dikùmi ne yìbidi. Ne bamfùmù ne bantu bàà luumù bàà pa buloba nebàtwalè luumù ne butùmbi mu biibi abi. Ne biibi abi kabyàkukàngiibwa butùku to, bwalu kamwèna butùku nànsha.

Mu Cimenga aci mùdi Mwànà wa mùkòòkò
mwikàle Bukènkè,
Mu Cimenga aci mùdi kamùyikù butùku
bùlwa;
Ndimù ne nzùbu udi kàyì lutàtù ne
tuninganyinga,
Kaa, mèmè's nyààya mwaba udi Mwànà wa
mùkòòkò mwikale Bukènkè.

⁴¹³ Kanwènaayikù numòna ne bimenga, nsesa, nzùbu, bisòmbedi, bidi—bidi byàkula bwà aci mpindyewu anyi? Bintu byònsò byà mu bufùki ebi mmundidìmbi cyaààna.

⁴¹⁴ Angàtaayi mundidìmbi, ku bule kwàka, mùdi cyaanza cyànyi emu. Bangabanga ne kwikalakù ci—cilelèlà... anyi ciibùlòji, bikèngela kwikalè cilelèlà. Nènku, nudi numòna's, mundidìmbi awu, ùdi ùmweka ànu bu nè ndi ne minu dikumi ne ibidi, kàdi pashiishe paùdi uya kabitwàngaja pàmwè, bidi—bidi bikashààla

cintu címwèpelè, nènkù dîbà adi mundìdimbì ùdi ùjìminangana muy cyanza.

415 Nènkù aci's, misangu yàbûngì, bantu bàtu bèèla meeji ne kùdi Nzambì yisàtù anyì yìnaayi. Nudi nutàngila kule menemene mu malongolodi à ntwàdijilu awu. Nwamònu anyì? Tungunukàayi ànu ne kupweka ne, nudi nusangana ne, sùmìnyinàayi too ne munwàsangana ne kùdi ànu Umwèpelè. Aci's mmwòmò menemene.

416 Kùdi Mukàji-musèla umwèpelè; kabeena dikumi ne bàbìdì, màngumba to. Kàdi Mukàji-musèla umwèpelè, s'ki Musungula awu, pambèlù pàa yònsò. . .pambèlù pàa—pambèlù pàa buloba bùkaavwà bumana kulongolwela eci abu, aba bàdì mwà kujingulula kaaba kààbò mu Bukalenge.

417 Pa Nkwasa wa butùmbi ewu, tàngilàayi, mutùmbùke bikolè! Cimenga Cipyacipyà; ciikàle ne bishimikidi; biibi dikùmi ne bìbìdì; Yesù, Dibwe dyà mùsongà; bàpostòlò, bàdì bàlumbulwisha; bisàmbà dikùmi ne bìbìdì.

418 Cipaapu cyà musàkà cyà Henòkà aci kaciyì cìfila mundìdimbì nànsha ùmwè mu cikondo nànsha címwè cyà ditùkù to. Mwà nsanganyìbwa mu Èjiipitù, ku bipaapu byà misàkà abi. Mbijaadikiibwe menemene bilondèshìle maalu à buloba, ne mu bipiminu byà cipaapu cinène cyà bipaapu eci; bwà ne, dîbà nànsha dyòdì disanganyìbwa penyì, kakwènakù mundìdimbì mu nyùgululukilu wa cipaapu cyà musàkà aci to. Nwamònu mùdìci anyì?

419 Kàdi kamwàkwikalakù butùku to. Yèyè pa lusongo lwà Mukùnà, ùdi ùpàtùnkumwina butùmbi Bwèndè. Bukènkè Bwèndè bwà Butùmbi nebwikalèmu dîbà dyònsò. Kamwàkwikala bufùku to. Yesù, Dibwe dyà mùsongà!

420 Mpindyewu mònaayi. Pa nànkù, Bapikula nebèndelè mu Bukènkè. Tudi twimba mpindyewu ne: "Netwèndelè mu Bukènkè, Bukènkè bulenga abu." Kùdi cintu kampànda munda mwètù ciikàle cibìikila bwà kupàtuka. "Mbuumùke ku lufù bayè ku Mwoyi." Mbwalu aci ncindìle. Nwamònu anyì? Aci's ki cìdì cyambiibwa, citùdì tuumvwa aci.

421 Bulelèlà, eci cìdì. . .Nudi badìlongòlòle anyì? Eci's ke Cimenga cìvwà Abraham ùkèbakeba. Nwamònu anyì? Bu mùvwàye mupròfetà, ùvwa mumanyè ne Cimenga aci cìvwà mwaba kampànda. Bible ngudi mwambè nànkù. Kàdi wàkalekela cimenga cìvwàye musòmbèle, ne wàkaya kuntwaku; tàngilàayi kwàkayàye, ànu menemene mwaba ùvwàci mwà kusanganyìbwa. Nwamònu anyì? "Ùvwa wènda ùkèba Cimenga Cìvwà mwibaki ne mwenji mwikàle Nzambì," nwamònu's, bu mùvwàye mupròfetà.

422 Yesù wàkaya bwà kulongolola, ne byanza byà Nzambì, Cimenga cyà Nzambì; Lwàpàngà-nzùbu wa Bunzambì, bwà

cisàmbà cìdì cisumba kùdì Nzambì, bwà cisàmbà cidyanjila-kulongolola. Yèyè ukaadi muye kalongolola.

423 Abraham ùvwa wènda ùkèbàngana naaci. “Ne yèyè wàkajikula ne ùvwa mwena lwendu ne mwenyi, bwalu ùvwa ùkèba Cimenga cìvwà mwibaki ne mwenji mwikàle Nzambì.” Mupròfeta awu, mumanyè ne cìvwa cìsanganyiibwa mwaba kampànda’s! Yone wàkacimòna cipweka, kàdi Abraham wàkadyàmbidila ne cìvwa ne cyà kwikala pa buloba ànu dìbà adi mene. Bwà cinyi? Wàkatwilangana ne Melekisedekè, Mfùmù waci awu, ne kuMupèèsha cyàdiikùmi. “Uvwa kàyì taatù, anyi kàyì maamù to. Kàvwa ne ntwàdijilu wa mwoyi anyi ne ndekeelu wa mwoyi nànsha.” Abraham wàkatwilangana Nendè, ne bàakàngata mèèsà à Mukalenge ànu pa kaaba mene kààshiiwbà Cimenga aci aku, Mukùnà wà cijila wà Mukalenge, mwikalà Bapikula mwà kusòmbela. Kaa, ekèlekèle!

424 Dìbà adi kadyèna ànu dìmmana to. To, tudi mu cikondo; paanyimà pàà katanci netùye ku Cyendèlèlè.

425 Kaa, Mukùnà wà cijila! Nekwikale mìsèèsù yà ngòlò wa lumwenu, bàlàbalà; ne nzùbu, ne myaba myalàbàle yà dipicishila kapeepa. Panwikalà baswè kubala cyòci eci, Bwàkabuulwibwà 21:18. Muci wà Mwoyi newikalèmu; mìshindù dikumi ne yìbìdì yà bimuma, ùmwè ku ngondo yònsò, nebikwamèku. Bantu bààdyà mamuma aa abu, nebàshintululè didyà dyàbò ku ngondo, ne ku ngondo yònsò.

426 Nèngu cìdì—cìdì cyùmukila ku . . . ànu bwà bacimunyi. Nudi bamanyè nàngu anyi? Kacyèna bwà màngumba nànsha.

Wèwè udi wamba ne: “Udi wambilamù anyi, Mwanèètù Branham?”

427 Tùbuululàayi mu Bwàkabuulwibwà 2, katanci kakesè cyanààna, bwà tùcijandulè. Bwàkabuulwibwà 2:7. Tùjandulàayi mpindyewu ne m’Bulelèlè bwà menemene anyi kì mbwòbù. Bwàkabuulwibwà 2:7 ùdi ùbadiibwa mùshindù ewu.

Ne ewu udi ne maci, ùmwè cìdì Nyumà . . .

428 Mpindyewu, vùlukàayi ne, Yèyè kèna wàkula ne beena Yudà mpindyewu to. Ewu ng’Èkèleeziyà, bàà Bisàmbà byà bendè.

Ewu udi ne maci, ùmwè cìdì Nyumà wàmbila maèkèleeziyà; Ewu wàcimuna, Mèmè nèmupèèshè bwà kudyàye ku mucì wà mwoyi, ùdì munkaci mwà mpàlàdiizò wa Nzambì awu.

429 “Ànu bacimunyi, bàdi bàcimuna nyama wa lwonji, bàcimuna cimanyinu cyèndè,” aci’s ncyena Kàtòlikè, cyena Mishònyì, cyena màngumba, “bàdi bàcimuna nyama wa lwonji awu, cimanyinu cyèndè, dileeta dyà dìnà dyèndè.” “Yèyè neikale ne bukenji ku Muci wà Mwoyi, bwà kubwela mu biibi mùdì kamùyì cintu nànsha cimwè cìdì cikooyisha kaciyìku mwà kubwela to.” Nwamònu anyi? Elàngànaayipù meeji. Mpindyewu, anji

indilaayi kakesè mpindyewu, patùkàadi tuya kule ndambù. Muci wà Mwoyi newikale ànu bwà bacimunyi nkàâyabò.

430 Mabèji neikalè bwà dyondopiibwa dyà matùnga. Mbwena kwamba ne, bamfùmù bàdi basòmbelamù abu, bàtwàlamù luumù lwàbò, pàdìbo bàtwàlamù luumù lwàbò ne bàlütèeka kumpàlà kwà Nkwasa wa butùmbi wa Nzambì aku. Ànu mùvwà pambèlù pààpa, dikumi . . . bisà dikumi ne cìmwè bìvwà bitwàlamù, cyònsò cyà ku byòbì, cyàdikumi kùdi beena Lewì, nwamònu's. Pàdìbo bàtwala luumù lwàbò mu . . . kuumukila ku buloba bubèneshiibwe, mu cyòci aci, nebòòlole cyaanza ku Muci wà Mwoyi, bàngatakù dibèji dyà mucì wà houx . . . anyi dibèji dyà Muci wà Mwoyi, nènku nebàpàtukè pàmwè. Kakùcyèna kàbìdi mvità to. Byònsò bìdi mu ditalala. Mabèji àdi civùlukilu, bwà dyondopiibwa dyà ditùnga.

431 Muci ùmwèùmwè awu, kabiyi bu Adàmà to, yèyè . . . Kùvwà Muci wà Mwoyi mu budimi bwà Edènà, kùvwàye mwà kwikala mudyè bu yèyè kàyì mudishindè. Muci wà Mwoyi awu ùvwà ùmuvùlwija, díbà dyònsò, ne wendè mupyamùpyà . . . bunsonga bwèndè bùvwà bwènda bùtùngunuka. Nwamònu anyi?

432 Byà mwomùmwè ne matùnga. Mabèji neikale bwà dyondopiibwa dyà matùnga; mònaayi ne, kamwèna màsaamà mpindyewu to. Udi mwà kwikala ne makenji àmwèàmwè àkadì naawù Adàmà awu, bu mùdì di- . . . nkuci ne dibèji dyà mucì wà houx, ke byònsò . . . mfùmù ne mfùmù yònsò wàngata dibèji.

433 Mònaayi, Musùlù wà Mwoyi, pàmwàpa tusulu tukesè menemene twàbùngì tùdi tùwènza. Mpindyewu, pa buloba ebu . . .

434 Nkàadi njikija ànu mu tusunsa tukesè cyaanààna emu. Pa buloba ebu . . . Anyi, nèngìmanyikè ànu's. Aci's ke ndambù ùcìdi munshààdile ku bìndì mufunde, mpindyewu mabèji matwè ku makumi àsàtù. Èyowà. Tàngilàayi.

435 Mu ewu—mu ewu mwoyi, ncitukù mwanji kumòna cintu cyà cìjikija nyòòta pawùdi usanganyiibwa mu mikùnà bu kusangana, mùmvwà muyiishepù dilòòlò adi, bwà kasulù kàdi kafùkuka aku, mushimi wàkù ùdi ùfila mwoyi awu. Udi mufwànyine kwikala mucyòke ne nyòòtà, kupweka ku kasulù kampànda kimpè; kùumukila mwinshi mwàmwa mùdi twìshi katùyì mwà kufika to, mwinshì mwà buloba mu ntàntà wa nkàmà yà makàsà, kiikale kàfukula màyi makezùke, mashùwashùwàle, à àfila mwoyi. Tudi twanyisha aci's. Aci's ncikesè. Mpindyewu, buloba bùdi ne misùlù yàbù yàbùngì miikàle ne màyi à cyashima. Pàudi ne nyòòtà wamba kufwà, nda ukabikùleku màyi mimpè, matalàle kwòkù aku, neà—neàkwambùlwishe bwà kwikala ne mwoyi.

436 Kàdi tàngilàayi mwaba ùdi Ewu ewu ùfùmina's. Ùdi ùfùmina ku Nkwasa wa butùmbi, s'ke kùdiwù ùpetela mishimi

yàwù mifidì yà Mwoyi aku. Ûfùmina mwinshì mwà Nkwasa wa butùmbi wa Nzambi, mùdi Nzambi musòmbe amu.

⁴³⁷ Wówù wónsò, yónsò yà buloba ebu, buloba butùdì basòmbèlemù mpindyewu ebu; muntu ne muntu, ikàle mwena Kilistò anyì mumpàngaanù, ùdi ne ntempelu. Nukàadikù bakwélèle meeji anyì? Maèkèleeziyà, bwónsò bwàwù.

⁴³⁸ Kàdi ewu Yèyè kèna nendè nànsha umwe to. Bible mmwambè ne: “Ne kakùvwa ntempèlù nànsha umwe mwaba awu to. Kàdi Mukalenge Nzambi ne Mwànà wa mùkòòkò bàdi Ntempèlù wa cyòci aci.” Mwànà wa mùkòòkò m’Bukènkè. Mwànà wa mùkòòkò ke Ntempèlù. Mwànà wa mùkòòkò ke Nkwasa wa butùmbi. Mwànà wa mùkòòkò ke Mwoyi. Yèyè ùdi Ntempèlù awu. Nwamònu’s, ntempèlù yónsò eyi yìdi ne cintu cidìbo munkaci mwà kukuukwila; kàdi, mu Cimenga eci, Yèyè ke cintu mene. Yèyè ùdi ne bantu Bèndè. Bukènkè bwà Nyumà Wendè bùdi bùtùnkumukila pa Cimenga cyà cipaapu cyà musàkà aci.

⁴³⁹ Bu Peetèlò ne Yone, kuulu ku lusongo lwà mukùnà aku. Bukènkè bwàkabwikila lusongo lwà mukùnà, ne Dìyi kwakula, dyàmbe ne: “Ewu m’Mwan’Àanyì munanga.”

⁴⁴⁰ Mu Bwàkabuulwibwà 21:3 ne 4: “Tabernacle wa Nzambi ùdi ne bantu.” Nzambi mmusòmbèle mu muntu, mu dimupikula, ku njila yisàtù eyi. Mpindyewu Nzambi neàpikulè buloba ne neàsòmbelè mu buloba, pàmwè ne bantu Bèndè bàà pa buloba, bààkapàtulàYe mu buloba abu. Nènku bwàkapòna ku mpèkaatù, kàdi. . . Byàkakèngela bwà Yèyè kwanji kubùlekela bùtùngunuka nànkù. Kàdi mpindyewu Wàkatuma Yesù bwà kupikula buloba budishinde abu, butùdi citùpà cyàbù abu. “Kwòkò aku lusuki nànsha lùmwe lwà ku mutù wèbè kalwàkujimina to.” Ki mwàkambà Yesù nànkù. Yèyè ne: “Nèmmubiishè cyàkàbìdi ku ditùkù dyà ndekeelu.” Nwamònu anyì? Bwà cinyì? Wèwè udi citùpà cyà buloba.

⁴⁴¹ Nudi numòna ne, mvwa nnèka ndambù bwà mùvwà mukàjàànyì ùngambila bwà mùmvwà mujìmije nsuki yànyì. Mémè kumwambila ne ncívwa mujìmije nànsha lùmwe lwà ku yòyi to.

Yèyè kwamba ne: “Yìdi penyì?”

⁴⁴² Mémè kwamba ne: “Mwaba wùvwayi yìsanganyibwa kumpàlà kwà mémè kuyipeta awu.” Kwónsò kùvwayi yìsanganyibwa aku, cintu cyà dilenga ne byanza’s; ní yìdi penyì, yìdi ànu kacya yàngindila. Nwamònu anyì? Ncyà bushùwà. Nènye kùdìyi aku, dīngà ditùkù.

⁴⁴³ Mubidi mukùlàkàje ewu, ùdi munkaci mwà kwela minyèngu ne wèndà ùfwa, ne wènda ùkònyangajija makaaya, ne ùtākanyika mu binù, ne—ne pa muminu pàpàta. Abi’s bìdi ànu bīmpè. Udi mwà kuwùjiika mu mbù, kàdi Mpungi neàmbiishè! . . . ? . . . Èyowà’s, mukalenge. Netùshintuluke,

dìmwè dyà ku matùkù àdì paanshi aa. Ndi citùpà cyà buloba ebu cidi cipikùdiibwe eci. Udi usanganyibwa mu buloba, kàdi kùyi kantu nànsha kàmwè kàà mu *kosmos* ewu to. Wèwè udi mu bulondyanganyi bushiilàngàne, bulondyanganyi bupikùdiibwe.

⁴⁴⁴ Mònaayi ne: “Tabernacle wa Nzambi neikale ne bantu.” Mònaayi ne: “Bintu byà kale bikaavwa bimane kupita.” Eci, cintu eci, cikaadi cipite. Eci cidi cyùmvwija ne Dyulu adi nditùlùke bwà kusòmba ne muntu. Nwamònu anyi? Dyulu ne buloba mbyupùkilàngàne.

⁴⁴⁵ Ànu menemene pàakalwà Nkuci pa citùpà cyà buloba, cìvwa ciikale Yesù; Ûvwa lupwishi lwà buloba, Muntu. Nzambi, ùfùmina ku mùtòlokù mukesè wà Mwoyi awu, ku bukòlè bufùki. Ne Mashi àvwa mu cyòci aci awu. . . Mwoyi wùvwa mu Mashi awu wàkabànda kwalukila kùdì Nzambi, kàdi Mashi àkamata pa buloba, bwà kubùnana.

⁴⁴⁶ Bwà mashi àkatwadiibwàmu awu, kuumukila ku mùtòlokù wà kabùlù kàà mashi kàà kùdì Kaayinà, nwamonu’s; mpindyewu Ùdi wàlukila ne bukòlè bufùki ànu mwàkenzàYe ne Adàmà amu, ùfùka Adàmà, ewu ke Adàmà Mwibìdì’s. Nènku ku kabùlù kàà mashi kàdi kàpandiibwà kwaka aku, kùvwa (mpèkaatù) Kaayinà mubòze kabùlù kàà mashi aku pa mwakàne, nwamònu’s, mpindyewu Kabulu kaa Mashi aka. . . Bwalu, wàkashebeya Abèlè, kàdi Abèlè wàkalediibwa ku disangila dyà mulùme ne mukàji.

⁴⁴⁷ Kàdi ewu Yèye kààkalediibwa ku disangila dyà mulùme ne mukàji to. “Cìvwa mbufùki bwà Nzambi, ntwàdijilu wabù,” ne Wàkapikula buloba. Ne kàlìsiyumù kwònsò aku, binshidimba, mpiitùlòlù, bukènkè bwà mu cibwàshibwàshì, bùdì bukwenza naabu abu, mbipikùdiibwe. “Nànsha lusuki lùmwe kabààkulwènzela bibi to. Nènku nèmbyiule cyàkàbidì ku ditùkù dyà ndekeelu.”

⁴⁴⁸ Pashiishe cinyi? Nzambi ùtùluka bwà kusòmbela pa buloba. Bwalu, Yèye ùdi citùpà cyàbù, mubidi Wendè Yèye mwinè awu. Yèye wàkawubiisha bwà dibingishiibwa dyètù, ne tudì babingishiibwe pa kwitabuujà cyòci aci ne kucitaba. Mònaayi mu bifwànyikijilu, Yesù ùdi ùlwa. . . Mu cifwànyikijilu, Yesù ùdi ùlwa muntu; Nzambi. . . anyi mudyanjila-kulongolola bwà kwangata kaaba kèndè, bwà kutùpikula, bwà kwenza ne bintu byònsò ebi biikale mwà kwenzeka.

Mònaayi ne, pambèlù pàà bimanu byàci bilenga abi, byà Cimenga eci.

⁴⁴⁹ Mpindyewu nuumvù “Cimenga anyi”? Nwamònu’s, m’Mukùna wà cijila. [Mwanèètù Branham ùdi ùcifwanyikijila ku mboodi—Muf.] “Kakwèna cintu nànsha cìmwè cìikalà mwà kwenzelangana bibi anyi kubùtula mu Mukùnà Wànyì wònsò wa cijila to, mùdì Mukalenge wàmba.” Cimenga aci kí ncyà matumba ànaayi ne nseke yinaayi biimane bule bùmwe to.

M'Mukùna. Nènku bwa—bwalàbàle ku bucyàmà ku butùmbùke, bìdi mùmwè, nwamònu's; kilòmèètà binunu bìbìdì ne nkàmà yìnaayi mu *nùnku*, kilòmèètà binunu bìbìdì ne nkàmà yìnaayi mu *nàka*, kilòmèètà binunu bìbìdì ne nkàmà yìnaayi nseka yònsò; ne kilòmèètà binunu bìbìdì ne nkàmà yìnaayi mu butùmbùke. Nànku cìdì ànu Mukùnà munène, bu mùdì cìpaapu cyà musàkà amu, ne Cimenga aci cìdì pa Mukùnà. Butùmbi's wè!

⁴⁵⁰ Ki bwalu mbwòbù abu's, ke mpàlàdiizò yà Nzambì ayi's, Bukènkè bwà bàà pa buloba, Bukalenge bupwàngàne abu. Kì nditùkù dyà mwandamutekète to; ndyà Cyendèlèlèlè adi! Nwamònu anyi? Kì m'Bukalenge bwà bidimu cinunu to; m'Buloba Bupyabùpyà! Nwamònu anyi?

⁴⁵¹ Pàdibu bùpìcila mu Bukalenge bwà bidimu cinunu apa, bùdi bùpìcila ku nshintùlùkìlù wabù wa dijidiibwa, kàdi bùdi ànu ne cyà kwoshiibwa. Nwamònu anyi? Pààbì, Mashi mmapikùle bantu, bìdi bìleeja civùlukilu eci ne cìdì. . . musinga mmufuta, mu bidimu cinunu abi. Kàdi pashìishe bìdi bìkèngela bùsukudiibwè kùdì Kapyà; ànu mùvwà wèwè amu, batumìibwe Bèndè bàà mu Cimenga eci, kasùmbù kàà batumìibwe aku.

⁴⁵² Nànku nànsha wèwè mufwè anyi mwikale ne mwoyi, bìdi bìshintulula cinyi? Yèyè mulwè leelù ewu, anyi Yèyè mulwe mu bidimu lukàmà, anyi mu bidimu cinunu, mèmè nèngìikishè ànu too ne pààlwà dishintuluka dyànyi.

⁴⁵³ Pa nànku, wèwè mulùme mununu ne mukàjì mununu, kùtekecikù mu mabòko to. [Mwanèètù Branham ùdi ùfwanyikijila ku mboodì—Muf.] Pawikalà cimfwànyi kuulu *eku*, mu cyambiibwà cyà Nzambì eci; *eci*, Nzambì; wèwè naaci, pawikalà muleejìibwe *apa*, kwèna mwà. . . Udi mu wa Cyendèlèlèlè. Nènku wèwè musambuke ditùkù dyà mwandamutekète adi, mubwele mu dyà mwandamukùlù, udi mubwelè mu Cyendèlèlèlè ku dibàtiiza dyà Nyumà Mwimpè, udi mubwejìibwe mu *Eci* nùnku ewu. Mpindyewu, pawikalà mweyèmène ànu disaluka kampànda, anyi ditùpika diya muulu ne dyalukila, anyi ne: “Ntu ngèza *cikampànda*. Ndi nneemekela ditùkù dyànyi dyà mwandamutekète. Ncìtu ndya munyiinyi to,” ne bintu byà mùshindù awu, abi's nebìikalè mwà kubutuka, nànsha bishi. Nwamònu anyi? Kàdi *Eci* ncyà Cyendèlèlèlè. Nwamònu anyi? Eci ncyà Cyendèlèlèlè, Difestò dyà paanyimà pàà mafestò à bisambusambu adi. Nwamònu anyi?

⁴⁵⁴ Difestò dyà ntentà adi divwa ndifestò dyà ndekeelu, difestò dyà mwandamutekète. Tudi munkaci mwà kukuukwila mpindyewu mu difestò dyà bisambusambu, cikondo cyà mwandamutekète cyà èkèleeziyà.

⁴⁵⁵ Mu Bukalenge bwà bidimu cinunu, netwikale mu difestò dyà bisambusambu, cyàkàbìdì, mu ditùkù dyà mwandamutekète.

456 Kàdi, pashìshe, paanyimà pàà ditùkù dyà mwandamutekète, tudi ne Dibìikidiibwa dyà Cijila, kwalukila mu dyà Cyendèlèlèlè. Munyi? Ku wa Cyendèlèlèlè wàkalwa kutùpikula ne kutwàluja Awu, kutùlekela tujingulula ne tuvwa citùpà cyà *Cyóci* eci.

457 Mpindyewu wàmanyi munyi mùdi citùpà? Bwalu, mbwà ne, Diyì dyà dîbà edi, mulayi wà ditùkù adi. Ncinyi aci? Dyalujulula dyà ditùkù dyà kumpàla, dyà kumpàla. “Ne yèyè neàlujululè nyoyi yà bânà kùdi baataatù,” dyalujulula dyà beena mpenta bashùwashùwàle, kí mmasaluka to; ne neàmweneshè Bukènkè bwà dilòlò, Mwânà umwèumwè wàkaleejiiibwa mu Bukènkè bwà mu dîndà awu, bu mwàkalayiiibwabi bwà ditùkù edi. Amen ne amen!

458 Tudi penyì, balundà bàanyi, tudi penyì? Bindile ànu mpindyewu bwà kushiya kaaba, bwà Bwàkabuulwibw 11 wàmòna mwà kuvwijiibwa...kumanyishiibwa kùdi beena Yuda; ncyà bushùwà, Dyambwibwa dilwalwà.

459 Tàngilàayi, pambèlù pàà biibi byà bimanu apu, byadija mu Buloba Bupyabùpyà bujimà, matungà neàsombelè mu ditalala dyà Cyendèlèlèlè. Mpindyewu ncinyi? Bamfùmù bàà mushinga nebàtwalèmu butùmbi bwàbò. Mpèkaatù nànsha umwe kèna mwà kwikalàmù to. Bakàji bàdi ne nsuki mibebula kabààkubwela mu Cimenga aci to. Aci ndi nnùjaadikila. Kamwàkwikala kàbìdi divwàlà dyà tulàmbà twìpi nànsha, dinwà dyà mfwankà, beena masandi bàà pambèlù pàà dibàkà, beena masandi, anyi beena mashimi, bakuukwidi bàà mpingù, cyònsò cìvwabo aci, kabààkubwela mu Cimenga aci nànsha. To, nebìjike byònsò. Mpèkaatù kààkwikalakù to. “Cintu nànsha cimwè cyà cikooyisha cijila cyàci kacýakubwelàmù to.” Ke cyàkambàYe aci’s. “Byònsò bikaadi bipite, kashidi.”

460 Tàngilàayi pambèlù mu mpàtà yàci amu ne mu nyùngulukilu wa biibi byàci:

Ours neikale ne kalolo, mbwa wa diitu
neàsombè pàmwe ne bantu;
Ne ntambwe neàlaalè paanshi pàmwè ne
mwànà wa mùkòòkò;
Ne nyama wa mu cisuku awu, neàlombodiibwè
kùdi mwànà mukèsè;
Nènshintuludiibwe kuumuka ku cifùkiiibwa
cìndi eci.

461 Ne lufù elu lùkwàta mudimu mu mubidi wànyì wà cifwàkà ewu, bukùlákàjè bwènda bùbwelàmù, mèmè nènshintulukè.

462 Nukàadi buumvwe musambu awu anyi? “Nyama wa ours neikalè ne kalolo. Mbwa wa diitu neàsombe pàmwè ne bantu.” Kààkutumpika, ne kukungula bwà kuteeta kukushipa to. Yèyè neèndè neebè ùpweka ne tujila.

Nganyi wàcìpyàna? Bapikula. Neyìikalè nganyi?

Mònaayi ne, ndi ànu mwà kulongeshila ànu ku bifwànyikijilu cyaanàna mpindyewu. Mòna, Mwanèètù Lee.

⁴⁶³ Wakapàtuka pa buloba bupyabùpyà ne Noà mupròfetà awu nganyi? Aba bàakabwela nendè mu bwàtù abu. Ncyà bushùwà anyi? Awu's ke udi upàtukilapù. Nwamònu anyi? Aba bàakabwela ne Noà, ku mukenji wèndè abu, ki bwòbò bàakapàtukà pa buloba bupyabùpyà paanyimà pàà dibàtiiza dyàbù dyà mu màyi.

⁴⁶⁴ Ewu udi ubwela ne Yesù mpindyewu awu. Udi ubwela munda Mwèndè bìshi? Ku Nyumà umwèpelè; ne Yèyè ùdi Dìyi. Udi ulwa citùpà Cyèndè. Udi citùpà kaayi cyà ku Yèyè awu? Dìyi didi ne mwoyi dyà díbà edi, udijingulula. Newùpatukè Nendè mu Bukalenge bwà bidimu cinunu. Apu ki paùdi upàtuka. Mònaayi ne, kî ndukòngò lupyalùpyà to. Ditentemuna!

Wèwè udi wamba ne: “Kaa, Mwanèètù Branham!” Kaa!

⁴⁶⁵ Mònaayi ne, pikalàbi ne Nzambi ùvwa mwà kujuula Eliya ne kumwangata, kukaadi bidimu binunu bibìdì ne nkàmà yìtaanu, bwà kumutentumuna cyàkàbìdì kumwaluja mu buloba, bwà kwikalayè mupròfetà bwà beena Yudà, ambààku tũng mwabengaYè kwenzela Mukàji-musèla's!

⁴⁶⁶ Paanyimà pàà Noà mumanè kupàtuka mu bwàtù, mònaayi cyàkambilàbo Noà paanyimà pàà yèyè mumanè kupàtuka mu mvùla awu, ànu mwàkadibi ne Adàmà kumpàla amu. Paanyimà pàà yèyè mumanè kupàtuka, pa buloba bupyabùpyà; kwambayè ne: “Vulànganaayi ne ùjaayi buloba,” paanyimà pàà mvùla awu. Mònaayi ne: “ùvwa ne cyà kwikala ùlela, kuuja buloba,” bu Adàmà ku ntwadijilu.

Mpindyewu nudi mwà kumòna ànu menemene kaaba aka. Mpindyewu tèèlejàayi ne ntèmà yònsò.

⁴⁶⁷ Adàmà ùvwa ne cyà “kuvudija ne kuujulula buloba.” Ncyà bushùwà anyi? Noà ùvwa, paanyimà pàà bupyabùpyà abu, (buloba bwàkadi bubùtùdìibwe), ùvwa ne cyà “kuvudija ne kuujulula buloba.” Nwacyùmvù anyi? Mpindyewu kanwènaayikù mwà kumòna cidi “dimiinu dyà nyòka” anyi? Ncinganyi cyàkuujulula buloba? Nwacyùmvù anyi? Èyo. Nudi numòna mwàkafikà Sàtaanà kùdì Evà mpindyewu's. Ki bwà cinyi lufù lwàkakòokesha pa buloba kubangila ànu apu. Ne maulu, buloba, nyama, cyuyùya, byònsò abi mbyedibwe mulawu kùdì Nzambi bwà bwalu abu. S'ki mulawu awu's, bwalu Sàtaanà wàkafika ku eci dyàmbedi.

⁴⁶⁸ Yesù wàkalwa bwà kumupikwila Taatù. Bwà kwenza cyòci eci, Yèyè wàkalwa citùpà cyàci; ànu mungáfumu ku dicyàkula amu. Nènku ku lupwishi mene alu (luseke lùvwà Yesù alu, Yèyè mwinè) Iwikàlè lupikula, ku Yèyè byambìibwà byònsò byà Nzambi mbipikùdìibwe ne buloba.

469 Yèyè ùwà Dìyì dyakula. Twètù bàdì bapikula tudi citùpà Cyèndè. Dìbà adi, bu nwènù mwà kujingulula's! Nwamònu anyi?

470 Bàfaalèsà bàvwa bàmba mùvwàbo citùpà aci. Kàdi, nudi numòna cifwànyikijilu cyànyì cyà kumpàla, bàvwa ànu cyòci aci ku mamanya à mu mutù. Kabàvwa mwà kujingulula Dìyì pààkamwèneshiibwàDi kumpàla kwàbò mene to. Bààkamba ne: "Muntu ewu ùdi nyumà mubi."

471 Mpindyewu, leelù ewu, tudi babiikidiibwe ne bapròfetà bàà mashimi. Tudi batwibwe mènà à cintu cyònsò cyà bukooyà cidi cifwànyine kubiikidiibwa aci, kùdì batèndeledi, nwamònu's, kùdì bantu banène ne bàà mamanya à dikèmà. Nwamònu's, kabèna ànu bumvwa to. Nwamònu anyi?

472 Dibàtiiza dyàbù dyà mu màyi kadìvwa dikùmbàne bwà kubùkezula to; nànsha dyàbò bwòbò mene to. Dijidiibwa, dyà Mashì, dyàkabwàluja, kubùnana. Kàdi dibàtiiza dyà Kapyà ndyàkabùkezulà; mwàkenzelàdi Mukàj'Endè-musèla amu. Bu mùdì dibingishiibwa, dijidiibwa, dibàtiiza dyà Nyumà Mwìmpè.

473 Kacya kàtukù mulayè bwà kujuula cisà cipyacipyà cyà bantu to, bu mùngàmbì, kàdi Yèyè wàkalaya bwà kupikula cìvwà cidishinde aci. Aba bàvwà ba—badyànjila-kulongolola abu, bààkabùpyàna bu mwàkalayàYe amu. Ne Yèyè ùdi Nzambì utu kàyi ùshintuluka awu; tudi bamanyè nànkù.

474 Vùlukàayi ne, Nzambì wàkangata Eliyà, paanyimà pàà dyambwibwa, ne wàkakudimuna, kumutentemuna kumwaluja munkaci mwà bantu, bwà kwangata kaaba bu mupròfetà munkaci mwà bantu bèndè; àbidì aa Yèyè neenzè cyòci aci. Ne mumulame, ne mwoyi, mu bidimu binunu bibidì ne nkàmà yìtaanu ebi. Ùdi ne cyà kumweneka cyàkàbidì.

475 Mònaayi kàbidì ne, Yèyè wàkabiisha Mòsà ku bafwè. Lukità lwèndè lùdi penyi? Kùdikù muntu mwà kulùpeta anyi? Balàayi Mukàndà wà Yudà. Nwamònu anyi? Sàtaanà. . . Mwarkanjèlò munkaci mwà kukòkangana ne mwarkanjèlò awu, Sàtaanà, wàmba ne: byenzekekù. . . "Mukalenge àkutàndishe," munkaci mwà kukòkangana mubidi wà Mòsà. Nènku ke Peetèlò, Yakòbò ne Yone aba biimàne mwaba awu bamutàngile, pa Mukùnà wà Dikùdimuka dyà mpàla, ànu mwaba awu mu buloba mwaba ùdi Mukùnà ne cyà kujuudiibwa bwà kusòmbelamù awu. Nwamònu anyi?

Nènku Yèyè wàkalwa bwà kubùpikula.

476 Nwamònu's, kùvwa Èkèleeziyà mwambwibwe musangu awu, muleejibwe; kùvwa aba bàvwà balàale tulù, baleejibwe. Mpenyi piine apu? [Mwanètù Branham ùdi ùleejila cifwànyikijilu ku cibàsà cyà kufùndila eku mu tusaka twà milongo tukesè tùdì tùlonda etu—Muf.] Mu Cimenga aci; ku lusongo lwà mukùnà. Nwamònu anyi?

477 Kùvwa Peetèlò, Yakòbò, ne Yone, batàngilekù; bàsàtù, bu bantèmu. Kùvwa Eliyà, Mòsà, ne Yesù; bu bantèmù bàà mu Dyulu. Nwamònu anyi?

478 Nènku kùvwa Mòsà, mufwè awu, ùvwa mubiishìibwe ku lufù. Kùvwa Eliyà, dyambwibwa, bàcìvwà ànu ne mwoyi abu. Ne bwònsò bàbìdì bàvwa baleejìibwe pa mukùnà wà cijila ewu.

479 Ne, Yesù, Mupikudi awu. Pàvwà Nzambì, kumutù Kwèndè mùshindù ewu, kuMubwikilayè ne mundìdimbì, wàmba ne: “Ewu m’Mwan’Àanyi munanga.”

480 Nudi bavùlùke ne, Yesù wàkamba, bu ditùkù dimwè kumpàlà kwà cyòci aci, Yèyè kwamba ne: “Bulelèlè Ndi nnwàmbila ne, bàmwè bàdì biimàne kaaba aka mpindyewu aba, kabààkumòna lufù to, too ne pààmònabo Bukalenge bwà Nzambì bushìndamijiibwa mu bukolè.”

481 Cìvwa ncinyi? Bansantu babiishìibwe ku lufù ne bambwibwe, pàmwè, bambwibwe pàmwè bwà kutwilangana pàmwè Nèndè mu mpepèlè. Ne Nzambì muMubwikile mundìdimbì, ne Yesù mwimàne mwaba awu mu mundìdimbì ewu, wàmba ne: “Ewu m’Mwan’Àanyi munanga, Mwena munda mùNdi ngumvwa bìmpè bwà kusànkila,” bulondyanganyi bwà Bukalenge Bupyabùpyà. Kaa, mwanèètù wa balùme, mwanèètù wa bakàji!

482 Lufù kalwèna lùkushintulula to. Lufù lùdi lùshintulula ànu cisòmbedi cyèbè cyanààna. Nwamònu anyi?

483 Vùlukàayi ne, Samwèlè, pèndè mumanè kufwà ne mujiikiibwe munda mwà bidimu bibìdì, ùvwa mu Mpàlàdiizò. Ki mwamùlopò wa mu Enè-Dò awu kumuzangulayè ku, ne Shawùlà wàkamujingulula; ne mukàji awu, yèyè pèndè, ne kutwàyè mpàla wèndè panshì. Yèyè kàvwa mushintùlùke to, nànsha kakesè. Yèyè ùcìvwa ànu Samwèlè umwèumwè awu, paanyimà pàà mumanè kufwà bidimu bibìdì bipiite, kàdì ùcìvwa ànu mupròfetà. Yèyè kwamba ne: “Màalaba nenúfwè mu mvità, wèwè ne mwanèèbè wa balùme, ne pa dìbà edi màalaba dilòlò nenwikale naanyi.” Nènku aci’s ke cyàkenzeka ànu.

484 Nwamònu anyi? Nènku pàapingana Mòsà, ne Eliyà, bwà Bwàkabuulwibwà 11, nebùkale ànu bapròfetà. Àlèluuyàh!

485 Ne dyàmwàmwa, mu Buloba abu, mu Cimenga mùdì Mwàna wa mùkòòkò mwikàle Bukènkè, nénkumanyè, Mwanèètù McKinney. Nènnùmanyè, nwènù cisàmbà cyànyi, mabwe àanyi à mushinga mukolè à ku cifulu cyà butùmbi. Pààfùminabo ku Esètè ne ku Wesètè, batàngile ku Cimenga; pàdì kilòmèètà binunu bibìdì ne nkàmà yinaayi eku ne eku, yèyè neikale musòmbè kuntwaku, ne Cimenga aci ciibaka ne nseke yònsò yinaayi bule bùmwe. Paùdì musòmbè mwaba awu mu Mukùnà wà cijila, mùdì Nzambì musòmbè pa Mukùnà apu, ne Yesù pa Nkwasa wa butùmbi. Ne mpungi wa ngòlò awu ùdila pàdì Yòzefù ùmuka, bwà kupweka wèndakana mu Mpàlàdiizò amu, ne bàna

bàà Nzambi bàpòna ku binù ne bàMukuukwila, bamanyè ne bàvwa bapikùdiibwe. Nwamònu anyi? Amen! Àlèluuyàh!

Míngà misangu ntu ngumvwa maajiyà à mu
Dyulu,
Kàdi butùmbi bungàbandila Kuntwaku:
Neciikale disànka kaayi pangààmòna
Musungidi wanyi,
Mu Cimenga cilenga cyà ngòlò aci's!

Ndi mu njila mutàngile ku Cimenga cilenga aci
Cìdi Mukalenge mulongòlòle. . . [Katùpà kàà
mukàbà wà mèyi munda mutupù—Muf.]

⁴⁸⁶ Yeshàayi mmwambè, mu Yeshàayi 9:6 ne: “Ne bwà ditalala Dyèndè ne bwà divulangana Dyèndè kadyàkwikala ne ndekeelu to. Bukalenge nebwikale pa makaaya Èndè; Dìna Dyèndè nedibìikidiibwe ne Mubedyanganyi, Mfùmù wa Ditalala, Nzambi wa Bukolè, Taatù wa Kashidi. Ne bukalenge nebwikalè pa makaaya Èndè; ne bwà divulangana Dyèndè ne bwà ditalala Dyèndè kakwèna ndekeelu to.” Nànsha nyama mene yìdimù. Kaa, ekèlekèle!

Ours neikalè ne kalolo, ne mbwa wa diitu
neàsòmbe ne bantu;
Ne ntambwe neàlaadilè paanshì ku luseke lwà
mwànà wa mùkòòkò,
Ne nyama wa mu cisuku awu, neàlombodiibwè
kùdi mwànà mukesè;
Kàdi nènshintuludiibwè, nènshintuludiibwè
kuumuka ku cifùkùibwa cìndi eci.

⁴⁸⁷ Pààlwà Ditùkù adi, bwalu nyàaya ku Cimenga aci. Ndi mu njila mutàngile ku Cimenga cilenga aci! Ndi ngumvwa Bukolè bupikudi mu mwoyi wanyi wònsò mpindyewu.

⁴⁸⁸ Byòbì kabìyi nànkù to, díbà adi ndi mujimije mwoyi wanyi; ndi mulongeshe bakwàbò bintu byà diseeswishangana. Kàdi pàndì mpwekesha mèsù paanshì ne mmòna ne mulayi wàkenzàYe bwà ditùkù edi, ne ng'Umòna mushìndikiibwe; ne ntàngila ku disangisha dyà kilòmeètà binunu bibìdi ne nkàmà yinaayi nseke yònsò edi disòmbe kaaba aka, Musungula udi mubìikidiibwe mu màngumba ne bisà ne twitabàayi ne bikwàbò, badikungwìje pàmwè; pàndì mmòna Dìyi dìdishìndika Dyòdi diinè apa, ndi mumanyè, kakùyì mpatà nànsha mikesè to ne, bilengà byà cifulu cyànyi nebibàlakanè kutàmba cintu cyònsò pa buloba, mu Ditùkù adi.

⁴⁸⁹ Nekùlwe cikondo kampànda! Bantu, katwèna tudìsangisha kaaba aka bwà cyanàanà to. Tudi ànu bindile cikondo aci. Díbà dikaadi dipìte bikolè, bikolè be, kàdi Yesù ùcidi ànu pabwìpì, pabwìpì menemene. Nènku, Butùmbi Bwèndè, mbilenga byà dikèma. “Dìna Dyèndè nedibìikidiibwe ne Mubedyanganyi.” Cimenga aci, nudi mwà kucimòna anyi?

Ki mwaba ngwôwò awu wùdì Mukàji-musèla ne Mubàki bàshikama, ne kabààdyàkwikalakù kàbìdì. . .

⁴⁹⁰ Mpindyewu, nwènù nwela meeji ne mbilenga be patùdì twendesha màshinyi ntàntà wa nkàmà ya kilòmèètà bwà kusòmba kaaba aka ne kudiishibwa ne Dìyì Dyèndè, bwalu eci cidi ànu mundidimbi cyanààna, wà ciikalàbi patwikala ne mwoyi mu Cimenga pàmwè Nendè! Pàngiikalà mutumba neebè ku mushikù ùdì ùlonda, ne patwàdyà micì ayi, ne ne netwèndelè mu misèèsù ayi, patwèndà tubànda ne misèèsù ya ngòlò ayi batàngile ku mpokolo, tunwà ku mpokolo awu, tubwela mu mpaladiizo ya Nzambi, ne Banjèlò bàpaapalala pa buloba, bimba miyenga, kaa, neciikale Ditùkù kaayi's wè! Ndikùmbànyine byònsò. Njila ùdì ùmweka mukàyàbàle, misangu mikwàbò bikola bipanga ne mwà kukola, kàdi, kaa, nebiiikale bikesè be pangàaMumòna, bikesè be. Ncinyi ciikala ménà mabì ne bikwàbò byàkambàbo abi, nebiiikalè cinyi, pangàaMumòna mu Cimenga cilengalèngàayi cyà Nzambi aci?

⁴⁹¹ Twìnyikaayi mitù yètù.

Ndi mu njila mutàngile ku Cimenga cilenga aci
 Cidì Mukalenge Wanyì mulongòlwèle Bèndè
 Sungasunga;
 Mwikalà Bapikula bwònsò bàà bikondo
 byònsò
 Bimba “Butùmbi!” banyùngùlùkile Nkwasà
 Mutòòke.
 Mìngà misangu ntu ngùmvwa maajiyà à ku
 Dyulu,
 Kàdi nèmbandilè matùmbi àci Kuntwaku:
 Neciikale disànkà kaayi pàngààmòna
 Musùngidi wanyì,
 Mu Cimenga cilenga cyà ngòlò aci's!

⁴⁹² Mu cisanga cyà Paatèmò, Yone wàkacimòna!

⁴⁹³ Yesù munanga, ditèkemena edi, ditèkemena dyànyì kì ndiibakila pa cingà cintu nànsha cìmwè cyà cishàadile to, Mukalenge. Ki mamwèndè wa mwoyi wànyì nyèyè awu, Cimenga aci, Mfùmù munène awu. Nzambi, kulekedikù muntu nànsha umwe kaaba aka ùbutukakù to, bu Wèwè mwà kuswà. Swàkù bwà tukenketeku cyàkàbìdì nsòmbelu yètù, leelù ewu, Mukalenge, bindile Dilwa dyà Mukalenge. Mwine amu, Bapikula bwònsò abu, lwà mu cipalu cinènè cyà manàyi cyà mu Loomò aci, mwàkadyàbo beena Kilistò abu kùdì nyama ya ntambwe amu, biikala lupwishi mwà kupàtula dìngà ditùkù's!

⁴⁹⁴ Kakwàkwikala bipaapu byà nkita mu luseke lwà kakùnà kàà Butùmbi aku to. Kakwàkwikala makusa à bilòngò byà madilu malembeleja ku biibi to. Kamwàkumacilakù cinsònji to. To, to. Kamwàkwikala majambu to. Kakwàkwikala mvulà ya bipùpù yàcilenga to. Neciikale cyònsò ànu cyà butùmbi kuntwaku.

495 Tùkwàcishèku, Mukalenge. Kwòkò muntu kaaba aka . . . udi mubiikidiibwe ku Didyà dyà Dibanji dyà Mwànà wa mukòòkò edi, bukòòkeshi bwà Bukalenge bwà bidimu cinunu ebu, ne bwà pashiishe kubwela mu Cimenga aci paanyimà bamanè kujikija Dipèngama ne mukàji paanyimà pàà diselangana. Bukalenge bwà bidimu cinunu bwòbù mene ke Dipengama ne mukàji paanyimà pàà diselangana. Dìbà adi Yèyè, Mukàji-musèla awu, ùdi wàngata Wendè. . . Mubàki ùdi ùya ne Mukàj'Èndè-musèla Kumbèlu. N'Ngwendè. Mubàki Wendè; Mukàj'Èndè-musèla. Kaa, Yèyè ùkaadi muye kalongolola Nzùbu, kacya ànu Wàbwela mu dibangilangana.

496 Swâyikù bwà twìkalè ne lulamatu kùdi Yèyè Udi Dìyi awu, bwalu Yèyè ùdi Dìyi. Katùyì tucyùka mùdi bakwàbò bàtùpeetula amu to, bàtùlama kule naaDi; Mukalenge, nsemejèku pabwìpi bikolè.

Bwalu míngà misangu ntu ngumvwa maajiyà à
ku Dyulu,
Kàdi nêmbandilè butùmbi bwàci Kuntwaku:
Neciikale disànka kaayi pangààmòna
Musungidi wanyi,
Mu Cimenga cilenga cyà ngòlò aci!

497 Cisòmbedi cìcìlwalwà cyà Mubàki ne Mukàji-musèla! Ùdi wàlukila. . . [Katùpà kàà mukàbà wà méyi munda mutupù—Muf.]. . . ku Didyà dyà Dibanji; nediikalè mu matùkù àsàtù ne citùpà. Pashiishe kwalukila cyàkàbìdi, mu Bukalenge bwà bidimu cinunu, pa dipèngama dyètù dyà paanyimà pàà diselangana adi. Ne pashiishe Yèyè—Yèyè neàfikishe Cimenga aci ku dimweneka. Byènze bu mubàki wàngata mukàji-musèla mu dimushitula, mùshindù ùdi mukàji-musèla mukesè ewu mwimane mwaba awu mu dikàcila pàdiye mutàngile kumbèlu kwèndè kùdi kumwindile aku's! Ne ku diitabuuja, leelù ewu, Mukalenge, tudi tucimòna dyàmwàmwa. Neciikalè ànu pa buloba apa mene. Wèwè ngwàkacilaya.

498 Èkèleeziyà Webè neàpikudiibwè ànu menemene, òmwè dyà ku matùkù aa. Ne pashiishe buloba Bwèbè nebùpikudiibwè, kantu ne kantu kààbù. Kàdi dyàmbedi Wèwè udi mupikùle cisàmbà Cyèbè, mibidi yàbò yidi myenza ne buloba ayi.

499 Tùkwàcishèku, Nzambì. Kwòkò muntu kaaba aka udi kàyi ànu mutwishiiibwe menemene bwà cyòci aci to, Mukalenge, swàkù bwà àcyàkìdìlè ànu mpindyewu mene.

500 Ndi mumanyè ne kùkaadi ntàntà mule ne luuyà lukolè, kàdi, bantu wetù, katwàkwikala misangu yònsò ànu biimàne kaaba aka to. Ncyàkwikala misangu yònsò ànu mpaasàtà wenù to. Tùcyènzàayi cyà bushùwà.

“Kùdikù mùshindù anyi, Mwanèètù Branham?”

501 Èyowà, shàala citùpà cyà Dìyi, citùpà cyà Dìyi dyà leelù. Kacyèna mwà kwikala citùpà cyà Dìyi dyà ditùkù dyà Mòsà

to; aci citùpà ncimana kwenza, aci cìvwa mmakàsà. Tudi ku Mutù mpindyewu. Eci's n'Kilistò. Kí ncikondo cyà mabòko to, kale mu Luther, to. Eci's ncikondo cyà Mutù. Kilistò, Dibwe dyà mùsongà, didi dilwa ku Mubidi.

502 Wèwè kùyi ànu mudyũmvwè bĩmpè menemene pa bwalu abu to, mwaba wònsò wũdi mwà kusanganyibwa awu, udikù mwà kwela cyanza muulu ànu bwà ngaakumbana mwà kumòna. Bantu bakwàbò bwònsò bàlamè mitù yàbò minyika. Nzambi ànùbènèshè.

503 Ambà ne: “Wamvũlukakù mu disambila, Mwanèètù Branham. Ndi muswè kwikalàmù be! Ncyèna—ncyèna muswè kucipangila to, Mwanèètù Branham. Ndi—ndi nkenketa, ndi ngèza cyònsò cĩndi pàanyi mwà kwenza aci, kàdi nsambĩdileku mpindyewu, s'mmwòmò's?” Nzambi ànùbènèshè.

504 Paũdi welangana meeji ku bwalu abu mpindyewu, sambila ànu cyanààna, wamba ne: “Nzambi . . .” Cìdi mu mwoyi wèbè wèwè. Nwamònu's, wèwè mũmvwe cintu kampànda cikòka, cikutwà ku mwoyi, s'ke cyòci aci. Cintu's ncyambiibwa aci cìteeta kudìleeja nkààyaci.

Ndi mu njila mutàngile ku Cimenga cilenga aci
 Cìdi Mukalenge wanyì mulongòlwèle Bèndè
 Sungasunga;
 Mwikalà Bapikula bwònsò bàà bikondo
 byònsò
 Mwà kwimba “Butũmbi!” banyũngũlũkile
 Nkwasa Mutòòke.
 Míngà misangu ntu ngũmvwa maajiyà à ku
 Dyulu,
 Kàdi matũmbi angààbandilà Kuntwaku
 Neciikale disànka kaayi pangààmòna
 Musũngidi wanyì,
 Mu Cimenga cilenga cyà ngòlò aci's!

505 Taatù wa mu Dyulu, twängàtèku mpindyewu, Mukalenge. Mulami Munène wa mikòòkò, Mulami Munène wa Mikòòkò Mupikudi awu, Mulami Munène wa mikòòkò Wàkashiya Butũmbi awu, mumanyè ne bĩmwè byà ku byambiibwà byàkajimina mu bibandabanda binène byà mpèkaatù abi, mùvwà mbwà yà diitu ne n—nyama mifwànyine kudyà kaamùkòòkò kakesè amu; kàdi Yèyè wàkashiya tujila twà ngòlò, kulwa mu buloba ne kuvwijibwa umwe wetù, bwà Wàmòna mwà kutwàmbila dinanga dyà Nzambi. Ki Yèyè awu kubàpeta, bàmwè bàà kùdìbo mu màngumba, bàmwè bàà kùdìbo mu nzùbu wa masandi, bàmwè bàà kùdìbo mu misèsù, mpofo, bàmwè bàà kùdìbo mu bipangu ne mu cibeeba, kàdi Yèyè wàkapikula muntu ne muntu uvwa Taatù muMulongòlwèle bwà kupikula awu.

506 Ne Yêyè mmutùtùme ne mudimu, bwà ne twikalè ne nsòmbelu wa citùpà cyà Dîyi bwà bikondo byètù. Ne tudi tumòna dilongolola dinène dyà Luther, mu cikondo aci; ne dyà Wesley; ne dyà beena Mpenta. Mpindyewu tudi bindile Dibwe dyà mùsongà dyà Cimenga adi. Éyi Nzambi, tudi bamanyè cikondo ne mulayi wutùdi bapèèbwe bwà ditùkù edi, mùdi Eci ne cyà kwalujuludiibwa cyàkàbìdi. “Bukênkè bwà ibaamulòlòlò nebùbobeshè cimuma cyàdi. Ne nebyènzekè ne nekwikalè ditùkù diikalà kadiyi mwà kwikalà muunya anyi bufùkù to, mwà kubiiikidiibwa, kàdi ku ibaamulòlòlò nekwikalè Bukênkè.”

507 Mwànà wa Nzambi umweumwe wa butùmbi awu wàkaDimwenesha mu mubidi wà buntu pa buloba apa, ùvwija mulayi ne mwoyi wòwù mwinè ànu menemene, kufofomija mèsù à Bàfaalèsà ne Bàsadòkà ne beena Helòòdè, ne bakwàbò.

508 Nènku leelù ewu cìdi cyenzeka cyàkàbìdi, Dîyi diikale dimwènèshiiibwe ànu mwàkadiDi amu. Dîyi, dìmanya minsokòntù yà mu mwoyi, ànu menemene mùshindù wàkadibi, ànu mwàkambà Mifundu amu, bwalu kaciyèna mwà kunyangakajiibwa to. Tùkwàcishèku, Nzambi, bwà kucimanya.

509 Kwàcishèku aba bàdi beele byanza muulu mpindyewu. Swàkukù bàkoleshe mukàbà wàbò bàwonye ndeng; bàdilwàcishe Èvànjeeliyò wa ditalala; bàvwale byà mvità byònsò byà Nzambi; baase cifulu cyà mvità; bàngate ngabu wa diitabuuja; baasè lwendu bàye kumpàla, kubangila ànu ku leelù. Enzàku nàнку, Mukalenge.

510 Ànu katanci kakesè, netùbiiikidiibwè, pashiishe Dyambwibwa nedilwè. Anu kasùmbù kakesè menemene, bu Henòkà, nekàmbwibwè.

511 Pashiishe ne: “bàshààdilè bàà dimiinu dyà mukàji, bàdi balamè mikenji yà Nzambi abu,” beena Yudà, “biikale ne bujaadiki bwà Yesù Kilistò,” bàà Bisàmbà byà bendè, nebaye bènda bàkebangana naabò bu mbwa, “ne nebàfile mwoyi wàbò bu bujaadiki bwàbò.”

512 Pashiishe, dindà kampànda dinène, Bukalenge bwà bidimu cinunu nebùbwayikè, bwa—bwalu Dipèngama dyà paanyimà pàà diselangana nedìtwadije.

513 “Ne pashiishe bafwè bakwàbò kabààkiikala ne mwoyi to too ne ku ndekeelu kwà bidimu cinunu.” Pashiishe, ku ndekeelu kwà bidimu cinunu, kùvwa Cilumbulwidi, cileeja ne Ham ùvwa mu bwàtù. Nènku Ham ùcìdi ànu mu bashààdile amu. Aba bààkaCitàèleja ne kuCibènga abu nebiiikale ne cyà kulumbulwishiibwa.

514 Mpindyewu, enzàku nàнку, Mukalenge, bwà katwikadi twalwa kubadiibwa munkaci mwàbò to, kàdi netwikale mu dibiiikila ku Didya dyà Dibanji. Bwalu, tudi tujungulula Yesù munkaci mwètù leelù ewu. Tudi tubwela pàmwe Nendè;

tupàtuka mu maalu à pa buloba, tubwela munda Mwèndè. Tùyaayaaku mu Cimenga aci, tùpàtukè pàmwè Nendè.

⁵¹⁵ Nkààdi nkùlakaja, Mukalenge. Nciyèna ne mayiisha makwàbò àbúngì à kuyiisha to. Kàdi ncyà bushùwà ne ndi nkweyemena Wèwè. Ndi ngènda nkèba Cimenga aci, mwàkenzá taatù wanyì Abraham amu. Kùdi Cintu kampànda munda mwànyì emu cidì cyàmba ne cilwalwa. Ndi nteeta myaba yònsò, Mukalenge, bwà kutangalaja Bukènkè ne kubàbìikila. Kwitabi bwà muntu nànsha umwe wa ku bwòbò aba, Mukalenge. . .

⁵¹⁶ Mùdìbi bilenga's, kwenji katanci, Wèwè kumbuulwilaci. Lwà ku cijèngù cyà ciipacila kilòmèètà binunu bibidì ne nkàmà yinaayi, ànu umwe *apa* ne *pààpa*, basòmba pàmwè leelù ewu, badisanga mu kaaba kàmwèpelè, bindile bwà Cimenga aci kumwènekaci. Tudi twamba ne tudi beenyi ne beena lwendu. Tudi biipàciwwe. Bampàngaanù, bàà pa buloba, bàdi bàseka ne bèèlulwila; màngumba à butèndeleeedi àdyombola; kàdi twètù katwèna tunyungishiibwa kùdì bintu byà mùshindù awu to. Tùvwijèku citùpà cyà Dìyì, Mukalenge, katùyì mwà kunyungishiibwakù to. "Nebyènzekè mu matùkù à ndekeelu." Swàkù bwà bìikalè twètù, Mukalenge, swàkù bwà twikalèku babadiibwe munkaci mwàbò. Tudi tulòmba nùnkù mu Dìna dyà Yesù. Amen.

⁵¹⁷ Nudi nuciitabuuja anyi? Twèlàayi byanza byètù muulu mùshindù *ewu*.

Ndi mu njila mutàngìle ku Cimenga cilenga aci
Cidì Mukalenge Wanyì mulongòlwèle Bèndè
Sungasunga;
Mwikalà Bapikula bwònsò bàà bikondo
byònsò
Mwà kwimba "Butùmbi!" banyùngùlùkile
Nkwasa Mutòòke.
Míngà misangu ntu ngùmvwa maajiyà à ku
Dyulu,
Kàdi matùmbi angààbandilà Kuntwaku:
Kaa, neciikale disànka kaayi pangààmònà
Musùngidi wanyì,
Mu Cimenga cilenga cyà ngòlò aci's!

⁵¹⁸ Mpindyewu, byòbì bìkèngela bwà twètù kusòmbela mu Cimenga aci pàmwè, labùlàngànaayi ànu ku cyanza ne muntu kampànda, nwamba ne: "Nzambi àkubènèshè, mwena lwendu. Udi wa penyì? Mu Louisiane, mu Géorgie, mu Mississippi? Mèmè pàànyì, ndi mwena lwendu. Ndi mwindile Cimenga aci."

⁵¹⁹ Ndi ngènda nkèba Cimenga aci, Mwanèètù Neville, kuntwaku. Tukààdi tukafika kwòkò aku...?..Mwanèètù Capps, ndi mwindile Cimenga aci, kàbidì, dilòlò edi.

Ne matùmbi ààci angàmbandila Kuntwaku:

Neciikale disànka kaayi pangààmònà
Musùngidi wanyi,
Mu Cimenga cilenga cyà ngòlò aci's!

Kaa, ours neikale ne kalolo, ne mbwa wa diitu
neikale wa ùsòmba ne bantu;

Nènku nyama wa ntambwe neàdyolwèlè
paanshi ku luseke kwà mwànà wa mùkòòkò,
kaa, èyowà's;

Ne nyama wa lwonji wa ku... neàlombodiibwè
kùdi mwànà mukesè;

Nènku nènshintulukè, nshintulukè nguumuka
ku cifukùbwa cìndi eci, kaa, èyowà's.

Kaa, nekwikalè ditalala mu cibandabanda
bwànyi mèmè dīngà ditùkù;

Kaa, nekwikalè ditalala mu cibandabanda
bwànyi mèmè... (Cyà bushùwà! Èyowà!)

Kamwàkwikala kàbidì tunyinganyinga to,
kamùciyi kàbidì dibungama to, ncyàkumòna
kàbidì lutàtù to;

Nènku nekwikalè ditalala mu cibandabanda
bwànyi mèmè.

520 Mfùmù wetù udi kàyì ùmwènèka, mu dīndà emu awu,
neàmwèneshiibwè. Ncyàkutàngila Bill Dauch wa bidimu
makumi citèèmà to. Kanwàkuntàngila mèmè bu wa bidimu
makumi àtaanu to. Kàdi nènngikalè mushintulukè, Ditùkù adi.

Nènku pīikalà nyama wa cisuku awu,
mulombòdiibwè kùdi mwànà mukesè;

Kàdi nènshintulukè, nshintulukè nguumuka
ku cifukùbwa cìndi eci.

521 Kanwàkwikalakù ne disànkà anyi? Nsuki yà mvyà neyikale
miyè; ne makaaya makòbàme. Kàdi bulenga bwà kwìsù, dibènga
kufwà, nebīimanè mu difwànangana Nendè, bwà kwela nsese
kutàmba dībà. Kaa, bilenga be!

...bwànyi mèmè, kaa, Mukalenge, ndi
ndòmba;

Kamwàkwikala dibungama to, kamùciyi
kàbidì tunyinganyinga to, ncyàkumòna
kàbidì lutàtù to;

Ne nekwikalè ditalala mu cibandabanda
bwànyi mèmè.

522 Ki citùdi balwile mwaba ewu aci's. Mbanganyi bàà kunùdi
bàdi dijinga ne makàndà bwà lwendu? Nzambi tupèkuwù's!
Mbanganyi bàà kunùdi aku bàdi bàsaama mu mubidi wènù,
bàsàlaayi batàpīke mpùtā? Dikùmi ne bābidì, anyi bapīte
apu. Nudi nwitabuuja ne Yèyè ùdi kaaba aka, Mfùmù udi
kàyì ùmwènèka awu anyi? Bintu bìdi bimwènèka; bìdi kabīyi
bimwènèka mbimwèneshiibwe ku bìdi bimwènèka. Yèyè ùdi

umwèumwè awu makèlèlèlè, leelù, too ne kashidi, pa kuumusha ànu mubidi wà musunya. Mpindyewu, pìikalàbi ne eci n’Nyumà Wendè udi muyiishile cyôci eci kûndi, Yèyè neenzè byenzedi byàkenzàYe pàvwàYe pànwapa abi. Kaa, bilenga be!

Ndi mu njila mutàngile ku buloba bulaya,
Ndi mu njila mutàngile ku buloba bulaya;
Éyì nganyì wâlwa bwà kuya naanyi?
Ndi mu njila mutàngile ku buloba bulaya.

Mu mpàtà myalàbàle mwònsò mwàmwa
Mùdi mùkenka Ditùkù dyà Cyendèlèlèlè
dimwèpelè;
Mwómò amu Nzambi Mwànà ùdi ùkòòkesha
kashidi,
Ne ùtangalaja bufùkù kule.

Kaa, ndi mu njila mutàngile ku buloba bulaya,
Ndi mu njila mutàngile ku buloba bulaya;
Éyì nganyì wâlwa bwà kuya naanyi?
Ndi mu njila mutàngile ku buloba bulaya.

⁵²³ Nkàmà yitaanu yìbwela mu musùlù mwàmwa, ditùkù dyà kumpàla dyàkamwènekà Mwanjèlò wa Mukalenge ku mèsù à bantu, bwà kushindika, mwàkenzàYe pa Mukùnà wà Sinaayi amu, bwà ne ngàkatwilangana Nendè. Mémè kubwela mu musùlù, ne nkàmà yimba musambu wùm wèwùm wè awu bwà dibàtiiza. Ki Yèyè ulwâlwa ewu, wènda ùpweka, Dikunji dyà Kapyà dimwèdimwè dinùdi numòna mu fòtò mwàmwa adi; munkaci mwà kupweka paanshi, ànu lwà kwinshi ku musùlù eku, ne kwamba ne: “Ànu mwàkadi Yone Mubàtiiji mutùmìibwe bwà kudyànjidila dilwa Dyèndè dyà kumpàla, Mukenji ewu newùdyanjidilè Dilwa diibidi.” Nwamònu anyi? Ki bwalu mbwòbù abu’s, nwamònu’s.

Éyì nganyì wâlwa bwà kuya naanyi?
Ndi mu njila mutàngile ku buloba bulaya.

⁵²⁴ Dikunji dyà Kapyà dimwèdimwè adi didi neetù kaaba aka. Nudi bacimanyè anyi? Yèyè mmwenze bàmwè bàà kutùdi bwà cintu kampànda, ne bângà bwà cikwàbò. Bu nwènù mwà kuswà, kakùyì mpatà nànsha yà kànà to, bwà kwitabuuja ne Yèyè ùdi munkaci mwà nzùbu emu, ndi ngiitabuuja ne Yèyè neàDijaadikè Yèyè mwinè kunùdi. Necinùsànkishè anyi? Mémè nciyì mufikè kùdi muntu ne muntu to. . .Tukàadi twipacila díbà ìbìdi jaajaaja, kàdi nwènù. . .Tudi ànu ndambù paanyimà pàà díbà ùmwè, éyowà’s wè. Bu nwènù mwà kwitabuuja, Yèyè àbandè pambidi pèètù! Diitabuuja dyètù didi penyì? Nwamònu’s, bikèngela wìtabuuje cyôci aci. Wèwè kùyì wela mpatà to, nànsha mikesè, dyòdi nedikwatè mudimu.

⁵²⁵ Ndi—ndi njingulula Bwikadi bwà Bunzambi bwà Diikalaku dyà Kilstò, Udi Dìyì awu. Ne Bible mmwambè ne: “Dìyì didi. . . ne bukolè kutàmba mwelè wà mvità wà nseke yìbìdi, ne Didi

dikòsa too ne ku bwongò bwà mifùbà, ne dijingulula meeji adi—adi mu mwoyi, dìbuulula mùnsokòntù wà mu mwoyi.”

526 Tàngilàayi. Mòna’s, ncìvwa mumanyè bintu abi to, kùkaadi bidimu. Nènku pangàakacyàmbà, nciyi mucimanyè to, tàngilàayi cidìYe mwenzè. KwambaYè ne: “Mpindyewu neùkwatè bantu ku cyanza cyàbò aku, nènku, kwèdi meeji nànsha makesè to, akùlà wèwè ànu cyambiibwà cidì cikwambila aci. Ambà ne ncyùjà cyà kànsère, cyònsò cidici aci.” Pashìshe kwambayè ne: “Nebyènzekè ne kabyàkukèngela bwà wèwè kwenza nànkù to.” Nwamònu anyi? Nwamònu anyi? “Necijingululè cintu mene cidì munda mwàbò aci.” Tudi bapete matentula à mishindù yònsò, bwà aci tudì bamanye, à mafwànyine kuseeswisha Basungula bu ne bìvwa mwà kwenzeka. Tàngilàayi numòne mùdici cyònsò cìpetangana ne Diyì, dìbà adi nenùmanye ne ncyà bushùwà anyi kí ncyòci. Kàdi, nànsha nànkù, Yesù ùdi ùshààla umwèumwè awu makèèlèlè, leelù, too ne kashidi.

527 Mbanganyi mwab’ewu bàdi bàsaamà, ne bamanyè ne mémè ncyèna muntumanyè? Elàayi byanza muulu, nwamba ne: “Ndi—ndi mumanyè ne kwèna mummanyè to.” Kaa, cidì ànu, ngèèla meeji, myaba yònsò. Cintu cimwèpelè cidì cikèngelà bwà nwènù kwenza cidì ànu kuciitabuuja nàka.

Itàbùùjà nàka, itàbùùjà nàka,
Bintu byònsò bìdi mwà kwenzeka, itàbùùjà
nàka;
Itàbùùjà nàka, itàbùùjà nàka,
Bintu byònsò bìdi mwà kwenzeka, itàbùùjà
nàka.

528 Yesù wàkamba ne: “Ànu mwàkadibi mu matùkù à Sodomà amu, ke mwìkalabi kàbìdi pàabuuludiibwa Mwànà wa muntu pa buloba mu ditùkù dyà ndekeelu. Pàabuuludiibwa Mwànà wa muntu, anyi, ùDìbuulula Yèyè mwinè mu ditùkù dyà ndekeelu.” Mpindyewu, kí matùkù à kale to, matùkù à pankaci to; ditùkù dyà ndekeelu, nwamònu’s, Yèyè ùvwa mwà kubuulula. Nènku mpindyewu tudì mu matùkù à ndekeelu. Sodomà mmushikàme ànu menemene, kantu ne kantu, baamisànjeelà, ànu mùshindù ùmwèumwè awu’s.

529 Cyàkenzekelà bà—bàshààdilè bakesè bààkabìikidiibwa bwà kupàtukabò ne kasùmbù kàà Abraham ncinyi? Kwàkalwa Kampànda munkaci mwàbò, mu mubidi wà buntu; muleejìibwe mu mubidi wà buntu, ùdya naabò, ùnwa naabò, cyàkudyà cìmwècìmwè cìvwàbo bàdya aci, bintu byònsò. Yèyè kwimana munkaci mwàbò, kwamba Mukenji. Pashìshe kwambaYè ne: “Nèngènzè cintu cinène eci.”

530 Ke Abraham kutùngunukayè ne kulonga ne: “Kì cyòci eci anyi? Mvwa munkaci mwà kukeba Cimenga kampànda. Ewu ki Mfùmù awu anyi?”

531 Ke Yêyè kwamba ne: “Sarah wàkeela cyôci eci mpatà bwà cinyi?” Mu ntèntà, paanyimà Pèndè apu.

532 Abraham kwamba ne: “Mukalenge Nzambì, Elohim!” Bwalu, Yêyè wàkajingulula meeji à Sarah.

533 Yesù wàkamba ne civwa mwà kwenzeka cyàkàbìdì pàvwàYe mwà kubuuludiibwa mu ditùkù dyà ndekeelu, Dibwe dyà mùsongà dibwela mu Mubidi. Bwà kupikula...Ke bapikula abu’s, ùlwa bwà kwangata Bèndè Sungasunga. N’Yêyè ewu neetù kaaba aka.

534 Mpindyewu, kùdi ànu byanza bitwè ku dikumi ne bìbìdì cyanàànà, anyì bipite apu, byela muulu. Ndi ngiitabuuja ne Nzambì ùdi mwà kwondopa yònsò wa kunùdi. Cyà bushùwà. Ndi ngiitabuuja ne ke cinùdi. Ncyèna ngiitabuujakù ne muntu ùdi bulelèlè mwà kusòmba mu mwaba bu ewu kàyì. . . mu cikondo bu eci, ne cyuyÿyà eci, kàyì ùmanya, ùjingulula cintu kampànda nànsha.

535 Ndi muswè bwà nùsambilè. Ndi muswè ùpetè cidi cikutàcisha, mu—mu—mu mwoyi wèbè, nwamònu’s, ne pashiishe ùbangè kusambila, wamba ne: “Mukalenge Yesù, mbuulwilèku eci. Ndi—ndi nKwambila cidi cìntàcisha. Nènku mpindyewu Wèwè udi utùma Nyumà Mwimpè Webè kùdi Mwanèètù Branham, bwà kuuja cyàkambàye ne m’Bulelèlè aci, mu Diyishia edi didiye mwakule leelù ewu bwà bwalu Bwèbè, ndi mumanyè ne neciikalè Bulelèlè. Mpindyewu, cìmbuulwilèku, Mukalenge. Akùlè naanyì.”

536 Mpindyewu mbitangàlàke, byenze bu ebi eku ne kwàka. Nànku sambilaayi ànu cyanàànà, ne itàbùùjaayi ànu ne mwoyi wènu wònsò ne, Nzambi neàcìfilè.

537 Mpindyewu ndi muswè bwà nuntàngilè, ne nùsambilè. Ànu mwàkamba Peetèlò ne Yone ne: “Tùtàngilè.” Yêyè ùvwa dijinga ne cintu kampànda, ne ùdi ànu wàmba kucipeta’s. Nènku udi ukèba cintu kampànda, ne ndi ngèèla meeji ne udi wamba kucipeta. Yêyè kwamba ne: “Tùtàngilè.”

538 Yêyè ne: “Ní ng’argent ní nngòlò, ncyèna nànsha ne cìmwè to; kàdi cìndì naaci eci, nènkupèèshèci.”

539 Mpindyewu, bwà dyondopa, mèmè ncitu nànsha ne dyà kànà to. Dyònsò adi didi mu Kilistò. Kàdi cìndì naaci aci, dipà dyà Nzambì, ndi nkupèèsha, diitabuuja bwà kuMwitabuuja. Mpindyewu, mu Dìnà dyà Yesù Kilistò, yònsò wa kunùdi wòndopiibwè. Cìtàbùùjaayi. Nwamònu anyi? “Bu wèwè mwà kwitabuuja!”

540 Inàbànzà udi musòmbè pààpa wàwa, muntàngilè. Ùvwa ùdila mwadi, kùkaadi ndambù wa tusunsa, munkaci mwà kusambila. Yêyè ùdi ne lutàtù lwà kamina bidyà lumutàcisha. Ncyèna mukumanyè to. Wèwè udi mwenyi kùndì. Aci’s ncilelèlè, kí mmwòmò anyi. [Mwanèètù wa bakàji awu ùdi wàmba ne:

“Ncyà bushùwà.”—Muf.] Kwèna wa muneemu to. Udi wa mu Chicago. Mándàmù Alexander. Aci ní ncyà bushùwà, nyungishà cyanza cyèbè. Mpindyewu alùkilaaku ku Chicago ne ùsangalè.

⁵⁴¹ Ncinyi cidiye mulenge aci? Cintu ànu cyòci cìmwècìmwè cìvwà mukàjì uvwa ne mashi àlwa munda awu mulengè, luzemba lwà cìvwàlù Cyèndè, kì n’lwànyì mèmè to.

⁵⁴² Inábànzà mutekète nyèyè ewu musòmbe ànu munkaci mwà musumbà wà bantu ewu, bu mèmè mwà kumufikisha ku dingumvwa. Wèwè wajuulù mutù wèbè luseke awu. Ncyèna mukumanyè to. Wèwè udi mwenyi kùndi, kàdi udi usaama disaamà dyà cifù. Bayebè mmusòmbe ku luseke lwèbè aku. Ùdi ne cintu kampànda cimutàcisha ku dici dyèndè aku. Dìna dyèbè n’Czap. Nudi beenyi kùndi. Kanwèna bàà muneemu to. Nudi bàà ku Michigan. Ncyà bushùwà, nyungishaayi byanza byènù. Alùkilaayi ku Michigan, basàngalè. Diitabuuja dyènù ndidì dìnùsàngaja. “Bu wèwè mwà kwitabuuja, bintu byònsò bìdi mwà kwenzeka.”

⁵⁴³ Inábànzà mutekete wàwa ne lutàtù lwà pa muminu, mmusòmbe lwà mundekeelu emu, ngwà ku Géorgie, mulwàte bilambà bitòòke. Alùkila, ku Géorgie, musàngalè. Yesù Kilistò ùdi ùkusàngaja. Udi ucìitabuuja anyi?

⁵⁴⁴ Inábànzà udi musòmbe mwaba awu, muntàngile, ànu ku ndekeelu kwà nkwasà aku mene. Ùdi ne disaamà dyà mutù wà kapàla. Yèyè mwà kucìitabuuja, Nzambi neàmwondòpè. Mándàmù Brown, itàbùùjà ne mwoyi wèbè wònsò, Yesù Kilistò neènzè. . . Wèwè udi mwenyi kùndi, kàdi Yèyè mmukumanyè. Uh-huh. Udi ucìitabuuja anyi? Elà cyanza cyèbè muulu. Ncyà bushùwà.

⁵⁴⁵ Udi mulààle mwaba ewu pa kalààlù kàà dibunya aka. Mwambilaayi àtàngile kùnweku. Ùdi ùsaama, bikaadi binèenga bikolè. Bu mèmè mwà kumwondopa, mvwa mufwànyìne kucyènza, mukalenge. Ncyèna mwà kwondopa to. Yèyè kì ngwà munwemu nànsha; mmufùmìne kulekùle. Udi mufùmìne ku Missouri. Ntàtù yèbè nyà mundamunda. Kàdi wèwè mwitabùùje ne mwoyi wèbè wònsò, ne kùyi wela mpatà to, Yesù Kilistò ùdi mwà kukwondopa; ne udi mwà kwalukila ku Missouri, musàngalè, ne kufila bujaadiki bwèbè. Udi ucìitabuuja anyi? Nànku cìtàbè, ne wàngatè kalààlù kèèbè kàà dibunya aku ùye kwèbè kumbèlu. Yesù Kilistò ùdi ùkusàngaja.

⁵⁴⁶ Nudi nwitabuuja anyi? Ke dimanyishiibwa dyà Bwikadi bwà Mfùmù wa Cyèndèlèlèlè abu’s. Nudi nucìitabuuja mpindyewu anyi, ne mwoyi wènù wònsò? Mpindyewu, ncyà bushùwà ne Yèyè mmwenze lukànù lwà cijèngù, lunyùngùlùkile nzùbu ewu mujimà. Udi ucìitabuuja ne mwoyi wèbè wònsò anyi? Udi wìtabuuja ne udi mu Bwikadi Bwèndè anyi?

⁵⁴⁷ Mpindyewu, udi wìtabuuja ne wìtaba ne wèwè udi umwe wa ku minyàmpalà yà mu Bukalenge ebu anyi? Elà cyanza muulu.

Yesù wàkamba ne: “Bimanyinu ebi nebi filè aba bàdi bìitabuuja. Bwôbò batentèkèle babèèdi byanza, babèèdi nebasangalè.” Tudi muntu ne mukwèndè; wèwè udi citùpà cyà ku mèmè, mèmè ndi citùpà cyà ku wèwè; tudi bwônsò citùpà cyà ku Kilistò. Mpindyewu, bwônsò cyàpàmwè, tütentekelanganàayi byanza muntu ne mukwèndè.

548 Apa mene, mukàji udi pa kalàalù kàà dibùnya ewu mmujuukè kuulu, wènda ùnyùnguluka, wàlukila kumbèlu bwà kuumvwa bîmpè. Amen.

549 Nudi, muntu ne muntu, bwondòpìbwe, bu nwènù mwà kucìitabuuja. Mpindyewu tentèkèlanganaayi byanza muntu ne mukwèndè, nènku nudi citùpà cyà Kilistò eci. Udi usambidila muntu ùdi mutentèkèle byanza awu, ànu mùshindù wùdi muswè awu.

550 Mukalenge Yesù, tudi tuKujingulula kaaba aka. Wèwè udi Mfùmù wetù; Wèwè udi uDimanyisha munkaci mwètù. Tudi tuKwela twasàkidila bwà Bwikadi ebu. Nènku, Mukalenge, Wèwè wàkamba ne: “Wèwè mwambile mukuna ewu ne: ‘Tentèmukà,’ kùyì wela mpatà to; witabuuja ne cyùdi mwámbe aci ncyènzekè, udi mwà kucìpeta, udi mwà kupeta ciwàmbi aci.”

551 Pashìishe, mu ditumikila dyà díyì ditùma edi, mu ditumikila dyà Díyì dyà Nzambi dìdì kadiyì mwà kupangilaku to, twètù bu minyàmpalà Yèbè bafùmine mu ntàntà wa kilòmèetà binunu bibìdi ne nkàmà yinaayi mu nseke yônsò, bu mùdi Cimenga, tudi twambila Sàtaanà, démon mucìmùnyìbwe awu ne: “Ndekeelu webè nkwoshiibwa. Tudi minyàmpalà yà mu Cimenga cidì ne nseke yinaayi bule bùmwe aci, mu Cimenga mùdi Mwànà wa mùkòòkò mwikàle Bukènkè aci. Twètù tudi cyambiibwà cileejìbwe patòòke cyà Nzambi wa Bukolè bwônsò, cidì Yesù Kilistò mupikùle ku ngàsà Wendè.”

552 Sàtaanà, pàtukà, ne shìya mubèèdi yônsò udi kaaba aka, mu Dìnà dyà Yesù Kilistò. Byanza byà cijila bìdì bipikula, bwalu mbiitabuuje Díyì ne bàdi byambiibwà byà meeji à Nzambi, mpindyewu byanza abi bìdì pambidi pàà muntu ne mukwèndè. Kwèna mwà kushààla mubàlamè kàbìdì ntàntà mule to. Pàtuka, mu Dìnà dyà Yesù Kilistò!

553 Mpindyewu, mu Dìnà dyà Mukalenge Yesù, mpindyewu, Yèyè ùdi kaaba aka. Díyì Dyèndè dìdì dyàmbe ne Yèyè ùdi kaaba aka. Bwikadi bwèbè ne diitabuuja dyèbè ndìdì dyàkula, bwà ne, wèwè udi umwe wa ku minyàmpalà ayi. Nànsha mene cipiminu cyônsò cyà maalu à buloba citùdì mwà kuleeja, ncyôci. Nudikù mwà kujingulula ne nudi bânà bàà balùmè ne bàà bakàji bàà Nzambi bapikula anyi? Nudi nujingulula ne eci ke ku Nzùbu kwènù anyi? *Eku* ke kunùdì nuya.

554 Ke bwà cinyi nudi nulwa mwab’ewu, s’ke bwà cinyi nulwàlwa kùdì Kilistò, nudi nudìishiibwa ne Díyì Dyèndè.

Nènku bu nwènù mwà kupeta cikondo bu eci, mwab'ewu, ànu ku byambiùbwà Byèndè bileejiùbwe patòòke, nebiùkalè cinyi patwàbwelà mu Bwikadi Bwèndè? Kaa, nebiùkalè bilenga be! Muntu ne muntu wa kunùdì ùdi ne bukenji bwà kwondopa babèèdi, kutentekela babèèdi byanza. Muntu ne muntu wa kunùdì ùdi ne bukenji bwà kubàtiiza.

555 Muntu kampànda yèyè kaaba aka udi kàyì mubàtiùjiùbwe mu Dìna dyà Yesù Kilistò to, ciinà cyà màyi cidi bwàshì.

556 Ke mùshindù ùmwèpelè unwikalà mwà kucyenza, uh-huh, ncyà bushùwà, ngwà kutumikila Dìyi dyònsò. Vùlukàayi ne, katùpà kakesè kàmwè kàà Dìyi, ku cibangidilu aku, kàakakèbà mpèkaatù ne mpèkaatù yònsò pa buloba. Yesù wàkamba ne: “Ewu yònsò wadidìnga kuumushila Dìyi òmwè ku Cyòci eci, anyi wasàkidilaKù dìyi òmwèpelè awu, kàakubwelamù to.” Dyèndè dìnà ndikùpùdìbwe mu Mukàndà, ànu pàdiye wenza nàнку apu.

557 Ne kakwènakù mwaba nànsha wùmwè mu Bible wùkaadiku muntu mubàtiùjiùbwe, mu Èkèleeziyà, bishiilàngàne ne mu Dìna dyà Yesù Kilistò. Pawikalà kùyì mubàtiùjiùbwe mùshindù awu to, mbìmpè wènzè nàнку.

558 “Kaa,” mùdì wamba, “kacyèna ne cidìci cishintulula to.” Cyàkashintulwila Evà's.

559 Sàtaanà kwambayè ne: “Kaa, bushùwà's, Nzambi, udi mumanyè ne Nzambi. . .” Kàdi, Yèyè's wàkacyènzà. Yèyè ngudi mwambè nàнку.

560 Wàkapèèsha Peetèlò nsapì yà Bukalenge, ne cìvwà ciswikùbwe ku Mpenta aci nciswikùbwe bwà kashidi. Ke bwà cinyi Mukàji-musèla wàkabwela mu didyànjila-kuleejiùbwa, bwà musangu mwibìdì; bìkèngela kwikalè Èkèleeziyà kampànda mubiùkidìbwe bwà kupàtuka mu ditùkù dyà ndekeelu, mùvwàbi mu ditùkù dyà kumpàla amu, ànu menemene. Muci awu mmufùmìne ànu ku miji yàwù, mubànde too ne ku Muci-Mukàji-musèla, mwàkenzekabi mu ciine cikondo aci; Mudimu mwowela byanza wà Nzambi cyàkàbìdì, múngàmbi kùkaadi maadyàlumingu àbìdì, bwà kwangaciùbwa kuya mu Cimenga amu.

Nzambi àkubènèshè. “Ndi mpindyewu ngùtabuuja.”

561 Sàtaanà mmucìmùnùbwe. Mmumanyè. Ùdi pa buloba, ùdi wèndakana bu ntambwe udi ukungula. Kakwàkwenza ntàntà mule to yèye, kaa, bwalu bwèndè nebùjike's. Yèyè mmumanyè dìbà dyèndè. Ùdi wènda ùnyùnguluka bu nyama wa ntambwe udi ukungula.

562 Kàdi, vùlukàayi ne, Mfùmù wa Ditalala mmwimàne ku luseke; Nzambi Munène awu. Maanyimèèlà wa buumùntù bwànyì, Maanyimèèlà Wakamfwimba cìndì eci, Wakakufwimba cyùdì aci, ùdi kaaba aka. Piùkalà Maanyimèèlà, Udi mumanyè

mwà kukwàtakaja nzùbu pàmwè, kaaba kèndè menemene, nganyi udi mumanye bimpè kutàmba Maanyimèèlè awu's? Ne Yéyè ùdi kaaba aka bwà kujaadika, Yéyè mwinè ne, Ùdi kaaba aka.

⁵⁶³ Mpindyewu mbishindàmèène pa diitabuuja dyèbè. Itàbùùja, itàbùùja nàka! Uh-huh.

Ndi mu njila mutàngile ku Cimenga cilenga aci
 Cìdì Mukalenge Wanyì mulongòlwèlè Bèndè
 Sungasunga;
 Mwikalà Bapikula bwònsò bàà bikondo
 byònsò
 Mwà kwimba “Butùmbi!” banyùngùlùkile
 Nkwasa Mutòòke;
 Míngà misangu ntu ngumvwa maajiyà à Dyulu,
 (Pààjika byònsò ebi's!)
 Kàdi butùmbi bungààmòna Kuntwaku:
 Neciikale disànka kaayi pangààmòna
 Musùngidi wanyi,
 Mu Cimenga cilenga cyà ngòlò aci!

⁵⁶⁴ Vùlukàayi ne, mu èkèleeziyà, dilòlòlò edi, nebàfilè mèèsà à Mukalenge. Pawikalà kaaba aka mu cimenga emu, kàbìdì, muswè kulwa, tudi baswè kwikala neebè. Nciwùlukilu cyà citwikala mwà kudyà, òmwè dyà ku matùkù aa, pàmwè Nendè.

⁵⁶⁵ Ndi mununange. Ncyèna mumanyè mwà kubwàmba to. Ndi ngèèla meeji ne nudi mukele wà bàà pa buloba. Ne ndi ngumvwa diditwàla dyènù pambèlù pààpa munkaci mwà buloba, dîbà adi aci cidi cimpèèsha dyeyemena dyàbùngi mu nwènù.

⁵⁶⁶ Kàdi, elàayiibi meeji ne, kasùmbù kakesè aka nekiikale, kimpè ànu bu mutùdì emu, nekàkòsoloke, òmwè dyà ku matùkù àdi paanshì aa. Netùloote cyòci eci. Kàdi bu umwe wa kutùdì mwà kusabuka kumpàla kwà twètù kutuutakeena cyàkàbìdì, netwikale:

Nèntwilanganè neenù mu dindà, ku luseke lwà
 musùlù wùdì wùbàlakanà awu,
 Pìikalà tunyinganyinga twònsò tuyè
 mwamwamwa;
 Nèngiikale mwimanyine ku ciibi, pìikalà biibi
 binène bishiya bwàshì,
 Ku ndekeelu kwà ditùkù dyà mwoyi, dyà
 dizengeja adi.

Nèntwilanganè neenù mu dindà, ku luseke
 lwà musùlù wùdì wùbàlakanà awu, (Ndi
 mujimine munkacinkaci amu.)
 ..ku musùlu aku ne bulundà bwà kale
 buvwijilula bupyabùpyà;

Nènnùmòne dîbà adi, nnumanya.

Nënummanyè mu dindà adi, ku mimwemwe
yìndi naayi eyi,
Nëntwilanganè neenù mu dindà, mu Cimenga
aci, cidì ciibaka ne nseke yìnaayi yà bule
mùmwè.

⁵⁶⁷ Nudi bawùnangè anyi? “Too ne patwàsangilà!” Mpindyewu tùjuukilàayi kuulu. *Angàtà Dìna Dyà Yesù Wëndè Naadi*, tùpèeshèku cyonà.

⁵⁶⁸ Nudi baMunangè anyi? Yèyè kî mmulenga wa dikèma anyi? Nudi nwtabuujà ne eci m’Bulelèlè anyi? Wèwè udi mu lwendu mutàngila kwinè aku, ku ngàsà wa Nzambì anyi? Too ne patwàfikà kuntwaku:

Angàtà Dìna dyà Yesù wëndè naadi,
Bu Ngabu ku butèyi bwònsò;
Ne pààkujìngà mateeciibwa ku nseke ne ku
nseke,
Nungàna ànu cyanààna Dìna dyà cijila adi mu
disambila.

Ki cyònsò cyà dyenza ncyòci aci, too ne patwànùmònà cyàkàbìdì. Èyo.

Angàtà Dìna dyà Yesù wëndè naadi,
Mwànà wa kanyinganyinga ne... [Muntu
kampànda ùdi wàmba ne: “Dilòòlò
edi?”—Muf.] (To.)

Nedìkupè disànka ne busàmbi,
Nda naaDì kwònsò kùyaayà.

Dìna dyà mushinga, Éyì dyà bupòle be!
Ditèkemena dyà buloba ne disànka dyà Dyulu;
Dìna dyà mushinga, Éyì dyà bupòle be!
Ditèkemena dyà buloba ne disànka dyà Dyulu.

⁵⁶⁹ Mpindyewu, bivwa bikèngela bwà mèmè kutùpika bìmwè bitùpà byà Dìyiisha dyànyì. Dìngà ditùkù, bu Mukalenge mwà kwanyisha, nèngàlukilè ne kwangata “mìsèèsù eyi,” ne kuyibàkula, nwamònu’s, patùdì mwà kupeta dìbà dyàbùngì. Nwènu biikale nudyàbakeena bwà mutùdì katùyi tushààla ntàntà mule mukumbane. Leelù ewu’s, nyewù tudi bashààle ntàntà mule. Kùdi luuyà lukolè. Kàdi, mpindyewu, Nzambì ànùbènèshè. Mèmè ntu munangè ngimbilù awu.

⁵⁷⁰ Mwena mutumba kampànda kaaba aka, ùvwa wàmba, dilòòlò adi pàvwàbo bàkanga cipwidì cyà mèyì aci lwà pambèlu pààpa, wàmba ne: “Ndi munsànke ne Dìyiisha bikolè be, kàdi bwà cinyì nudi biimànyika ngimbilù mulenga awu, nwamònu’s, lwà pambèlu apu?” Pa nàнку, mwena mutumba, pawikalà utèeleja mu dindà emu, ngèèla meeji ne tudi ne beena mutumba batàmbe bwìmpè bàdiku mu Jeffersonville emu’s. Tudi twimanyika tushinyi twètù kumpàla kwà nzùbu yàbò ne

bikwàbò byònsò; kabèèna bàmba cintu nànsha címwè to; tudi ànu tutùngunuka. Pa nàнку, tudi tubàsàkidila mpindyewu.

⁵⁷¹ Kaa, mùshindù mwinè wùdìYe mulenga's wè! Nzambi ìkalè neenù mpindyewu.

...Dìnà, Éyì dyà bupòle be!

Ditèkemenà dyà buloba ne disànkà dyà Dyulu.

Too ne patwàsangilà!

⁵⁷² Twìnyikààyaaku mitù yètù. Mpaasàtà neàtùtangalajè, ànu mu katancì kakesè cyanààna emu. Nzambi ìkalè neenù!

...tudi tukasangila ku makàsà à Yesù;
(Ku Cimenga cinène aci, ku Nkwasa wa butùmbi.)

Too ne patwàsangilà! too ne patwàsangilà!

Nzambi ìkalè neenù too ne patwàsangilà...



64-0802 Cisòmbedi Cìcilwalwà Cyà Mubàki
Wa Mu Dyulu Nè Mukàji-Musèla Wa Pa Buloba
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org